

西北革命史徵稿

下卷





A541 212 0009 10028

西北革命史徵稿（下卷）

西北革命先烈碑誌哀誄雜文彙錄

敘

此編所錄碑誌傳狀哀誄雜文皆散見於各地公私所記及各名人文錄中經本會連年採訪輯訂實西北革命史徵所據以編纂成書之重要資料也其文不乏當代魁儒修士手筆敘事翔實命筆謹嚴足以信今傳後非徒阿好溢美之文茲特彙爲一編列入文獻類目中另冊印行流傳備供世人涉覽昔左傳成書猶存國語矧茲衆製辭贍義豐堪與紀傳並存參證先烈全貌益得其真夫金石之物難以行遠又或隱或顯散置荒村野田中雨淋日炙久且爲蒼蘚剝蝕以盡而斷簡零編散存私家時移世易人事乘除雖其孝子賢孫亦或視同故紙飽蠹魚矣茲編所錄共得四十餘篇其中數篇已多悲泐無從補訂三十年來文獻濩落卽已如此又况其更遠者乎其尙有採訪未盡者仍以俟之將來

中華民國三十六年十二月陝西革命先烈褒卹委員會同人謹識

西北革命史徵稿 下卷

西北革命先烈碑誌哀誄雜文彙錄目次

碑表誌銘

國民政府委員劉公允丞墓表

劉允丞先生之碑

曹君印侯墓表

民國志士嚴文軒先生紀念碑

王烈士紹文墓表

故陸軍中將富平田將軍墓碑

耿端人少將紀念碑

高子青師長墓石碑陰記略

王寶山碑文

慧卿張夫人碑記

史君天士紀念碑

于右仁

馮玉祥

張瑞璣

李良材

胡立生

傅增湘

党元凱

榮祥

張鈞

溫良儒

先烈李光輝碑文

西安革命公園國殤墓碑

岐山城陷殉難將士墓表

渭北行團參謀官夢周王公紀念碑

張君東白壙記

蒲城李仲特先生墓誌銘

臨潼郭希仁先生墓誌銘 并敘

國民政府委員劉君墓志銘

王故監察使陸一墓志銘

革命先烈胡定伯先生墓志銘

彭君墓志銘

張義安墓誌銘

董少將振五墓誌銘

彭君季強墓誌銘

王作舟

馮玉祥

失名

康振邦

宋伯魯

邵力子

劉鎮華

張繼

于右任

郭希仁

沈尹默

章炳麟

于右任

張贊元

田將軍潤初墓誌

陝西革命殉難軍民合冢銘

劉郁芬

傳狀行述

陝西靖國軍總指揮井君勿幕事略

胡軍長督辦河南軍務善後事立生將軍之事略

胡景翼軼事

革命先烈宋向辰先生行述

李元鼎

先烈樊靈山先生行狀

尙鎮圭先生小傳

張仲良先生軼事

劉允丞

高峯五軼事

楊子廉

張瑞卿事略

陸軍少將前陝西警備軍統領郭公家傳

史漢岑先生行述軸文

楊秀軒先生芳行序

范任

無名英雄記

誄祭公啓

秦隴復漢軍第二鎮戰記徵文啓事

革命大祭通電

祭同志衆議院議員尙君天德文

孫文

張義安將軍誄

茹欲立

董振五哀詞

劉允丞

湯仁天先生墓誌銘

于右任

蓮舌居士蒲城李桐萱先生墓誌銘
暨元配馬孺人墓誌銘

王頤

朱子敏先生墓誌銘

郭藩

朱佛光先生墓誌銘

于右任

胡公笠僧墓誌銘

于右任

扶風王伯明先生紀念碑文

劉允丞先生事略

劉允丞先生六十自述

華麓陝西革命先烈祠墓記

王伯明先生事略

郭希仁先生事略

郭希仁先生碑記

臨潼曹印侯先生傳

國民政府委員富平劉先生允丞墓誌銘

國民政府委員劉君墓志銘

國民政府委員劉公允丞墓表

王誠齋先生行略

國民革命軍第二集團軍南路軍第四軍軍長蔣朗亭墓碑

溫成功傳

溫良儒

溫良儒

溫良儒

景梅九

溫良儒

騰衝李根源撰

張繼撰

三原于右仁撰

溫良儒

岳維峻

王季方撰

致陳柏生函

六先生事略序

白毓庚先生傳

楊松軒君家傳

涇陽柏筱餘先生紀念碑

甄士仁先生傳

紀金福傳

田故監察委員毅安事略

陳冠三先生行述

董振五

溫良儒

王菊清

蔡元培

高又明

孔堯天

寇遐

西北革命先烈碑誌哀誄雜文彙錄

國民政府委員劉公允丞墓表

于右任撰

公諱守中字允丞富平劉氏考仲貞公賀復齋先生門人也仲貞公有五子公次居三蚤歲讀書清麓憤清政不綱與井勿幕郭希仁曹寅侯諸賢入同盟會辛亥陝軍起義皆爲動力事定公出遊燕趙觀天下大勢結納豪俠袁氏叛國前命陸建章督陝殘殺日甚公與胡景翼岳維峻等陽設大有公司於三原爲策動機關因起義遂陸次年促景翼樹靖國軍幟於渭北苦戰數年策畫多出於公十二年出關至滬謁孫總理奉命同丁惟汾王法勤聯合馮公玉祥孫公岳以胡景翼作基幹爲首都革命之役及維峻兵潰嶠函公遭拘留居運城半年當事者始識公爲真革命黨人不可侮十七年當選本黨中央執行委員並選爲國民政府委員九一八國難起奉命兩入蒙古調查實業國防記其觀察所得至二十餘萬言旋被命爲山西陝西監察使未就歸里倡立陝西革命先烈撫卹委員會及華麓先烈祠墓造林會二十五年被推爲中央政治會議委員七七抗戰後視察黃河沿線防務及政府遷渝公建議關中不可輕棄當道聽之遂定防河之策旋回陝

寓三原時招舊遊獵原野以習勞平生治事之餘孜孜讀書著有續漢書郡國志略補註性剛毅貌清癯愛才尤殷遇英俊之士片言獎借能令振奮爲國器晚歲服膺顏李學說主張一兵一農政策三十年十月二十三日酉時卒壽六十一配王子二奉學玉衡女三慧貞桃貞菊貞孫男二澄字澍宇孫女二先世居富平到賢鎮明初遷瀟泊灘南柏玉村曾祖大賢妣馬氏祖世端妣李氏考諱德智母韓孺人所居附近八公原爲金宋戰場故公束髮讀書卽深受影響卒成時代學者銘曰頻陽一老劍吐銚孤筑萬里踏龍荒龍蛇在歲賢者殃一華歸骨白雲翔我來銘之萬古香

劉允奎先生之辭

馮玉祥撰

先生姓劉氏諱守中字允丞世籍陝西富平縣曾祖大賢妣氏馬祖世保妣氏李父德智字仲貞妣氏韓仲貞公受業於三原賀復齋先生之門經明行修一時稱許有子五先生其第三也早歲肄業清麓書院爲復齋先生再傳弟子性剛毅貌清癯器宇深沉研求義理之學崇尚氣節敦勵品行識者多以遠大期之而先生亦慨然有濟世匡時之志適值清季憤國是日非外患益甚遂結納豪俊如井勿幕郭希仁曹寅侯李岐山諸先烈先後入同盟會共誓革命辛亥武昌起義輒首先響應參與軍幕輕戰於各地居中籌畫

之計爲多迨共和告成陝局甫定井勿幕曹寅侯皆迫於不得已解兵柄而去先生以事不可爲亦翩然遠舉潛跡燕京無何袁氏竊號海內騷然當時陝西督軍袁黨也先生散家財以結客與胡景翼岳維峻董振五鄧寶珊諸公謀在三原共圖義舉事洩因之殉難者王紹文等二十餘人先生愈憤奔走號呼所在義軍遽起關中大震卒使陝督不安其位以去旋值護法之役先生復促張義安董振五鄧寶珊輩發難三原號靖國軍遙尊廣東護法政府以爲聲援推胡景翼爲之主井勿幕佐之分道進兵聲勢張甚不幸張義安戰歿於鄠縣井勿幕遇害於興平而胡公景翼亦被誘執囚而不放先生雖歷盡艱苦終能化險爲夷而同志喪亡私心痛之嗣曹氏當國政以賄成天下岌岌復將大亂時玉祥駐節燕薊然以憂賴先生爲笠生代表因與孫禹行二公謀議始得樹立國民軍旗幟一舉而掃蕩以盡焉溯自辛亥以來神奸鉅蠹層出不窮革命之事亦屢起屢仆先生幾無謀不與無役不從其有功於國民革命顧不大哉民國廿年被選爲國民政府委員二十五年復被推爲中央政治會議委員翊贊樞機優游論道老成碩望海內尊從而先生之謀國憂民猶終始如一日曾兩入蒙古徧歷蒙旗各地於山川形勢民間利病以及物產之所宜凡關於國防民生者無不周諮博訪鉅細靡遺倭寇之侵入中原也或視察黃

河沿岸或巡歷荆宜三峽抑或慰勞將士親出入於疆場僕僕道途不避艱險當廣川武漢相繼失守之際先生則倡言關中不可輕棄謂不守河東則關中不固無關中不惟無兵可徵抑且無餉可籌四川雖號稱天府然偏促一隅不足以圖恢復也因向中樞直陳得天輒被采納乃天不慈遺竟以積勞過劇於民國三十年十月二十三目因病逝世享壽六十有一嗚呼悲哉先生性慷慨好遊俠平居讀史常慕季布侯嬴之爲人故喜交納能折節下士往往得一英才數語激發輒使其振奮自圖蔚爲國器其於故舊尤爲篤念曾倡議設立陝西革命先烈崇祀撫卹委員會及陝西革命先烈華僑祠墓造林董事會風義之高有如此者晚年精研小學講求歷史地理尤好談兵法酷嗜孫子十三篇多能闡其奧義主政治主張就其長以吾人者則曰一兵工農一兵工農者即兵工農合一之謂蓋先生素服膺傅野顏習齋先生兵農合一之說亦即承先總理農工政策之精神也辭曰華獄鐘靈篤降忠貞崛起革命義不顧生無役不與有志竟成照人肝胆節似冰清謀國讜論樹厥風聲功贊樞要望繫輿情忝余爲友相見以誠豈惟道合抑且心傾追念曩昔撮述平生庶幾亮節永作典型

曹君印侯墓表

張瑞璣撰

十年以來余所謂生死道義之交半在關中而臨潼得三人焉曰王敬如曰郭希仁曰曹印侯印侯師事敬如以希仁爲友余之識印侯兩人實媒合之印侯爲人才氣兼盛不肯稍自貶抑以隨俗其文章言論如風檣弦矢不能自己辛亥夏余邀至咸寧署盡發篋中書使讀之每夜深煮酒與抵掌談天下事印侯自謂得三輔健兒三百人訓練而驅遣之可長驅秦隴無當也其自負如此是年秋秦軍起義印侯豫期辭去轉餉募兵奔走於渭南北冬十一月余以奉母東歸自此以後音塵隔絕三年無一字相往還然每見秦中人士輒詢近況印侯雖頻經蹶折而意氣固自若也民國二年希仁由歐洲歸來書謂印侯竟客死西湖友人歸其櫬卜葬於華山之陰囑爲文以表其墓嗚呼印侯死矣使印侯一生之氣魄思力不沈埋於陳想墮樵之間是後死者之責也曷敢辭印侯名樹勛世居臨潼油坊鎮曹陽村少孤窮力農奉母兼任里役錢穀簿書覈算速而準衆皆奇其精明年廿悔未學適同邑包海涵授讀近寺假乞火往道慕學意海涵授以書爲解釋文義大喜晝夜鑽研不輟學爲文下筆奔放不羈無扞隔語未幾應童子試卽獲雋每遇文會題紙下握管伸紙一目成數十藝見者咋舌光緒三十年富平張扶萬主講橫渠學堂扶萬關中淹博士也印侯得其指授博覽羣籍學思大進時敬如講學里門主張程朱能貫

穿新理不爲俗障所縛三十一年印侯踵劉委贊執弟子禮敬如爲之師於劉家莊往來講論經年心大悟歸築上室顏曰逍遙祠取古今中外哲學遺著摘條手抄貼壁迨滿上下千古心理整然印侯之學蓋自是大定矣三十四年與希仁及劉藹如賀紱之分門治學於西安麗澤館印侯雞鳴卽起練體力張兩臂迴環擊柱聲震屋宇每夜深演說痛陳時事之艱人心之陷溺慷慨泣下聞者奮興宣統二年應選拔試北上中途冒病抵京更劇自題小照寄友云縱橫一代風雲志出入千重坎坷身可以想見其概矣是年八月各省請開國會秦舉印侯爲代表時東南人士多薄視西北當會議時甲乙彼印侯病新愈奮然曰此事無庸辨駁之地請卽同日詣醇王府取我民權來若不與當各擲頭臚酬之衆驚顧無一語然咸服其沈摯京師各報紙一時標名轟喧謂秦有人也事迄還秦經嶠函受風寒又大病家居月餘力疾出聯合紳民倡辦地方自治未幾聞川蜀抗路事起遂如西安約同志組織革命軍密赴河北招募中道聞西安反正率鄉團入臨潼以錢定三督師東出令留守臨潼定三至渭南遇害張伯英繼之潼關反正印侯爲籌糧三千石餉軍汎渭而下繼又入西安議招河北壯士西略甘甯謂我不搗彼彼必犯我毋寧先出以制之軍府不許會潼關二次失守伯英函召救援印侯書走使十日得兵六千遊俠

輕生仗義之徒悉歸之時餉械兩缺印侯破產貸贍萬金造槍矛數千自官長至兵卒皆粗食無一錢餉編制甫就潼關克復而甘軍東攻分道薄乾州鳳翔鳳翔守兵單圍尤急印侯奉調三日夜抵鳳與甘軍血戰三十餘次率烏合之衆持土槍木挺衝馳於快砲飛彈之中無一人畏死怯退者卒能保危城屏西陲使敵騎不得東竄厥功偉矣共和宣布後印侯首議裁兵曰兵多而餉少窮極必亂天下無寧日矣時諸將新立功當事者難之印侯曰請自我始遂遣散十餘營僅留正兵屯田兵各三營以六千餘亡命無賴之衆招之來轡之去各俯首帖耳無異詞此非僅恃才氣爲之也印侯嫻於政治理財等學尤專心考究手裏鉅帙論斷博該兵後即條陝西實業擬次第擴充因款絀未果辦辦棉花公司司員在咸陽者索銅客銀二兩軍府聞之大怒立斬二人以徇並遣騎捕印侯或勸其避不聽遂趨軍府陳詞侃侃無懼色軍府笑其意置之已而悉令散正屯各營留屯兵一營印侯自遣此挫遂專志經商欲以財權左右世界嘗謂摩爾根亦人耳我何過遜遂以五千金遣入市棉花土貨運漢教任事者旋市旋運旋售自居鄭策應閱六月獲息鉅萬以積勞舊疾作民國二年養疴漢口會南北戰爭起武昌搜捕黨人頗嚴同鄉某告貸不遂銜之爲匿名書謂印侯將應寧贛遂被捕入獄獄中上書自辨詞壯而切得釋既出

獄與人言數年以來病軀鬱塞暴性時發不能自克此櫻禍之道也此次入獄勝讀書十年克己寡過不怨誣者自覺胸懷澄朗心魄洞澈無一毫障礙嗚呼印侯之學養至是蓋進於不惑知命然憂勞備至疊遭大挫內傷外感體已不支會天熱舊疾增劇乃囑友經營商業爲靜養計竟於三年十一月歿於西湖年僅三十二嗚呼印侯死矣以印侯之才使稍貶其氣與當時號稱志士豪傑者爭攘取功名利祿夫豈多讓而印侯不屑於此竟焦勞抑侘以至於死此印侯之所以爲印侯也印侯貌豐下目熠熠射人步行趨疾與人交握手出肺肝不合則推誠面責無瞻徇雖將莽夫一見則垂手聽命其學問自成一家議論思想均能抉破藩籬尤善引導後進自爲學約若干條其言皆雄肆奇闢足以開擴小胸苟天假之年得持其學說馳騁一世豈可量哉嗚呼印侯死矣後之登華山玉泉者過印侯之墓摩挲碑碣讀吾此文必有醇酒歎歎不能自己者印侯有知其英魂強魄或亦藉松風竹雨而作聲酬答也

民國志士嚴文軒先生紀念碑

李良材撰

清之末朝廷最忌革命黨人更緣是嚴詞逮爲刑祿階稍有形跡者恆無幸甚有僞爲證據以誣栽者於是學界人人自危庚戌春文軒君由湖州任師竹介紹見余與之言

推翻專制事氣不少沮余以有胆識甚敬重之既又誠以避官吏耳目無數相見但以意進行慎言而已此後文軒遂不常往來辛亥九月朔義軍起余訪文軒則捐館舍已四閱月嗚呼文軒澄城寺前鎮人沉默寡言肄業師範學校時爲家兄仲特所賞識嘗以財助師竹爲黨人佈置又贊助某道士募死士河南雖均未獲效而其實心實事爲民國前途謀亦可概見夫滿政府傾頽民國肇造薄海稱慶文軒費如許心血而未得一見吾深爲惜之然以多少頭顱所易之共和羣小乃爲營謀利祿計屢欲乘機破壞士仁人椎心泣血憤不欲生而文軒則一暝不視脫此煩惱則又幸矣今者事過情遷追溯疇昔不禁感慨係之文軒卒時年二十九歲子二五瑞五福女一雲仙

王烈士紹文墓表

古之遊俠士以軀借友報仇持義甚隘儒者羞稱之至若爲羣謀辱身斷脛而不悔厥行侔救世宗教家視遊俠越等矣今長安王烈士紹文卽其人已西秦初設高等學校烈士肄業其中年方冠時余忝在講席視烈士不過一守分書生而已暨辛亥革命余參與晉軍事間道入秦頗聞同人稱昔年學友戮力於光復役者以烈士爲最少奇之及余在京又聞烈士肩担同盟會務終始靡懈羣推健者迺益奇之癸丑氏軍失敗於南京甲

寅余走關中始與烈士覲面則驚其意態英沈非復當年學子因論當地人物少所許可獨追憶鄒烈士子良慨云子良志在社會不共夸者爭權而猶不免人心險熾尙堪問耶並舉易革命言三就論中國革命尙須多次非具有犧牲力者不足共事則大奇之引爲畏友乙卯春烈士勦辦三育學校思鑄陶後進且得潛晦行亦陰納同志協定西陲要略故不惜罄家資以支撐之是年冬雲南義師舉烈士亟謀響應語同人曰與制於人寧先制人且機不可失爰奔走遠近諸邑部署略定過返長安次春約納內外合舉爲謀者偵知被捕嚴刑逼問同謀者堅不吐於二月十五日赴市曹途人擁觀烈士仰天歎曰已矣誰是繼吾志以拯同胞於水火者則某雖死猶生刑者叱之跪烈士屹不爲動竟立受刃焉嗚呼烈矣聞者爲之氣湧人云烈士特立獨行持躬儉然遇人急難輒領囊濟之不少吝是則大類遊俠然持義較高鼻之所悼鄒烈士者殆不啻自悼矣烈士平生軼聞別有傳誌茲僅述其死事之烈表於墓以告世之能繼烈士志者烈士名鴻遇短小羸弱長於謀斷時人或以比張子房云烈士有子二長植次植母氏生年七十餘矣日猶抱孫倚閭望兒歸也此又烈士歿後之餘痛焉丙辰除夕山西安邑景定成撰淳化于鳴皋敬書

胡笠僧 劉允丞 董振五 張義安 岳西峯 樊俊榮等二十八人豎石
故陸軍中將富平田將軍墓碑

江安傅增湘撰

民國肇建二十有餘年所謂陝以西之革命軍人甚衆其有生不伐赫赫之功歿猶能致難忘之思者唯故陸軍中將田將軍潤初爲然矣田氏植業富平尹家村倚時豐嗇絲數百年載服南畝育德孕靈篤生材武用光庭宇將軍名玉潔幼好擊劍負力自憲每覩不平抑挫豪暴同類嚮風良善慕悅聞共和革命之說心焉躍之密結朋友加入同盟既屋清社壯懷未伸困而後學折節自奮迺入軍官學校歛芒淬礪事問字析迄於卒業主者賢之使招其徒還過故里適有暴徒嘯衆逾千踞山跳踉父老患苦將軍率卒百人越經山後得導疾登覆巢殲渠地方以甯其遠洊歷戎行大小百戰躬冒彈雨屢膺前茅強敵畏威士卒懷惠靖國之役勁敵獨當分汛涇陽入閭寒暑當是時全陝苦兵渭河南北幟樹十一省之衆軍匪蹂躪變幻靡常農丁蹙額商民蕩析唯涇陽一隅案堵肅然遐邇歸仁頌聲以作同輩銳進驥附颺馳將軍唯事拊循終不輕舉胡公景翼弘識默契獨以根本重計付之陝軍以集團而東也將軍留任後方忍辱負重推誠結歡似陸遜之屯荊州如羊叔之在襄樊嗣是豫洛克捷魯濟挫衄將軍或倚於西或援於東仗節奔馳靡

役不預迨衆軍西還涇原固守憑城晝夜不解甲泊內訌再起重圍數月岷崗既炎韓
盧宜烹將軍深察機玄事仇爲恥授節別部投効歸國敵廬一櫓先疇半頃子姪乘未妻
妾躬炊意廩如也旣而隻身東遊徜徉京滬適聞濟南被寇國威凌夷招攜同仇憤欲赴
難道出隨棗爲賊所遮以十七年五月某日就義於吳家店年四十四先岳公者四季岳
公以領軍被陷賊平事雪中外昭聞將軍志切禦侮義重殉國生有賢勞歿無卹典父痛
子以卽世孤歸元而無期斯尤可悲也緬維平昔襟契弟胡兄岳股肱手足生死不渝胡
公歿而將軍無所承將軍歿而岳公無所引助兩公旣已託體山河聲華史乘而將軍
遺魂獨未卽安於是部曲吏士患難友朋軫同德于九原鼓長哀于大樹謂宜映發始見
袍澤相與述舊標蹤形言刊石具歛遺甲卽山築墳以永無忘之誼云爾

耿端人少將紀念碑

党元凱撰

耿公諱直字端人陝西澄城十甲溝人也父朗亭公清武舉有勇略公生而穎異讀
書具卓識文有俠氣性果決寡言笑自邑校畢業以清政不綱慨然有澄清之志好習弓
馬尤善射擊辛亥之役追隨先烈宋相臣先生號召健兒與郭堅成馮翊軍於同州郭以
豪俠自命而公則循循一儒者陝局定後入同州教導營軍官連肄業五年袁氏稱帝陸

建章禍陝殘殺黨人公憤起倡義陝北所至響應適胡笠生禽陸承武於富平陸建章獻省城乞和陝局始定公任陝西警備軍分統駐節鳳翔禮賢下士平匪安民旋升陝西警備軍統領移駐省城六年督軍團肇亂陝督陳樹藩應之公派代表赴粵謁孫總理陳陝中情形總理卽以陝事委之遂於六年十月二十七日舉義西安先令岐鳳各部隊分道進攻親率健卒三十人至督署佯作縛解要脅面陳機宜狀意圖乘機刺之不意從卒輕躁誤中副車陳卽時踰垣走遂在西安巷戰兩晝夜以外援愆期衆寡不敵退兵岐山復鏖戰八晝夜旋又率隊東取同蒲是役也公以大計未就奮不顧身每當激戰時親率健卒數陷敵陣竟於六年十二月十三日戰歿於蒲之城東得年二十有三嗚呼大樹千秋英名不朽長安一戰壯志未伸人咸惜之公陣隕之日卽靖國軍張義安在三原舉義之時尤可惜也十二年春葬於澄城縣南四十里之臨高原弟莊亦知兵子生有幼讀澄之人不忘其功因樹碑誌之

高子青師長墓石碑陰記略

榮祥撰

公諱世秀字志清姓高氏祖籍定邊而公則生於寧夏父太茂富甲一方因公爲獨生子鍾愛特甚公自幼任俠好施父悉聽之無少靳當遜滑未造甯屬天主教諸主教司

鐸等多橫暴不法嘗欲強買良家女爲奴有司不加阻且助之爲虐公聞之憤甚夜率游俠少半八九輩襲入教堂盡殺諸主教司鐸明日更襲平羅縣據之未浹旬聚衆至五六萬遂高揭反清大纛於賀蘭山之巔光緒二十二年董福祥將西征以鄉誼招公公亦自念反清時機未熟故中原無響應者乃密散餘衆檢精卒數千隨軍出玉門自是公在董部十年均養晦不肯有所表見蓋欲廣結英賢以待時也辛亥之秋公振臂一呼而寧夏光復繼援西安復擊破升允隴右之師故秦雍革命初基所以不見振於清軍者實惟公力是資焉當是時神州甫復起義諸英豪人爭自貴都督總司令之官銜露布觸目皆是公獨欣然退處率舊部居陝北貧瘠之區逮民國二十一年始以師長休致隱於汾陽之略道河蕭然物外殆將有終焉之志矣盧變既作公挈眷急走渡河從故人鄧將軍寶珊於榆林籌抗日大計前後三年於偵敵宣傳諸大端多所匡益二十九年冬以積勢一病不起遠近聞者莫不同聲歎悼遺孤雖幼然皆聰明必能世其家公享年六十五歲與德配曹夫人合葬於金剛寺墩爰爲撮其生平而表諸其墓云

王寶山碑文

公諱珏字寶山浩然公之子也昆玉五人而公居次三五出繼大四先卒惟公在家

侍奉雙親但家道艱窘未嘗讀書然其天資之高才識之敏超羣邁衆人莫能及也厥後浩然公謝世其母張太孺人治家嚴而有法而公之事母也色養兼備孝敬無間當大夫盛怒時公輒和顏悅色必順其親博其歡心而後已迨後飢饉頻仍口食不給耕芸之暇因與人作工常有鴻鵠之志辛亥鼎革後民國三年公遂入伍從陳軍擊陝西督軍陸建章公以隨營有功蒙擢警備第五營營長駐乾七年編靖國軍第七路總司令駐防美原鎮十三年改編陸軍補充團團長十四年開往豫魯諸省旋以親老辭職歸養林泉以終其身此公能以孝事親以忠報國以明哲保身亦人之所難也茲值公三週之期其子守信守禮均從余遊者也欲樹碑道周丐余爲文余以通家誼遂不辭固陋而略述梗概

慧卿張夫人碑記

張鈞撰

慧卿盧氏長安人幼喪父侍母以居性聰穎貌秀雅眉宇間有奇氣一見卽知爲紅線之流亞也民國紀元前二年適吾友張君聚亭斯時革命潮流日劇烈鈞與同志諸人潛行號召時假期其室爲密秘集議之所每值同人談論之際慧卿輒慷慨激昂相與促成幾忘其爲女子身也以故寄語留密皆賴慧卿周旋之力得免官吏之督察焉嗣聚亭

被人傾陷禁錮長安獄中慧卿典質衣飾竭力營救始獲免武昌首義各省震動陝中同志處滿清吏之下勢若累卵屢瀕於險慧卿爰移居省垣西門外僻巷中避耳目破屋數椽雜乞丐居大府遂不之防由是同人始有集合之所得以規畫進行及舉事期前或勸其遷徙鄉曲以避鋒鏑慧卿慨然曰君等視我爲何如人乎我固遠慕梁嶽近慕秋士思得當以增女界光豈戎馬之是懼行矣勉之君等努力前程屆時當爲諸君作前探少効微勞我以一弱女子人不我防容有濟乎咸壯而義之九月十二日間同人誓師起事省垣城內多砲聲隆隆尸骸遍地慧卿束髮奔走維持地方人多稱之大局稍定勸聚亭曰大丈夫當捨身爲國迅掃北氛休以室家縈懷致累風雲之氣蓋深以古名將相期勛也先是聚亭前室蔣夫人遺丈夫子一名人定時方八齡慧撫如己出無少間言迨聚亭充東路籌餉大使每歸來則舉室雍睦笑言啞啞以故聚亭得專心盡職鮮內顧憂休沐之餘必詳詢陣前情形如何偶發一言動中覈要曰我不幸爲女中弱質弗克共赴前衛衝鋒致果所冀同志諸君奮勇當前以償宿志不負數年來之苦心則慧與有榮焉斯時鈐方轉戰晉豫靈寶縣城兩軍相持三日夜馬上接讀此書倍覺氣爲之壯共相告成慧復謂聚亭曰夙願既償宇內一家念同袍同澤之義我輩其追踪馮陽夏乎無令作滕

薛鹵冷也見鈞卽告曰此役君良苦今得復見亦云幸矣臨離毋苟免成功身不居此非前賢明哲保身之語乎現君等密謀斗室中華得脫專制改國體今政治一新尙復何求斯時矯矯桓桓鬻集如沐咸懷自衛之心聞其言而胥甘退讓受其調停者不一而足一言興邦其慧卿之謂歟鈞駐軍潼關閱十月有餘始克率伍就緒勞來安集乃率眷貨寓會垣轉徙兵間既久一無長物商之於慧卿嗟立辦凡應用之物纖細必具衣履被褥不足者卽以聚亭所有分惠焉曰弟至今仍窮學生時樣耶我爲弟略備之鈞於聚亭爲同姓而交尤摯每相集輒誼如家人無絲毫彼此之分及鈞納次室移新居種種設備慧卿實指示之鈞固無容心也至聚亭家庭事間有不能解決時則邀翔初伯生及鈞諸人來評之無不了者以吾儕與聚亭皆患難相共心性相通故無不可與語者也暇輒攻書手不釋卷如孝經列女傳諸書皆能口誦心維復喜馳馬恆來往於長安市上見之者莫不識其爲有功革命巾幗英雄咸嘖嘖稱道弗衰四年冬慧卿蒞都手持裘衣兩襲一贈翔初一贈鈞曰故舊凋零老夫婦幸免得與二公重相見詎非天幸追述往事悲喜交集適聚亭寓居津門耗費不貲慧身返陝變產助資以作聚亭及其小星日用之需而慧以歷年勞苦參贊戎機隱疾漸伏至是時患不適然以氣體素強未嘗少進參苓也五年春南

中抗義師起警報正急時陝中同志知慧義問聿昭兼善機變多與之謀而慧不動聲色隱爲之力日出入於軍署中酬酢徵逐嬉如常人朝夕左右遂不之疑同志賴以保全者指不勝屈此其才尤足多者也聚亭不善治生得金輒揮去因之祖業蕩然慧至是爲之綱紀家政教育子息部署井井得以小康微慧之力何克臻此今春聚亭書來謂慧卿病甚劇方謂天相吉人當可湯延續命稍享安閒之樂藉酬數年來臂助同人之艱辛何期塵封玉鏡天不假年詎尺素南至云於二月二日撒手西歸念音容之宛在彌愴然而淚下蓋慧之爲人於夫爲義婦對於朋友爲益友其宅心涉世樂善不倦則又類古任俠之所爲其性情忼爽見義勇爲雖鬚眉不及也詩曰溫溫恭人惟德之基又曰慶既令居韓姑燕譽慧卿有焉爰泚筆而爲之記

史君天士紀念碑

溫良儒撰

君諱宏毅字天士世爲扶風閭村人祖厚齋父文卿清邑庠生子三人君其季也君生而穎異自成童卽好讀能研精苦思勵學敦品既畢業縣高更從同里史精誠先生學史號宿儒君既從同學久業益進於六經大義及諸子史要皆能得其涯略後至西安又從前輩郭希仁劉允丞諸先生請益因得備聞當世得失之故乃欣然願投身黨國以從

事革命事業於是走三原入陝西靖國軍胡公笠僧部旋經胡公送入保定孫公禹行部學兵連肄業學術諸科屢冠其曹未畢業胡公卽虛手槍營連長以待之時胡公已爲河南軍務督辦顧其手槍營號難馴然君至帖然如素好能化其桀驁胡公深異焉十四年愍玉琨蠢動豫西連營數百里勢張甚君被命以所部出敵後毀鐵道覆敵列車大獲其輜重敵以是奔潰愍亦竟死以功擢君國民二軍第十混成旅第九營營長其年冬二軍失利魯豫間吳佩孚之衆由鄂寇豫南君奉令警備鄭州迨開封不守君亦返里十五年夏再參加陝西革命軍甄壽珊部任營長風紀敎則爲一軍範十七年五月剿吳山股匪迭克八渡官村大小栗子坪將次至匪巢君指揮進攻間中流彈輦歸診治值西安被圍省西土匪乘機毛起一夕匪至君所住村謀不利於君君知不免竟仰藥死死時年三十一子克明孫岐生君性渾厚有大志遇事能果斷待人誠篤不苟應世接物休休有容死之日家無儋石儲以是人尤痛惜之

自辛亥革命軍興西北人士之死於革命事業者類多英偉傑出之才如君材器造詣如此卓卓而竟蚤夭嗚呼令君得老其才以任國家事其成就固未可量也余與君相友善悲君之遇而才無以見於世又其卒時值三輔多故誌墓文闕茲撮述君平生大略

刊石君墓備來者之覽亦以舒余悲耳

先烈李光輝碑文

王作舟撰

秦軍南路招討使李子明光輝桃林人也幼倜儻不羈弱冠好孫吳家言時叨畫荻之訓久誌涅背之命鐘家板蕩荷戈疆場以戰功升漢南招討使方是蜩蟻羹沸烽煙遍地君以一身作漢南長城荏苒息跡蜀軍懾服漢民頌焉及君鎮漢之次年川軍潛入虎穴坐未罄欬而楚歌四面檣組起劍戟將軍爲國殉身矣一時漢人追君之恩傷君之死彌天風雨共哭將軍乃爲之立祠畫像於其邑俾英靈常昭於萬古

西安革命公園國殤墓碑

馮玉祥撰

昔唐太宗既平羣雄定天下乃詔建義以來交兵之處爲義士勇夫殞身戎陳者各立一寺命虞世南李百藥顏師古朱子奢等爲碑銘紀之今汜水等慈寺長武昭仁寺顏籀朱子奢兩刻穹碑特峙歸德尙存卽其事也夫古之人所謂執干戈衛社稷陳有勇者要不過致身一人効忠一姓耳而功成治定緬彼前勞一追念夫殉國忘身之勇陷堅挫猛之雄洞胸斷脰之形喋血僵尸滿谷墳坑之慘莫不傷痛況乎革命健兒出萬死不顧一生之計深入槍林彈雨之中爲國家爭存亡爲萬衆謀幸福者其可愛可敬可哀可

傷更何如耶前歲西安被圍八月城食盡死者日以千計余命師長孫良誠率師來援士卒奮身肉搏不避險難接戰數十歷時月餘城圍解敵軍傷亡無可統計吾軍之死者蓋五千人矣此五千人皆吾多年訓成之勁旅深知革命宗旨爲國家爲人民而犧牲非爲一人一姓而戰者也一日膏血原野暴骨中路痛也何如因於新城東北隅關地爲革命公園遵公家之典禮聚諸國殤叢葬兩冢並開追悼會三日與會者萬人空巷罔弗咨嗟太息且有泣下者嗚呼諸君可以不死矣敵軍陳亡及民間無主之喪並附葬焉愛敵若友亦仍唐太宗情均彼我思洽同異之旨也會兵事倥傯未遑記述今茲西來更注憑弔日月幾何墓草已宿猶爲傷心乃含淚濡毫以爲記之

岐山城陷殉難將士墓表

失名

客歲八月武昌起義關中響應隴西來和甘軍滋擾鳳郡其間受禍之酷岐山爲最陰歷正月十九日襲據岐城傷亡民軍幾近千人邑城內外合厝四十七塚惟此一塚約葬五百有奇嗚呼亦慘矣哉茲值其相告成大局略定凡我同盟之人從戎之士或策功受賞或長揖歸田均享和平之福獨此千人率多來自田間平時於戰守之法未經習練一旦棄耒耜而執干戈雖未能挫虜凶焰直搗隴西推其起義之誠爲民國捐軀其心孔

嘉其遇亦可悲矣厥後敢死軍統領曹印侯君委參謀袁清軒君爲之建醮東路招討使陳雨亭君親臨致祭又捐銀十兩囑余豎碑表墓余志切從軍而願垂投筆初不識亡者姓氏籍貫特據事直書使後人目覩斯塚藉作紀念云時中華民國元年正月十九日

渭北行團參謀官夢周王公紀念碑

康振邦撰

踞高原之巔涵洛水之秀以學問發爲奇節軼行爲當代之巨擘者其惟吾友夢周王公乎公諱紹德夢周其字吾蒲南鄉店子村人也先世爲邑望族公少讀書遊泮後念諸父劬勞恆謀自立遊幕蜀中歷任知事蔣頌清李晉亭諸公聘爲教讀兼記室事由是實大聲宏而束帛荐賁者踵相接均以親老辭弗就歸而授讀鄉里便定省也常謂爲人子者不可以不知醫故於內難仲景之書尤三致意焉辛亥之役民國初肇苒徃遍地民不聊生公蒿目時艱與今河南督辦岳西峯暨蔣朗亭諸君倡辦民團予亦預焉由是始悉公賢欽慕殊殷而公亦感予之誠互相投契稱莫逆焉厥後岳蔣二君隨胡公笠僧歸戎行予方辦行團於渭北幸得與公同事事無大小悉以委之予惟署名蓋章而已而公夙夜維勤一切井然期月之間商民咸稱頌焉未已復辟作國體驟變中原鼎沸同人激於義憤舉兵東征經山右前鋒不利公竟身殉時倉皇道阻未及歸葬致英魂久淹疆外

悲哉今乃弟文珊跋涉千里負骸歸殯除舉行公葬外爰就平日所知者勒之瑱珉與高原洛水巋然並峙以示永久紀念云爾

張君東白壙記

宋伯魯撰

民國十一年壬戌十二月十日吾友蒲城張東白卒於家年六十有八癸亥二月之初其弟巖罫來言曰吾爲吾兄營壙成葬有日矣願得一言以記之東白通脫浩落不凝滯於萬物與人交坦率無城府而雄於辨難者莫能窮讀書得一第然常困躓而拙於治生雖屢空泊如也善飲弈工山水得籃蜨叟法與荆姚蘇芷衡張季俠相切劘而東白尤宕逸有奇氣尺縑寸楮人爭寶之民國五年嘗一至會城劇談數日夜而別後七年而殉嗚呼吾東白遂不可復見耶吾年已七十數生平知交如吾東白者尙有幾人哉尙有幾人哉嗚呼東白名維寅初娶路氏生女二繼娶許無出再娶章生一子曰曾永年十七穎悟有父風東白爲不死矣其弟卜葬君於縣西南新議堡南新塋癸首丁趾是爲記

蒲城李仲特先生墓志銘

邵力子撰

立國莫先於學救亡莫急於學顧處今之世而言治學則必堅守吾國固有之道德而又輔以革命精神科學方法然後乃有以立世果有特立獨行之士以救國爲己任由

明體而達用則難塞不足患而適以激盪之使底於成清城李先生蓋其人也先生諱異林字仲特性剛毅仁厚天機聰悟而好深湛之思與弟桐軒同富於改革思想自爲師友相愛也幼遭同亂竄卒至負弟跳走得免嘗值歲饑死者塞途日與父席瘞之達數百人鄉里稱善人家貧耕且讀輟作不時年二十一陳茂才設館某邨夜輒獨立田野間按圖觀天象恆星之名五星之位均一一能辨幾死於狼業不輟清末算術在秦中爲絕學柯遜菴學使臨郡試以類羣莫能對先生尋繹得答數而無算式學使異之謂曾習此乎對曰未也不習何以能爾曰思而得之學使益驚歎因爲開示塗澈藝大進當手製測量儀器數十種皆精巧暇則攜其實習曠野間草肄業宏道書院盡交其知名之士未幾應聘陝西輿圖館所製圖稱善本浙江徐季和督學延入幕待以國士出處大節多就商焉比歸僅書一簣均算術科學精本李氏家學仍世茂著先生實肇啓之云陶勤肅督甘延主蘭山書院與陶子拙存談理算拙存謂立方以上畫圖之術窮矣先生則謂三乘方以上各方皆可畫圖因盡畫九乘方廉隅諸圖且以闡明開方之理爲書二卷陝甘布政使岑春煊以罪湘人失入勒肅將劾之先生曰岑雖亢正士也公宜爲國家惜才勤肅素重生遂寢其事旋以親病歸省日侍側矢不出母喪後充省城高等學堂算術教授未幾入

四川鄭叔晉提學幕奉令勘川漢鐵路時清政益紊革命思潮遍全國勢垂發先生仍歸主講席與同志別剏健本學校陰爲西北策源地復以富國必賴實業如西潼鐵路延長油礦北山牧場並盡力提倡雖事有成有不成其成有久有不久然意志強毅盡耗所入無少吝聞者感奮其功爲不可沒革命既成與弟桐軒共遁於禪諸大吏率待以賓禮舉不措意逮靖國軍起某方浼其赴三原調解比至語舉義諸人曰時局混沌中有此一幟革命之曙光也余老矣公等宜爲國自重竟不復命生平行已略近禹墨厚人薄己衣不帛食不肉夏不持筴淡於榮利獨喜科學好著書著有級數比類天地人元泰五卷以明曲線橢圓周率對數諸理皆苦思冥索不屑旁依其天性然也余於清光緒之季教授關中始識先生相與以民族之義灌輸諸生深相得民國廿二年予主陝政訪先生於其家先生耳目皆廢然神志清朗談往事甚歡方冀克永大年不意遽已物化凶聞傳播四方哀悼陝西省政府從衆議請於國民政府以生平事蹟宣付史館立傳先生生於清咸豐八年九月二十五日卒於民國廿五年七月九日春秋七十有九無子以桐軒之子博爲嗣愛之若己出博亦能盡子道博弟協事先生亦如嚴父比歲隴海鐵路西展購地事悉博主之陝水利聞全國涇渭洛諸渠咸協肇畫孫五人賦京醫學博士河南大學醫學院

教授賦都工學博士天津中國第一水工試驗所主任工程師賦林陝西省水利局總務科長賦豐賦鎬孫女三賦蕭賦艾賦蕙均就學中蓋其一門無不治學者先生之遺澤長矣其年十月五日葬於富原村北祖塋子阡午向博協請銘於予銘曰國有與立學爲先學不周用耕石田科學梯磴疇人篇十載而壁窮鑽研鼓吹更化調琴絃功成寂落一蒲團世網久緼思高騫淨土視我舌如蓮

臨潼郭希仁先生墓誌銘 并敘

劉鎮華撰

夫一介書生手無尺寸枋挾其忠義奮發之氣奔走諸將率問危言曲譬激其愛鄉之心隱消無窮之患而恬憺自居未嘗以之矜標此非平生學道有得知之明而守之定未有能善其始終者也當辛亥改革張將軍翔初夙欽希仁先生學術延之幕府傾心委任倉卒中一切用人行政多就取決當是時新軍初發難民兵應之羣雄虎視各樹旗幟不相下而市塢土豪雜廁其間城內洶洶砲聲不絕衣冠之士皆相戒不敢出先生不避艱險以桑梓安危自任請於將軍起用新舊紳耆肅號令戢姦譴擇尤悍戾者懲之於是材官蹶張徐就銜勒而長安菁華所萃卒以保全先生之力爲多先生砥廉隅寡言笑設施宏大動稱禮法學兼漢宋旁及今之科學守舊者詆爲駁雜喜新者薄爲迂疏疑謗紛

乘事多尼沮先生知不可留遂稱疾以去初先生慨清末積弊之深舉凡地方軍民利病悉心規畫思有以革新而樹立之使其久處帷幄其贊助之益甯有既極而卒不克行其志此先生之所深痛也先生既去薄遊歐西各國歸則聚徒講學於華山之麓民國五年出爲禁煙局坐辦明年充水利分局局長兼林務專員及靖國軍起渭北偕南君右嵩往挺解屢瀕於危鎮華長陝薦代教育廳長兼水利林務如故先生博學凡教育水利農林皆研求有得而綜覈名實勇於爲義苟事之有裨於教不必責任所在輒竭心力以圖之以故歷年長教育會孔教會紅十字會設音學研究所國學講習所國語傳習所通俗圖書館暨修孔廟肇畫奔走終歲無寧晷及疾作先後辭去本兼各職而以廉俸三千餘元捐助教育及慈善事業病中猶伏枕著述迨平見書成而後卒年才四十三民國十二年九月二十一日也悲夫人之云亡邦國殄瘁余與希仁交久余聞希仁余又爲人才消長憂也希仁初名忠清後以字行癸卯舉人曾祖秉高妣任氏祖翰興妣劉氏父安義篤信好義稱善鄉里妣王氏蚤卒娶孫氏子二繼亥辛亥方就傅女子三長適同邑張生餘均幼是歲六月六日葬於縣之田市鎮郭村生平著書頗多版行者十數種嗚呼所謂能自傳於後者非歟銘曰天門渭貫地市躡旋篤生郭子鳳兮高騫恫癯在抱道義是肩茹舍

今古誘迪英賢龍蛇起陸力挽狂瀾戢兵禁暴關輔晏然如何昊天降割不延吾民奚託
吾道孰傳我銘斯石反袂涕漣後有作者其眎此阡

國民政府委員劉君墓志銘

張繼撰

君諱守中字允丞富平人也先世居到賢鎮明初遷鹵泊灘南柏玉村以訖於今代
章令德曾祖大賢公妣馬氏祖世端公妣李氏考仲貞公雅有儒操妣韓孺人生丈夫子
五君其叔也髫年穎悟有若成人家近八公原故金宋鑒兵於此君憑吊往跡慨然興懷
稍長讀書清麓卽密結當世豪傑之士同盟會立遂加盟焉歲辛亥義師起武昌關右響
應君預其謀功成不居避跡燕趙迨袁氏僭帝使陸建章爲陝西將軍肆其爪牙多所殘
害胡景翼岳維峻用君之策卒獲剪除護法之役景翼樹幟渭北號靖國軍亦奉君爲謀
主其後胡部改編君走上海值曹錕當國機德日章 總理孫公授君方略說馮玉祥孫
岳舉兵迴指旋以肅清端木之辨曲逆之謀君蓋兼之已而 總理告殂景翼不祿維峻
繼督河南軍務邀君贊襄兵潰崑函暫遭幽繫此由轉運匱乏將士不習有以致之非君
之咎也民國十六年奠都南京翌年任君爲國民黨第二屆中央執行委員並選任國民
政府委員又數年日本乘我不虞侵據東北君以爲善守疆圉非可託諸空言乃兩入

蒙古周懋各盟旗見諸部落有經始墾殖丕變舊風者力贊助之記其考察所得約二十餘萬言時政府措施百端未遑暇也歸息故里不忘舊勳先後創立陝西革命先烈撫卹委員會暨華麓先烈祠墓造林董事會二十六年七月蘆溝橋變起中樞詔君視察黃河沿線防務因建議關中奧區不可輕棄當道建之遂定守河保關之策繇是轉戰八年關隴屹然爲西川屏障君之識偉矣退居三原閉戶著述成績漢書郡國志補注北方學者自顏習齋李二曲皆重躬行君慕其爲人踐履篤實每遊山川必詳其阨塞險要又嘗主兵工農合一之說言皆有用不尙華辭性嚴毅而樂獎借後進故士多親附事有糾紛難理者得君一言靡不心服職於平生師友最嚴憚君而談讌之歡亦若家人父子三十年夏道由三原要君過長安市會同盟故舊觴杓既傾意氣猶昔不意君歸後冒疾猝發遂以十月二十三日卒於三原春秋六十一邦國殄瘁吁其哀已配王夫人子二奉學玉衡女子子三慧貞桃貞菊貞孫男二澧宇澍宇三十一年 月 日葬君於華陰華麓先烈墓地繼爲之銘銘曰瞭山川之形勢兮實比跡於寧人服顏李之治學兮又彊繼以律身當玄黃之始造兮後人孰知其艱辛國威替而召寇兮用君之謀決勝於帷幄告九州之既同兮靈庶幾其瞑目

王故監察使陸一墓志銘

于右任撰

王君陸一原名天士三原北秦堡人父仁山公服官四川青神縣母羅氏君生於青神八九歲卽能詩十四歲歸西安日或一食苦學不輟入西北大學法科貧不能續業就陝西圖書管理員博覽書籍學益進討袁之役隨各志士謀起義西安事洩王紹文等十餘人遇難君避三原靖國軍起予見其文異之擢爲祕書十一年同予由隴南道蜀赴滬任上海執行部祕書中央派生留學蘇聯君與妹秀清與焉國民軍解西安之圍歸國任辦公廳主任十七年任中央黨部書記長總理奉安時徵哀詞應者數百人而君膺選嗣任安徽大學文學院院長二十年當選中央候補執行委員同予奉命赴粵旋代民衆運動指導委會務努力勞資協作二十二年復奉派隨張溥泉先生赴粵歸京籌設法政學院並任監察院祕書長二十四年當選中央執行委員兼民衆訓練部副部長二十八年奉派爲軍風紀巡察團委員三十年特派爲山西陝西監察使君富情感擅文學以文學溝通社會科學發爲詩文鏗裁無間留蘇時凡其建國設計與執行方法靡不深切留思與同學往還多注意爲黨儲才忠黨愛國之心不懼不悶之氣亦養之愈厚抗戰軍興熱情奔注所寫亂離戰歌感激精微識者尤爲稱尙初君奉監使之命以秦晉災患頻

仍力謀澄清吏治扶疾登程寒暑弗懈病甚不日知也卒於三十二年十月二十日享年四十有七國民政府明令褒揚以彰忠靈元配淳化于淑賢鶴九先生之女也繼配周沛霖淑慎有德女芷來其年十二月十八日安葬於涇陽廣吉鎮君註右任詩存多存靖國軍文獻並有詩文集若干卷乃爲銘曰萬族咸熙雄文苦戰發此宏聲維圖宿願斗口村之北北秦堡之西是君之安宅而爲仁人志士之所懽懷吾之願兮生死無揆

革命先烈胡定伯先生墓志銘

郭希仁撰

胡君應文一名靜字定伯秦之耀縣人生賦俠姿性慷慨尙氣節少讀書好習政治家言未弱冠卽悉世界大勢慕孫中山先生之爲人喜談革命深以滿清科名爲可恥入學後不復圖進取棄而就商業焉顧未嘗一日忘素志潛購革命諸書以日間居肆交際繁不便觀覽於夜隙匿燈於衾讀之嘗閱卷未終憤激切齒周夜徬徨恨不能急起革命軍建造新國家然念陝西僻處邊陲風氣晚開同志寥寥欲大事鼓吹則限於境地不得善策又恨清吏捕黨人嚴都人士亦多未解革命主旨漫與道說必至羣相驚愕以不密敗事而家庭間又諸多爲難恆隱憂於心神志若失其父耀庭公覺而詰之君以實對耀庭公曰中國積弱由滿州失政不急抑除行將爲亡國之奴自歎老無能爲汝肯爲國

効力余心甚願但當一往直前以傳名史冊勿以身家性命爲慮由是內無掛礙立志愈堅竊向幼時諸同學演說其事和者漸衆君傾心待遇情逾骨肉始終不逾遐邇聞其名故同志之至其家者踵相接也同郡宋君元愷留學日本主張革命與君契得紹介注同盟會藉自後凡關於陝北運動皆君是屬以耀州城所設肄定爲北部機關庚戌夏井勿幕鄒子良諸君密商擇地於耀州北廟灣設一牧羊場次年又在宜君縣之姚村鎮開設鐵廠聯絡河北一帶刀俠爲舉事預備壹皆君是主辛亥八月武漢義師起省垣首先響應君聞知卽與井鄒諸君率健兒數百建義旗於州東五臺山一呼集數千人軍中供給皆君任籌備嗣秦軍府任井勿幕爲北路安撫招討使設司令部於三原編防禦五營任君爲指揮並管籌餉事部署初定井軍率師援晉加以毅軍甘軍東西夾攻省垣軍隊盡臨前敵北路空虛軍府任君爲北山民團使時土匪所在蠢起乘勢劫掠鄉里蹙然君督率鄉團與各屬知事團紳聯絡密擒著尤土匪斬首示衆更募行團一如陸軍營制精心教練駐紮耀同並金鎖關等處地賴以安全計自提倡革命迄於共和告成就中如開會結社之需費同志往來之饋贈起義後軍餉之捐輸辦團時公項之賠墊均費不貲君家固不甚豐而能如此人有稱之者君曰今且置生死於不顧何論夫財產其豪邁如此民

國元年七月權知同官縣事同官當反正時遭土匪盤踞人民逃避一空厥後時有匪黨造謠煽惑搶劫百姓驚恐不敢歸家安業君蒞任後以招集流亡爲急務一面查拏土匪一面開導鄉愚人民聞風回城不一月間商肆於市農耕於野其餘如修城垣築河堤整頓學校籌備警察無不次第舉辦正任五閱月地方秩序井然十一月交卸同官事二年八月署洵陽縣知事十一月十四日鳳翔變兵竄南山過境攻城刼殺君倉卒聞變卽督率團警登城守禦相持數小時卒以力單械鈍不敵於北城中彈溺水死越三日始由縣東十里許之深潭尋獲屍軀嗚呼慘矣嗟夫中國數千年民無教育充兵者尤多無識子反正後益加驕橫乘機輒謀暴動統馭者弗亟思教練約束安置之法致兵變時見掠闔里戕縣官使君不死於運動革命之際東西戰爭之時而死於共和告成之後知君以重爲悲痛也曾祖虞印祖增春父振烈母楊氏妻劉氏子二正修正身距生於清光緒十三年五月十七日民國二年十月十五日殉難時年二十八於三年三月二十六日返柩歸葬於耀縣東郊藥王山前墓塋卯山西向臨潼郭希仁爲揮淚而誌墓石並綴以銘

芸芸衆生身家是計草木同榮蜉蝣同死佼佼胡子識解燭卓舍命奔走毀家爲國修短有數夭壽不齊暴兵爲變倉卒捐軀英魂凜凜阿護國民俠骨瘞此敢告後人

彭君墓志銘

沈尹默造文

君諱世安字仲翔先世爲福建侯官人父履中曾仕於陝之白水樂其土厚淳質遂占籍焉君少孤家貧孝母友弟恭已愛人有聞於鄉里稍長志學彌自刻勵逮亡清甲午敗北網紀益紊君居恆慨然有澄清天下之志及冠遂入省立講武堂會陝西留日學生歸國密有所圖設同盟分會君以軍人首與其謀後更入保定陸軍學校潛心蓄志多所接納辛亥秋京師會閱新軍君爲陝軍代表未幾武昌義師起四方響應清廷捕黨人甚亟君日在危疑中卒間道得歸時長安民軍已立都督府羣推君爲府中參謀長運籌却敵陝省獲全迨民國初定而袁世凱爲總統君逆知其陰賊必覆民國之基謂宜羣相警惕戒備而衆多見以爲迂闊不中情實已而袁氏果稱帝人始服其明鑑而君憤然以不獲抗帝制棄職去歸里時白水多匪患君招撫之編爲保衛軍一境寧敕五年春討袁軍起君卽率其保衛軍應之自袁氏喪亡後君駸駸爲陝軍重鎮而嫉之者日益甚君素坦率不樂與人爭權利遂杜門謝客研精典冊於社會諸問題尤所致意焉中間陝西數易督皆與北洋系連以誅除民黨戰禍遂相仍君乃復出佐靖國軍事靖國軍者君之友人民黨于右任氏所統率以抗北廷者也後靖國軍變遷君隻身出關久乃得歸十三年冬

國民軍起討曹錕君爲富平駐軍旅長馮子明邀與偕行出師潼關共建大業道過華陰與鎮嵩軍戰鎮嵩軍請和君爲使不虞其詐既至乃爲敵所害享年四十三歲妻王競秋女毓華毓恆毓泰弟世廉世銘皆任軍職姪啓文啓亞姪女毓衡毓崧啓明潤馨君久在師旅而耽習文藝閒居吟詠流播一時且明於立國之道首在隆教育興實業鴻圖莫遂賁志以歿國人惜之銘曰

維中華民國十四年一月十七日之佳辰奠我舅氏於省垣東北之三輔窪嗚呼千秋萬歲而下知此國士彭先生之墓

張義安墓誌銘

章炳麟造文

陝西諸將最犖犖有名者井勿幕也自勿幕爲姦人襲殺陝西氣大衰後聞胡景翼部將張義安者善以少擊衆數用奇似宋時狄武襄亦以戰歿二子者蓋皆嘗及余門勿幕死余爲之誌義安死其可以勿書義安者少以庸貨入新軍退伍入正誼書院直武昌兵起陝西應之義安從李仲三守韓郃虜逼潼關主帥敗入南山義安率三百人當虜六營度河入山西鳳皇嘴夾河以大砲擊虜不敢犯故潼關得完民國五年袁世凱稱帝陝西義師起渭北品類彪奇義安與同志結義俠保民社以訓將士軍紀爲渭北最遂同

胡景翼攻陝西都督陸建章擒其子承武陝西平復從景翼肄兵時軍實匱有朽銃二十挺耳乃曰吾鍊其心何患無兵仗也治軍不尚華飭尤惡官長下比與士很鷙不用命者先後應募幾六百人留者才百二十人信賞必罰以背嵬軍自擬嘗分遣軍士赴壩橋折柳士或苛民錢後悔歸誠義安義安予銀三兩以勸悔罪者士心大安六年陳樹藩反日招延羣盜義安率一連東西游擊破盜窟十餘所嘗在下邽士以盜所賂財獻令盡投急流中曰取盜財是亦盜也士或取民一鍼一縷必立誅無貸者景翼決建靖國軍置幕府三原以義安守義安日夜纂嚴以其閒吹簫賦詩遊觀校舍督役夫治道路其整暇如此樹藩令旅長曾繼賢團長嚴錫龍來逼三原義安兵不滿二百錫龍繼賢治裝爲欲去狀而日運黃土積巷口七年一月二十四日夜大雪義安分部將士前行皆莫知其所以夜半雪大甚有爆彈自繼賢旅部發少頃所遣將士已據譙門徼巡者皆就獲繼賢錫龍挺身走黎且將士往朝義安義安方與軍佐指畫史書部護兵婦門外積雪若無事然者良久出所畫圖示將士凡敵軍所處地與其晏游之所及我軍進攻道分布白黑細若織網然衆乃知所以勝自景翼入三原稱靖國軍各軍爭爲雄義安奮曰不爭於疆易爲丈夫羞難自我發我當先討賊以謝國人欲徑率所部三百人趣長安賊以兩旅復逼涇陽

三原諸將請義安固守義安曰樹藩氣浮而謀短傾城來攻吾直造長安城下可以得志
卽行次興平度渭抵甘家砦壘未就賊以三營來攻迎擊大破之賊復以八營來環義安
師三面如堵牆師大瘡士或椎胸哭夜晦義安選壯士二十餘人分三隊周走大呼賊驚
自相擊義安乃輿傷兵潛退直援兵兩營至復進迫長安城屯大營盤及大小雁塔賊不
敢出然兵勞彈亦盡復退屯仁村時曾繼賢將樊醒民閻錫民等列營魚化木塔隱家甘
家四砦爲長安腴蔽義安乘雪連行廿餘里到甘家砦卽乘闖入之聞樹藩疑樊閻膽書
招焉樊閻皆率部降復進兵攻長安七日兇懼南城守兵謀內應未發樹藩陽乞和景翼
景翼遽令義安還師遂退屯鄠樹藩復悉精來攻三月十三日義安出戰歿於陣八年四
月主帥列上其事于軍政府贈陸軍中將自義安死義軍與賊更爲雌雄然以渭北數縣
富賊全部裹創繕塢懸二歲不攜者其餘烈存也惜乎義安處勢甚微又早夭不能盡其
略不然其與古之人何遠哉義安名養誠富平縣人也死時年三十一矣銘曰

關中出將古所聞降逮叔世泯以禁列宿日薄光初惇猛將上應南宮鵠掃盪天機
哀周秦誓師涇渭嚴不途竈上掃除千甄軍一死可以廉頑嚚

董少將振五墓誌銘

于右任撰

君諱威字振五扶風董氏幼入邑校成績多不如人性嚴整時危坐如木偶辛亥陝西革命軍起臨潼曹印侯募敢死隊三千人駐鳳翔防邊遇君奇之留置幕中歲將終曹適病部下又交鬪敵軍乘之彈集病室君慷慨登城痛陳大義執反側者手戮之隨呼衆距躍而下奮擊二十餘里殪敵三百餘軍威遂震說者曰是役無君民軍無鳳翔矣至是人爭識董振五民國既奠曹解兵柄遨遊東南會贛寧戰起被陷入武昌獄君時在龍門急趨營救視曹脫於難乃辭歸未幾曹病歿西河復往迎櫬歸葬華下遂謝世事讀書華山之麓當袁氏帝謀未著時先有事於陝西而京畿軍政執法處處長國人呼爲屠伯之陸建章遂迎合而得督陝及籌安會起陝人私語遂鹿陸聞而惡之殺戮日甚逮捕者獄爲之滿君斯時遂投筆而爲祕密運動陸建章之子曰承武有衆一旅爲其中堅君初欲發難延榆連合晉北民黨誘承武深入而殲之嗣以計緩而難必乃與李君岐山約李經營西安而以奪三原駐軍槍械自任詎省中謀洩同去身殉者二十餘人陸使岳西峯捕君岳陰縱而陽索之故得免翌日卽僞爲賣菜傭入探陽糾集健者炸燬營房殲守兵而奪其械遂轉戰河北所向無敵當者先後計奪得快鎗五百餘是時河北民黨已雲起胡笠僧虜陸承武於富平君又下醴泉圍咸陽以規西安陸氣沮乃與陳樹藩議和獻省城

以贖愛子陝事遂定君曰吾書生也不習兵且此時擁兵奚爲也乃散其衆復歸華下苦讀而學益進斯時繼陸督陝者爲陳樹藩吾敍至此則欲爲陝民黨一辨其誣逐陸之役民軍多新募者且莫能相一而陳氏重兵在握觀變久不擁之則爲敵擁之則猶冀其向善故不得已而出此及陳氏縱匪殃民亂陝禍國民黨絕望先後雖有起而聲討者但力薄未能制其命維時西南靖國軍已興陝西勁兵以胡笠僧之第二團爲最君與有舊往隸胡部與張義安鄧寶珊謀響應於三原陳氏素知君並知張鄧亦民黨健者疑之乃遣旅長曾某團長嚴某駐原暗中監視惟料張義安快槍僅百餘雖有君與鄧亦不敢動義安之爲人知人善任沉勇有大略而君則能謀且精詳凡義安之計畫不及者君皆早爲布置所有曾嚴兩部某軍官宅某處賭某處某營連軍實幾何皆一一列某巷可伏兵若干某街可穴進攻皆爲圖以說明時已七年一月民黨來往三原者絡繹風聲愈急陳氏防之愈嚴而嚴又係積年悍匪陳每利用之以殘党人對於胡部詬誶日甚及廿六日夜天大雪義安各個命令下後君自帶數人出其不意設疑兵先佔據鐘樓斷交通又僞爲曾嚴部之巡城者賺取四門卽以炸彈攻其旅團部曾嚴張皇失措及聞四門失乃死抵巷戰一日兩夜死傷不支縋河而遁適曹俊夫君自耀縣來援逆衆二千餘遂繳械降

自是陝西靖國軍之旗幟益明君乃偕義安等由興平進取西安無戰不捷進駐慈恩寺及西關大營盤日夜設疑環攻陳氏困圍城中四十餘日將遁而鎮嵩軍入援義安陣亡胡笠僧慮其兵單有失嚴令旋軍文書日十數至乃護義安遺櫬以歸隨接義安部爲先鋒營營長自義安逝後靖國軍退守河北其年六月張君伯英由南路余由北路間道入陝余每聞人言有振五則義安不死又曰振五有膽略有主義可爲良將自余任事後君以所部解完白圍敗敵交口援關山取田市所向披靡敵望見麾幟卽却大軍所至人民組織如恆九月伯英驅舊部自商山出下藍田攻零口以圖肅清東路與河北軍會君與岳西峯奪渡濟渭中流交綏敵冒壘而陣於南岸者甚衆悉破之長驅攻馬駒寨馬駒寨者通零口之要衝小堡密佈地形如箕敵人用重兵守之戰三日夜仰攻側襲悉覆其巢敵之悍隊是役盡殲會胡笠僧入故市撫降被拘各軍大震樹藩以舊誼貽君書謂汝如釋兵予卽釋胡君覆書曰大丈夫以身任天下事不以一人之私怨破壞大局亦不能以一人之私恩背棄公理立生去則去耳其入故市也吾不贊成故其被拘也亦不補救願祝彼爲關岳文史早就千秋亦願彼祝吾爲起剪頗牧縱橫一世此時此地請無多言見於疆場可耳陳卒不敢出而河北以安十月隨井總指揮勿幕岳君西峯進攻興平城將

下而勿幕遇難乃整師回原當時我軍在西路者下鑿屋略定鳳翔滇軍分駐鳳岐會攻長安之聲震北廷北廷用遠交近攻之策陽託議和而潛軍入陝陳氏得援遂約奉軍鎮嵩軍肆全力於我主客各軍戰於武功鑿屋間者兩閱月君率所部同鄧寶珊與馮子明楊虎城各軍援武以救鑿屋奉軍遇於武功東北之大王村摩敵壘而陣敵三面環攻因令軍中五十步內乃開始射擊敵誤爲怯猛進死者甚衆方戰之殷君擬出奇兵剿敵後路屹立陣前指授方略忽飛彈中目士氣奮激出壕猛攻及敵退而君亦殞時八年一月二十七日也嗚乎痛哉君得年廿有六其年四月上其狀於軍政府追贈陸軍少將當出征前數日各軍爲張義安開追悼會君每念及義安輒流涕因手爲文以祭之其詞曰痛將星之沉壘兮忽歲鑰之將更稽國賊之誅戮兮恨夙願之莫成魂魄毅爲鬼雄兮身雖死而神靈維招魂之有地兮率舊部而薦牲澗義旗之始計兮收焦穫而整車獨仗義而南征兮牛酒遍乎閭閻徂桃園而會戰兮士爭先驅血戰三日兮械廢彈虛手短兵以相接兮殲逆軍之梟渠蒲陽圍急而返旆兮防後路之或疏旋進軍於仁里兮冒雪奮邁急裝突進兮襲破甘寨三戰及於長安兮逆督窘憊薄塹墮而樵採俱斷兮軍中稱快尋豫軍之入關兮敵乞和而停戰兄返原而定謀兮弟屯軍於鄠縣詎陳劉之反覆兮潛重兵

而來犯兄星夜以馳援兮驚迅速之若電急分軍而應戰兮當敵軍之八面忽偏師兮少却卽拊膺兮深恥奮身兮進擊敵壘兮尺咫竟飲彈而捐軀兮知蠶蠶之有毒豈窮寇之勿追兮信兵書其可讀嗚乎痛哉天日沉陰兮笳鼓不競軍失主帥兮驚惶莫定衆情推戴兮委以兵柄三辭不獲兮涕泣受命旋東防之告警兮躬擐甲而先行趨關山而大戰兮振義旅之威聲破權家洛家之兩寨兮敵自踐而尸橫渡渭橋而攻馬駒寨兮驅草木皆若兵恨立生之失計兮陷故市而不返致全局之大震兮人心危如累卵旋井軍之來歸兮喜相逢之未晚復援軍至自滇南兮卜成功其弗遠夫何興平一役兮變出非常旋師茹痛兮息民池陽撫時感事兮念懷國殤嗚乎痛哉旌旗兮蔽天骸骨兮遍地寇讎兮方張部曲兮罔異惟英靈其式憑兮敢生死而有貳雖無宣子之才能兮願率伯游之後事余每讀此文輒思君更思義安之爲人故載於此君父名興利前以事見余余詢其家世及生計曰余家世業農余四子長卽威威妻呂氏女一威陣亡後數日余次子爲匪所殺次助余耕幼子嚴尙讀也又曰余勤力耕種足以自給不願舊愛兒者之助我我累兒於地下也民國九年三月九日同人議葬君於法門寺東七里之白龍壇因理石使余誌之並爲銘以哭銘曰

勿幕不獨文義安不獨武後起之英厥惟振五大雪漫漫周原臚臚遺恨難忘河山
金鼓大王村之血白龍壇之廡關西壺漿之遺民渭北薪膽之舊部祝英靈兮歸來問來
歸兮否否水火深矣哀哀三輔碧血青山皇天后土

附岳西峯手書哭振五詩二首

羣盜縱橫遍九垓龍城將渺如煙三更鞞鼓千行淚萬里河山一着鞭大地風雲
無定日至今肝膽憶忘年逃琨奇士今何在班馬勳名並世傳

豪氣崢嶸憶舊遊鷄鳴夜半舞吳鉤軍前馳驟憑虜將帳下聲威賴虎頭尙有豺狼
橫大楚恨無鷹隼擊高秋何時得遂澄清志百二河山次第收

彭君季強墓誌銘

張贊元撰

亡友彭公仲翔既葬之三月其弟季強復殉難河南贊元既哭而弔之其妻劉純一
持狀來曰季強雅重子宜爲之銘贊元不文然不能辭也君諱世銘季強其字也陝西白
水縣人少英敏有大志甫成童以兄命肄業陝西陸軍小學校時清政不綱君陰結同學
謀改革辛亥歲九月陝西革命軍起君與同學趨軍械庫分配彈藥奮力殺敵而身亦被
重創失兩指既數月共和告成君喜兵革之將息建設之方殷乃東渡日本入明治大學

習政治民國七年歸國時護法軍興南北分裂陝靖國軍方舉義旗於渭北君同關至爲之盡力嘗奉命購軍械於天津能以智計應付不受詐欺於外人後復隨陝軍出關十四年冬國民軍攻天津君身與其役天津既下被任爲保安司令獲兄仲翔公讎手刃之義聲震津沽初仲翔公之殉難華下也鎮嵩軍旅長馬瑞旺實陰主之君時在關外聞之憤不欲生然大讎未復乃結客陰謀報之猝不可得及天津既下鎮嵩軍復敗於豫西馬瑞旺時潛家居津蓋奉劉鎮華之命欲聯奉以謀我君值悉喜告其客因此天授我以仇並爲國除賊也卽率壯士數人趨其住所摔而擒獲之納諸汽車歸而囚之當是時馬之家謀以金三十萬元爲贖君泣語其人曰兄讎義不俱生且國賊也必不可卒致之法明年鎮嵩軍圍西安自春徂冬城中食盡死傷枕藉幾於不守矣君奔走崎嶇數千里趨援圍解受命任長安縣長是時大軍雲集流亡遍野君於軍旅之供給災民之賑卹其他地方庶政咸泛應曲當軍民頌之在任半載以疾乞休養營兄仲翔公葬事盡其力能旋馬克齋師長聘主帷幄君應召卽起抵軍數月銳意整飭爲反側子所嫉竟與馬克齋師長杜延五團長同遇害於盧氏時十六年九月四日也君容貌和易溫然可親遇事有剛斷無纖毫濡忍之態與人交輕財重義然諾必信其在家孝友慈祥幼孤育於母兄愛之不

稍拂其意然不以愛生驕卒能有成皇考履中府君死時君生時匝月母夫人黃氏今猶在堂也君兄弟三人長仲翔公殉難華陰蒙公葬者也次叔泉稱善士君其季也君元配吳氏繼配劉氏子二啓文啓亞女一啓明遺腹子一猶未舉也享年三十有三以十七年二月十六日葬於省城東北五里之三府窪從其兄居也乃爲銘曰英英季強果毅溫良襟懷月朗肝胆風霜爰在弱冠習戎講武辛亥之役奮我師旅治劇理紛人莫予侮手刃兄讎克媲先古及其從政知所緩急民歌其德軍儲不失方年始立國亂孔殷如何丁茲而殞斯人三輔之寃忠義之穴雙墳峙者兄耶弟耶

田將軍潤初墓誌

田將軍玉潔字潤初世爲富平縣尹家村農八歲入塾能彊記妣緱氏父晉昇以君天性近俠聽習技擊初從井勿幕劉守中事同盟會清政既革乃折節勵學與胡景翼岳維峻等偕入講武堂卒業白狼之亂有暴徒聚衆千餘踞富平縣北月窟山謀響應君適承命歸里募兵即帥所募百餘人經山後奮險覆賊巢擒斬其渠口不言功時論多之陸建章在陝爲袁氏偃陳師渭北搜捕革命黨人景翼設伏富平擒其統將逐陸去始遷君爲營長逾年警備軍叛據岐山景翼使君追擊浚日出不意襲城拔之敵驚神速聞風潰

靡由是每戰君輒當前矛維峻爲後勁無不克濟景翼嘗謂人曰西峯潤初吾左右手也六年護法軍興陝西戴景翼爲總司令號靖國軍遙應東南君駐涇陽敵騎不敢犯境流亡返業涇民祠之至今景翼督豫君以第三師師長留陝兼渭北剿匪總司令岳繼胡任調駐洛陽國民軍劔於山東維峻急檄君赴兗州節制諸軍已不及事而還十五年涇原之守與西安同困者二百日事定以君勞任國民聯軍第十一軍軍長既而急難寒盟閼牆驟發君通電有云躬事革命二十年大小戰鬪百餘次爲功爲罪唯民可質不圖烏盡弓藏復見今日顧父老苦兵久矣不忍以我一人故致渭北軍民重深水火卽日以全軍授人子身南遊十七年國民政府出師北伐至濟南爲日寇橫梗君憤甚時維峻再起治軍襄樊乃往聯結赴難途出棗陽爲共匪所陷百計誘降不屈遇害春秋四十四配王夫人十輩遣使求元不獲乃於二十二年三月招魂返葬華山之陰生死交情禮緣義起要離烈士旁人猶近以梁墳盤屋先賢雄鬼何心於齒塚庶千載之後談革命者知有斯人也同里景志伊綜其平生爲之系曰

世之快心革命一若舉往者胥可掃地以盡君獨先求其必不可因此其所以異乎人今者革命尙未成功而其亡之痛中心慄慄斯撫塚也恨難雪於樟樹之舉魂猶附於

梅花之嶺

陝西革命殉難軍民合冢銘

劉郁芬撰

蓋聞招魂之作導源國殤紀烈之文揚輝京觀誠以疆場憑弔長諸鬼哭之聲金石流傳壯采作軍行之氣英口穀口昭示來茲正待摩崖敢辭濡筆粵自重瀛互市大陸交通番舶縱橫競錐刀之利中邦寬大尙槃敦之儀清運將終國威漸替朔宇之風不競海水之波遂揚虎視鷹瞵列強一致瓜分豆剖衆議紛騰歲幣增輸輿圖改色債台山嶺人將署券爲奴門戶洞開賓輒喧堂奪主茫茫夏土岌岌神州黃帝有靈中山崛起創三民之主義謀五族之共和爰樹旌旗勝朝屈服誓驅蛇豕羣狄張皇日返虞淵豈虞復墜雷駭震日何遽重瘡乃天未厭亂人實無良帝制自爲召羣雄之割據元兇就殄貽餘孽之披猖甘犬噬於強鄰扼四百兆同胞之吭遏龍興於祖國耗一十五週歲之期維我國民軍始終不渝奮鬪罔懈誓清河朔分□□泥未丸封矢偏雨集綠林青犢之部并騁咸陽黑山白馬之渠驛馮翊金鼓聞於長樂烽火逼於甘泉十道環攻一城孤峙紙鷲信香檣馬聲哀易子析骸國人大口鑿壕增壘士卒俱疲卒因衆志能堅一任寇氣甚惡心未攻而不下頭有斷而無降死者達數萬人曆時凡八閱月援師既聚醜類猶橫肉薄

爭鋒華嶽之雲如墨血流漂杵渭河之水皆殷雖順逆之理勝負終分奈挺刃之交傷亡枕藉以視漸臺構禍天寶罹災殆有過之吁其酷矣會有東南義旅戡定江淮西北雄鷹削平關隴中原豪傑相率來歸遼左凶頑行將撲滅邦家再造旦暮可期國有人焉海嶠之諸夷盡懾死猶生也沙場之雄鬼奚悲然而殲殄塞途殘骸盈野口哀邱之下築口淨域之難登無定河邊易惹春閨夢噩祁連冢畔且令往哲魂驚我總司令馮公矜裹尸之壯宏掩骸之仁躬督三軍累成大壙刑牲致祭繡虎徵文永奠重泉用鐫元石嗚呼白骨口成增百二關河之色紅羊劫盡譜三千世界之詞銘口陰陽闢闔物競斯生圓顱方趾并用五行一朝構釁金鉄口鳴人誰不死殉國斯榮嗟予禹域世守文明有清末葉坐召外兵輸金割地城下尋盟天生英傑革命倡聲黃花岡上埋骨崢嶸共和肇造條忽內訌此疆何界東戰西征車麟馴鉄秦俗錚錚尸如山積卒保咸京元戎繼至淚湧心傾收藏烈魄并峙羊城萬人之冢千載之型

陝西靖國軍總指揮井君勿幕事略

君諱勿幕字勿幕蒲城人也家世以豪俠著君少時嬉戲卽不與衆同年十四棄家去抵其父客某於蜀時蜀中新學已萌芽父客從事興學君雖年少亦思多讀書爲立身

計見古名將諸傳記卽思彷彿其爲人又默察世界大勢以爲古不可行於今變古易俗當去所短采所長乃謝其父客以數金冒險從蜀人士赴日本至則孫中山以民族主義倡言革命方由美入日留學生數千和之君曰國亡數百年矣乃今覺悟而不卽圖亦吾青年之恥也棄學歸潛招同志謀發難往返二次不得聞其後黃克強謀舉於廣州事洩同志死者七十有二人卽世所稱黃花岡烈士者也君由陝赴之不及故得免於難未幾復返陝與同志潛通軍隊思繼廣州而起謀就隻身走北山欲同時並舉以促其成時辛亥六七月矣尅期未至而武昌倡義之檄已至陝清廷官吏防範益密然民氣勃動一發不可遏九月一日陝西義軍繼起清護撫錢能訓倉皇不得遁自戕不死見執於我不數日陝局定君歸自北山南北義師響應者十餘省當是時清廷用袁世凱策求和於南密以圖我君與諸同志分統義師東西防禦知潼關不守則陝西必非民軍有欲固潼關之防舍出師河東無以分敵勢而疑其意乃以河北之師東下運城分兵屯要害謀渡河以擊其後清兵勢少挫潼關遂失而復得南北和議亦因之而定君念始爲此謀者所以撲滿清謀共和也今吾志已成尙欲擁兵自衛耶乃首倡散兵之議解兵柄赴遠遊陝西苦戰數月事定而地方不受兵禍者君與諸同志之力及袁世凱破壞國法欲謀帝制癸丑

之役南京義舉君曰人心不起時未可也吾輩靜以待之耳不兩月而敗耗至後二年袁世凱叛國之罪已成西南首義君時居滬上習章太炎氏之學讀書不關俗事聞之投筆起曰時乎不可失也潛入滇與滇人謀出蜀之策納溪之戰與焉袁氏死共和復定北軍猶梗秦蜀間道苦不通君麻鞋簡裝間道歸爲陝謀時陝西已定於陳氏非君意也君知不可爲入北京坐以觀變後數月北京政府任軍務院參謀長李根源氏爲陝西省長陳氏抗命拒之君幹旋其間使李得以入陝乃強君與俱君就關中道尹論者多不謂然君實非自謀欲李君之安於陝喜吾黨之有助也及陳氏附和逆黨李君去官西南護法軍興而陝西亦繼起而響應之君居省爲陳氏所忌嫉脫身又不可得乃以篇籍自娛研圖注篆時夕與諸同志太息言天下事當是時滇第八軍葉荃氏率師入陝三原民軍聲勢復大振陳氏驚惶失措急招君與彭君仲翔赴三原與民黨諸人約爲緩兵之計君與彭君知陳氏怙惡不悛遂聯絡民黨各首領助于君右任爲最後解決之謀身任六路總指揮之職西與葉君相見謀成而返李東材詐賊之於興平西之南仁堡李東材者陳之下葉軍至隴州李以力不敵詐降而潛以密章上陳氏必欲以民黨要人之首表明其心者君死後李賊以君首邀功於陳河北之上羞之君見害時年三十一

胡軍長督辦河南軍務善後事立生將軍之事略

胡公景翼陝西富平縣莊裏鎮人字立生亦號笠僧年三十四歲其父角亭公業商以農起家爲人端方骨鯁家教綦嚴而有義方故胡公自幼卽得力於家教者至大十四歲入西安健本高等小學工書善爲文考試輒居第一且有志富於革命思想該學校爲辛亥前陝西革命運動之策源地其時卽由井公勿幕介紹入同盟會專從事於運動軍界同志及三秦健兒成績至著卽嶄然露頭角迨辛亥起義前幾日胡公本與井勿幕諸公在省約定於渭北樹革命旗而以在省內所聯絡之新軍及同志應之旋以武漢起事後省內風聲鶴唳迫不及待遂改由省內同志于九月一日在省舉義而推井公爲陝北安撫招討使胡公爲其第一團長初胡公之起也其同志多耀州之士招兵聚將在耀州東門外之北五台山其時自號爲中山少年美風姿龍跳虎躍有當年公瑾之風然軍紀綦嚴秋毫無犯故鄉人愛戴咸稱爲中山王而誌之曰胡家軍受命之後西至乾體東至潼關前後數十戰迭著戰功迨南北統一井胡兩公首先解甲公至京入匯文大學習英文年餘旋東渡入浩然社習軍事學時外蒙獨立公義奮填膺承留東學生全體公舉卽歸國聯合同志預備征蒙啓行時謁中山中山勉以努力革命公率爾曰景翼打到北

京當迎先生先入也中山領之者再（此次首都革命中山北來可謂如願相償矣不謂中山與公前後繼世嗚呼）歸陝後初充陳樹藩馬弁繼升備補連連長其時今日之岳代督維峻田師長玉潔故張中將義安馮旅長毓東諸名將均爲其排長旋升爲渭北剿匪司令遊擊第一營營長五年春渭北民軍起討袁氏帝制陸督建章派其子承武率中堅團一團追擊至富平適公亦先率隊駐茲地以袁氏帝制將成陸爲其健僕先去之遂授意於馮子明君擬以假傳公事之計詐賺晤面舉而殲之不意機緣不巧未爲所乘卒至酣戰一晝夜始活捉焉於是公之勇名因之頓起因此陸去陳繼公升爲步兵團長東西剿匪聲譽日隆婦人孺子無不知其名者六年西南護法軍興公與關中諸豪俊舉靖國軍響應爲鞏固團體計公與衆議迎于公右任爲總司令井公爲總指揮公爲四路司令血戰數年全國震驚旋陳授計于公之舊部某誘之于固市遂被執焉拘于陝督署二年餘終日習漢魏碑帖公之書法自茲大進後被釋歸三原爲靖國軍總指揮十年閩相文督陝陳樹藩遁馮公玉祥亦同時來陝誠意聯絡公及各路約共事公感其誠逕取消靖國軍第四路旗幟改編陝軍第一師師長十一年春直奉戰爭起馮公率師出關約公亦率全部東下公慨許之雖以新編之衆諸待整頓而以公建功志切奮勉赴敵于旬日

間竟奠定鄆州戰事結束馮公安赴開封茲爲公率陝軍出關立功之始亦卽爲公與馮公共抒國難之始旋奉命駐紮京漢沿線一帶北至順德南至彰德困守二年草木不驚日以練兵訓士爲事嚴禁擾民至今直隸之民咸稱道其功德不置此次國民軍興馮孫兩軍鎮守京師而馳騁疆場奮勇殺敵天津之戰唐山之戰彰德之戰獨公部効力最多督豫令下迄今不滿六月獨當難局指揮坐定中外稱其治才豫西之戰劉慈挾十數萬之衆爲必死之鬥而公竟於旬日之間迅告肅清用兵神速有如是者嗚呼國事甫定豫難復平人方幸公從此得以致力於民政建設之道俾克展其天才孰意昊天不弔將星遽殞竟以癰疥之疾折我元勳也嗚呼

立生將軍之過人處

一（勤儉立家）公出身農家其父母妻子咸視爲根本業故迄今猶治薄田數十畝家人惟以此爲生息其老母現仍日事績織其妻仍親操井臼時猶往田中饋物見之者無人敢認其爲督辦之母之婦者

二（俠義結交）公幼時性忌強凌弱最喜打不平遇有劣紳土豪橫行鄉里者輒以拳擊之俾其懾伏但遇有可憐之孤弱者則善遇之故其足跡所至處父老咸謳歌

之

三（度量過人）無不可宥之人無不可了之事生平不存黨見只要有長可取故近日開封城中督署席上各黨派人皆有若見有某某在側卽妄詆爲公與某派接近則淺之乎視公矣

四（有大志）公真正抱定國之志決非僅僅在區區地盤故常豪言願定國家願爲平民

五（氣節凜然）公態度似多近圓通然于大節處則凜然不苟曾記當年在陝督署被拘之時有要官自京來陳督設宴款之公亦被邀在座某要官指公詢陳督曰此公爲誰公不俟其答正色而言吾乃陝西靖國軍總司令胡景翼也滿座爲之凜然

六（努力興學）最注重於興學公生里莊裏鎮建有規模極大之中學校一所只建築費一節曾費三萬元但其住宅則敝屋數椽而已相對之下極其顯然三原公私學校最多亦公提倡之力居多

七（不愛錢）公自奉甚薄但對慈善事業學校捐助友人急難部下家族則至慷慨義氣毫無吝惜之意

公過人處至多此不過略舉其數則耳

胡景翼軼事

胡景翼初字中山後以景仰孫中山先生遂避不用改字立生但鄉人至今仍以胡中山稱之胡又於華山摩崖刻胡中山三字每字大二尺許又胡慕王翦之事功嘗鐫印曰頻陽將軍是同鄉後自悟身爲民黨事業當不同於王翦遂棄不用故于右任輓胡聯云蓋世勛名不爲王翦彌天風雨又哭中山

胡體貌魁偉幼習拳術師高鶴子一派高爲三原人武術之精冠絕關內外其徒揮手斃人有司逮捕不獲遂逮高高垂老矣竟瘐死獄中其技擊爲少林派之修正派胡故孔武有力爲高之再傳弟子受術甚嫻練與人談恆娓娓不倦也

胡於民國二年在北京常攜一笨重鉄棍出入必以自隨人多笑之在上海遇印度巡捕無禮擒而痛毆之謂不當欺侮中國人也

民國三年胡在日本學於浩然學社社爲國人在東京研究軍事學者胡由于右任介謁孫中山先生時胡將歸國中山先生贈以銀幣二百且勉勵其行謂無論何時何事總勿忘身爲民黨胡率然答曰我他日打破北京必迎先生入京也于甚病其冒昧國民

軍入京後中山先生甫逝而胡亦長往當年一言若竟爲今日道者

胡在三原欲收束陝西靖國軍于右任時爲靖國軍總司令徒步走高陵責曹世英諸將以大義使堅護義幟胡深夜走謁于夫人于三原西關私宅謂勢逼處此我決不昧良心不負于公言次且指誓天日焉

胡自偏裨洊至專閫在軍中十年未嘗置私產其尊人經營商業性極方鯁富平有田數十畝老屋數楹始終未有增益胡用財甚豪而無所私此亦其成功之一因也

胡工書能作狂草與篆書與人函扎字大幾二寸累十紙不能盡一開緘見龍蛇飛舞光怪陸離便知爲此公之大手筆也

民國初元胡爲陝北招討使井勿幕部標統解甲後以國內不可留走日本旋孫中山先生使之歸國胡返陝以民黨尙無所憑藉遂投陳樹藩部爲騎弁旋任連長引岳維峻田玉潔馮子明張義安董振五等入軍中靖國軍起義張董先後領一支隊皆力戰死綏關中稱殉國名將恆並舉張董岳田馮今皆爲大將而皆起自胡之一連中胡之引致能者頗足多也

王揖唐訪胡於開封謂招納民黨太多胡答謂不但我多用民黨且甚願公語執政

多與民黨人接近爲是又柏文蔚在豫某方勸逐之胡荅語甚爽直第謂當舍督辦不舍名將

革命先烈宋向辰先生行述

李元鼎

君諱元愷字向辰姓宋氏陝西耀縣人也世有隱德爲邑望族明末李自成陷京師宋公師襄以太常卿在籍殉國卽君先世祖也明史有傳父滋生公篤行著一邑妣氏曰君少有遠志好讀書沉默寡言笑出入里巷間挺身而行目不旁瞬稍長任俠尙義嘗遇吏役凌辱鄉人慨然太息曰吾他日得志必不令吾民長此見虐聞者異之及爲諸生肄業味經書院書院廢復入宏道高等學堂嘗家居見邑中錢幣大壞與諸士紳協議整頓之商民稱便田賦積弊歷年久無敢議者君又首倡清理贊成者衆事克濟人盡蒙其惠由是邑中無遠近皆知重君矣光緒乙巳歲以官費留學日本學陸軍隸振武學校逾二年以事輟學後轉入東斌學校當是時革命之說盛倡自海外青年學子從而和者率多優空言而紉實行君夙熱心國事旣入同盟會思欲返國以身任之因受孫中山先生之委託以庚戌歲歸自日本時井勿幕鄒子良諸君已先歸糾合同志亦頗衆其所規畫事得君乃益舉旣而國內革命風潮日烈陝吏亦稍稍忌留學生君陽託教育界得充高

等學堂農業學堂教員講授之餘陰詔學生以革命大義時張義安方肄業農業學堂君特深器之辛亥九月初一日陝西革命軍起省城城門晝閉君所處農業學堂居城外以故越二日始得入入則舉一事贊一畫裕如也適城南土匪戕殺教士變作衆議舉君主辦其事事得已衆稱善以是遂以君長外交司既又兼充軍醫院院長事亦悉治南北和議久未成省城東西戰事日劇異軍特起者以軍械奇絀人持炸彈轟擊敵軍號炸彈隊君親統之醴泉薛祿鎮之捷大挫甘軍與有力焉民國元年共和肇造兵革寢息君解去各職轉任交通司司長大治省中市街道路重建遼河橋梁其他事賴以調停者尤多二年改行新官制交通司廢當事者將任君以他職君不欲就而取決於元鼎元鼎時長教育司考送日本留學生有日矣因以經理屬君甫成行癸丑之役作旣而討袁軍據江寧獨立粵贛湘繼起君往來滬寧間欲有所爲計弗就乃東渡其明年袁世凱帝制將成孫中山先生規設中華革命黨於東京以君爲陝西支部長會北京祕賣延長石油事發君遣王幹臣樊靈山等歸陝力爭廢約實則潛圖革命也四年冬護國軍起自滇黔君復遣曹俊夫胡立生馮子明張樂成等歸響應之逾年陝局略定君乃辭經理員歸當事者處君閒散地君就之而銳意經營樂羣學社以助同志及復辟事起舉國騷然君潛統郭

方崗康子定之衆渡河北伐自任總司令以郭英夫樊靈山等爲參謀轉戰經月卒因失利自殺死年三十有八斯役也死事者甚衆有識者痛之嗟乎張勳果奚取於復辟哉彼陰謀者設計陷之以爲竊國假手之資已耳以君之明豈不之覩而乃冒焉爲此勦民之舉乎顧以當日陝局方且黨惡爲虐而民黨諸軍勢有難與猝離者故爲此舉以啓其釁非必欲去國遠門與一張勳爲敵已也其後耿端人發難於省城張義安繼起於三原不數月而西北風雲一再變色要皆河東一役爲之嚆矢陝西而果其有多死者其瞑目地下矣非然者豈惟此地下人含恨無窮已耶君死於今已五年矣父滋生公猶在繼配馬氏已病故子一東海年十一肄業本縣高等小學校女二長東洋年十八女子高等小學校畢業次東捷五歲又繼配李溫如充本縣女子兩級小學校教員女一東瀛尙幼歷年以來其於君之生死存歿無人敢以爲言同人等念君喪之不可以終祕卜兆於五台山麓將歸君之尸以十年十一月十三日葬乃於口月口日發表俾君父及君妻子女得伸其哀君自奔走革命以迄殉國未嘗以家室累心而卒貽家室以至慟蹇叔莫收夫戰骨杞婦未與於郊弔國難家難備極身身噫可哀也已元鼎與君交遊久疇昔師興之會獨見走告執手囑言歷歷在耳慨報國之殄瘁哀故舊之零落故縷述其行事如右民國

十年十一月蒲城李元鼎謹狀

先烈樊靈山先生行狀

君姓樊氏諱毓秀字靈山陝西耀縣人少孤貧聰穎端儼好讀書晨夕鑽研甚苦識者羣以遠大期之清光緒三十一年補耀縣弟子員旋入三原宏道學堂肄業時清室不綱封疆日蹙大總統孫公僑居海外倡導革命學說流播如春潮之長宏道學堂爲三輔文學淵藪西籍報章汗牛充棟君既饜飫其說遂毅然以改革政治自任倡爲春秋九世復仇之說信從者衆學堂當局覺其異趣假他事除其籍同時被逐者十餘人君爲之長餘亦辛亥間錚錚著聲譽者也當時學校之黑暗如此然君亦於此時露頭角知君者衆矣君素嗜數學嘗謂凡百科學俱以數學爲原則鈐析縷鑿探討最力以故試輒冠其曹偶既出宏道則發憤遊滬上入南洋公學卒業數學專科君居海上數年讀書益進所識海內外之同志日益衆默察世界大勢內鑑政治之岌岌益知神州破壞之不可避蓋至此自信之心愈堅矣宣統改元時事愈棘孫公廣通聲氣布滿海內期同時大舉覆清室時陝人之留學日本者亦多內渡聚滬上謀陝事時君受孫公委託首先歸陝隨同井勿幕諸公於耀縣組織同盟會陝西之有同盟會自此始二年廣東黃花崗義軍殲敗君聞

之憤不欲生糾合鄒子良等屯壘北山密規舉義關輔英俊多潛受部勒陝西義軍始萌芽焉三年八月武昌義旗建起九月一日陝西革命軍克復西安君亦聚衆響應於耀縣不數日全陝入革命軍手時國本未定清趙倜以毅軍攻入潼關三輔大震同時升允挾甘肅數十營進犯乾縣勢張甚守將張雲山誓以死守然新軍未更戰守不能制敵時張鳳翽被舉爲陝西革命軍大統領急檄君往助雲山君帥炸彈隊兼程赴援內外協勢屢挫敵鋒克保危城君之力居多共和告成常路爭畧以要職皆辭不就儼然赴日本留學其恬退如此民國元年宋教仁被戕於寧滬火車站袁氏盜國之謀漸著二次革命失敗黨人以次東渡改組中華革命黨於東京君聯絡同輩首先加入稱健將焉三年熊希齡當國與陝當道盜竄延長油礦物議大譁在東同人公推君與曹俊夫等六人回國抗爭實欲乘時舉義事爲當道偵知機牙四布欲隨方剿除君等行至臨潼得耗亟返日本五年袁氏僭號蔡松坡建議旗於滇南各省響應君隨同曹俊夫等在白水獨立遙與西南相號召擁勝兵數萬陸督建章中懾思與民軍連和謀免脫陳樹藩因乘勢獵取督權賄交北軍閥閥以固其位君知其將甘心於民黨也遂辭軍職爲教員以自晦明年張勳擁清幼帝復辟全國騷動君於是隨同宋向辰郭方剛康子靖諸公假道山右欲出井陘以

扼北京之喉舉數百年齷齪之社會滌盪而廓清之意兩河淮濟之間必有異軍崛起以相提携者此君之志也無何段祺瑞出師馬廠張勳敗走大局确定君與宋郭諸君尙椎鋒安邑萬縣間連戰皆捷顧近畿各省俱同時取消獨立受段氏約束維僅君等孤軍轉戰千里外傷亡日多陷入長圍全軍覆焉嗚呼傷已君初被執敵軍主者奇其狀貌欲活之君閉目大罵遂遇害享年三十三歲時民國六年□月□日也是役也革命先烈宋公向辰主籌其事從之者甚夥宋公特總持軍中大計其戰守機宜飛輓芻粟之任則君一身肩之嘗數日夜目不交睫而總理微密軍無廢事諸公每嘆以爲實不可及當軍勢阨危君本可由他道逃免聞宋公殉難則危坐以待死泊敵軍有欲捨之意則極口大罵以求死蓋君殉國之志素定決不以姑留此身之說自欺其志以負死友嗚呼壯哉君祖諱□□父諱□□母□氏妻氏□子一保義女一鳳蓮皆尙幼今者同仁將舉公葬之禮與宋公向辰同葬於耀縣五台山麓謹狀其事如右

尙鎮圭先生小傳

尙先生諱鎮圭字天德民國紀元前三十年生於陝西之大荔縣幼歧嶷有大志及長讀書得間重知行合一滿清末葉貴族專權外患日極國幾不國 孫公中山在海外

創立同盟會召集同志提倡民族民權民生三大革命主義先生遂決然加盟聯合西北同志密運軍火謀光復武昌起義而陝西響應最早者先生之力也民國二年被選爲衆議院議員對於國家建設多所供獻居恆落落寡言笑但在院內遇重要問題輒侃侃發言聲如洪鍾狡黠者多畏之六年出席廣州國會非常會議八年出席憲法會議九年奔走川滇艱苦備嘗力持正義十一年六月陳逆炯明叛亂兩院議員倉皇出走護法事業於以中斷而吳景濂輩盜竊國會爲北方軍閥之俚先生憤極乃斥詰吳景濂種種違法行爲義正詞嚴景濂囁嚅不能答惜舉世是非混淆助之者寡未能正真僞也十二年秋自好議員相率南下先生以爲可以開合法會議矣而又事與願違賄選成國益危矣先生以是鬱鬱發肝疾曹錕就僞職後之第八日（十月十八日）午後七時肝病驟劇竟至不起時十月十九日午前四時距病作僅九小時也享年四十有九慈親在堂壽逾七旬有子二女一生平言行散見於南北報章及國會議事錄彙而編之用彰潛德請以俟諸異日茲僅敘述其生平略歷云爾

張仲良先生軼事

劉允承撰

仲良在清季究心性理之學敬慕楊渠張子故取名師渠但其思想行事不能以理

學範也靖國軍時郭方剛守鳳翔陳樹藩兵攻之急仲良啣命勞軍謂郭曰善保此城俟戰局結束將擇天下極美之女子以奉君郭曰君亦有意乎仲良慨然應曰苟當意者亦可步君之後塵也相與撫掌大笑一座哄然仲良對其他將領亦常作是語見之者絕不目爲理學中人也仲良善醫惟製劑最重服之者咸存戒心又偏於涼性藥品如石膏一類動輒半斤一斤人皆稱爲石膏先生胡笠僧體甚堅強偶有病仲良投以石膏半斤劉允丞人頗羸弱而良治亦如之然二人病恙均能霍然斯爲奇耳聞仲良亦有以是而喪人命者但無確鑿之佐證也仲良軀體甚偉木訥寡言然善笑聲亦宏亮目眶細小笑則不見瞳睛每與知友傾談至快意處則西路土腔之「一個一於每句語尾均附加之聽者爲之絕倒而仲良固自若也靖國軍興吳希真任左翼第一支隊司令仲良副之均係書生不善御衆一戰而全軍覆焉希真被敗兵所窘仲良衣履均爲若輩剝奪以去狼狽歸來對衆人談敗狀「一個一個」之聲不絕於口聽者掩口胡盧而仲良則笑聲大作似忘其甫經危險者亦其個性之獨特處也事略中謂仲良一生熱心國事不競功利視祿位如敝屣不事家人生產安貧而樂以是西北民黨咸尊爲長者且精岐黃之術處方常見奇效惟復樂善好施遇貧苦無告之人不僅贈醫且施藥餌苟知貧病者住址並

攜帶藥籠親往治療不取值也此一段記載均係仲良行實之可傳者惜事過境遷遺忘甚多不能一一印證也以予所知于鳳千三水之戰胸腹受彈傷仲良聞之單騎前往診治並護送鳳千來三原安置於東關救世堂醫院自謂此種傷病以就治西醫爲宜絕不堅持門戶之見尤爲難能可貴也

高峯五軼事

楊子廉撰

白水高峯五君卒於本年一月廿六日吾人亦將君之事略記載於前矣茲再述其軼事之有關史料者亦可以見君之生平也君於民國五年陝軍聯合逐陸建章之後見嫉於陳樹藩編所部爲一團隸李天佐君雖不悅然無可如何亦暫安之李雖爲團長而實力盡在君手下有勸其乘便剪除者或驅逐者君終不應李後亦感悟言於陳爲君另編一騎兵團使駐白水一時始得相安李在陳前屢言君驕縱難制君知明之不與較也君軀體雖偉而性多疑慮民國六年駐防白水將樹獨立之旗以響應西南徘徊瞻顧謀不能決時陳樹藩甚頗輕君以一函激之曰「吾意極閣下之力不過擾亂白宜中洛四縣而已」君得函果憤語左右曰陳以四縣範圍我我偏要縱橫河北出其不意計遂決翌日卽樹護法軍旗職宣言獨立矣及白水戰敗果出入富耀陵原一帶絕不退白宜

中洛陳藉胡笠僧之力雖使君衆戰敗而河北擾攘又生其他枝節矣是則白水獨立之異聞其事由於陳氏之一函而激起也君於靖國軍爲第五路司令時各軍屯河北一隅軍資浩繁而地方財力有限一切均甚拮据官長每日發口食四百文兵士二百文尙須艱苦戰鬥君在白水雖有地盤而窮扼相等略有積餘則贍文士特別困苦者時有五路文人窮之謠君手筆開闊用錢甚類張宗昌特範圍略小耳君任初起兵時與今西安綏靖主任楊虎城氏有小意見及靖國軍失敗楊率殘部入北山道出白水時君已受省方編制仍駐白水卽按兵城頭不動楊部得以安全通過然綏章保駐蒲城越境追楊及於洛川被楊部戰敗人之度量相越抑何其遠耶君死後楊甚痛惜聯名函省府爲之請卹省府撥千元楊亦助其家族千元使治喪葬亦可念也君晚年居鄉勤於耕稼勞苦倍常人農作物之收成亦異於常人絕不以多年養尊處優而不屑於壟畝此爲君生平之極可貴者能屈能伸君亦人傑也哉

張瑞卿事略

君姓張氏名廷芝字瑞卿陝西蒲城縣人少時卽落落自將頭角嶄然由州府中學陝西高等學堂畢業後年逾弱冠辨才無礙尤善談諧富有革命思想值辛亥反正萑苻

遍地君乃倡辦本縣團練保護桑梓一面仍策應民軍同屬各縣賴以安謐旋赴日本研習政治法學數年畢業回陝主講法政專門學校及各中學不輕投身政界靖國軍起於渭北君卽往被委爲總司令參議于右任總司令甚倚重之君則與韋協度蒙俊曾諸同志客楊虎城司令處爲賓佐參其軍事是爲君加入楊部之始中間曾任高陵縣知事年餘而軍事必預謀九年南北議和君充靖國軍總代表蒞會和議未成而各方益重視靖國軍矣及靖國軍內部發生變化楊虎城迎于總司令於武功君始終其役十四年楊就陝北國民軍總指揮兼國民第三軍第三師師長職與北洋系軍閥吳新田激戰岐寶間者數閱月十五年率全部入守西安此兩年中君入則爲主任參謀出則爲全權代表運籌帷幄折衝尊俎其功甚鉅其事多密迨北伐成功君已積勞致病不任從軍黯黯歸里閉門養疴謝絕人事竟以十八年正月廿六日卒於家得年四十有四未盡其才至堪悼惜君既有口辨兼饒智略每稠人廣座談論時事未嘗不津津聽者未嘗不稱快尤善規友過類東方曼倩之滑稽言者無罪而聞者知戒君歿愈久而同人等愈覺君爲團體不可少之人其感人之深如此君從事革命多年不問生產歿後妻孥無以爲生君無以爲葬此皆同人等之責也君之子曰志學者肄業上海中國公學大學部以君葬有日寓書

姬匯百師長請其商諸同人謀所以表張其父之道嗟呼自國民革命軍由廣東一隅誓師北伐越嶺渡江曠日持久其難遠過於諸葛武侯之六出祁山然能卒成功以有今日全國統一之國民政府者初則有賴於陝西靖國軍之牽掣軍閥遙爲聲援終則得力於西安革命陣地之固守楊虎城總指揮實靖國軍之中堅人物而又固守西安之主帥也助楊建此奇勳者固不止一二人除武裝同志外文士中則以君爲最著有大功而無顯名者從古多矣豈獨君也哉按君之家世則有延卓亭部長所撰墓誌銘言之綦詳同人等譾陋不文略述梗概如上聊以應孝子之請兼備修革命史者採覽焉

史漢岑先生行述軸文

余友史君漢岑既歿之三載將於二十年夏曆九月初八日安厝西寨堡之原其友白玉乾等以君忠誠孝友迴邁恆常不可無傳於後擬製錦軸闡揚行誼而以綴文見委余忝知誼弗容辭君諱仲書字漢岑爲吾華名宿彤葵先生之子兄弟四人君其仲也幼好學有大志偶儻不羣以母老家寒輟學賈於蜀辛亥返陝值革命軍起經張翔初都督委辦白水縣公債以濟軍糈民國元年充實業司科員以政治學識缺乏兼入法政專門學校銳意研究頗有心得畢業後考取承審員充長安審判廳民庭推事及臨潼富平兩

縣承審員聽斷公允人多頌之解任後入清麓山從興平張衡山先生遊會富平胡公笠僧樹靖國軍幟於三原聞君才延之入幕委充軍法官而兼攝三原縣知事時軍務倥傯供億浩繁君糾察撫馭措置有方事舉而無擾僉稱其能胡公率師出關委君爲行營軍法處處長國民軍聯軍成立擢任聯軍總軍法處處長君執法如山不畏強禦三軍肅然十三年胡公督辦河南軍務君被簡任爲河南菸酒事務局局長嚴行考核剔除積弊歲收超逾定額十餘萬聲譽大起胡公旋殂岳公西峯繼任益倚重君十五年春豫局變更君隨岳公去職十六年冬岳公治兵汝南襄樊間任君司防區財政量支節取軍民相安岳軍因見忌於當道倉卒移防君自忖廉潔坦白故遲遲其行不慮竟觸忌者而罹於厄蓋君秉賦慤直嫉惡如仇往往面折人非自以爲率直初未計及昔同袍澤之圖已也吁可慨已君卅年失怙賴母賈氏及兄輯五教養克以成立事母孝事兄恭謹待弟哲生季文推甘讓饒友愛異常

楊秀軒先生芳行序

范任譔

公諱森字芳哲世居華縣赤水漲村堡昆仲二人公居長幼嗜書性聰敏先生頗器重之旋以家境貧寒無力供給形將輟學然公讀書之雄心猶未稍退卽托人向父席卿

公以讀書宣誓席卿公雅愛詩書各方羅致籌集學費罄其所有家財供公讀書遂擇名師如田雨亭劉巨川諸先生受業門牆四年之後名列黌宮自省立師範學校畢業時適值辛亥革命初起公卽毅然投筆加入奔走九月奉張都督鳳翽命令偕同本黨同志何雲章等赴省東各縣招撫白林子李金成等部來省受編東路各縣地方不受糜爛革命工作日益光大實公之力也嗣以公不辭艱辛効力革命深堪嘉許調任內務司營繕科科长長公到差後勛從事統率所屬員兵調查滿城餘孽肅清奸黨改換西安四城門匾額滿字爲漢字建築新秦厯任神木縣長華縣學董等職無刻不在革命途中爭光明不意積勞成疾患嘔血症竟於辭世嗚呼哀哉公天性純篤事雙親重養志故恆得堂上歡心公對胞弟彬字文軒友愛異常囑以國事勉以革命鉅任期望甚殷供給弟彬肄業西北大學及鉄道測繪西北講武堂等學校卒業期滿卽加入革軍厯任排連長營長等職旋任靖國軍副團長參謀副官處長辦事處長陝西省財政廳委員省政府參議陝西粮秣總監部少將副監等職東奔西走代表各部參贊軍機効力黨國名聞一時得了公之夙願皆公教誨之功使然也其篤厚於天倫有如此公賦性溫雅待人和厚志同者交不以貧賤而忽之道合者附不以富貴而遠之患難者卹緩急相濟故其弟與朋友咸感

化爲知己焉其善與人交有如此公持身儉樸而對於慈善公益諸事無不慷慨解囊以助其成公設法籌款創立本村小學至今後學之賴以成就者甚多公無子撫弟彬長子作舟爲嗣嗚呼綜以上諸端觀之公蓋和厚端正君子也倘使天假之年則建偉業於社會留芳名於後世自意中事耳而乃壯志未酬雄心未展遽爾物化亦足悲矣余也瞻念典型謹敘顛末又望公之子若孫繼續公志克自樹立庶可以少慰幽魂矣是爲序

無名英雄記

辛亥陝西光復殉國有姓名可記載者祇數十人應均見前無姓名而確記數字者約三千餘人死傷渾列者三千三百餘人受傷專列者二千七百餘人陝西倉卒發動無明確記載以衛生隊掩埋記載考之爲數亦屬不少西安初一至初六日渾戰六晝夜潼關九月口口日渾戰口晝夜乾醴鳳隴渭岐等處自十月口日渾戰月餘共五十餘次之大戰均無記載負傷士兵不治而死之數約計總在萬人以上吾以爲此萬餘無名英雄關係重大當時西安首先殉國者爲口口口等十幾人謂僅此幾人卽可以光復西安雖愚者亦知其不能也有此多數之無名英雄西安光復矣西安撐持六日而湖南江西雲南等省光復而潼關乾縣醴泉鳳翔撐數十日血戰而有江蘇浙江貴州廣東廣西東三

省等省光復此萬人之頭顱撐持戰事兩月餘使各省革命胆氣雄壯次第反正致亡國二百六十餘年之漢族重興恢復則此萬餘無名英雄之血肉換來洵事實也故可等閒置之無記乎吾因敬謹爲此萬餘無名英雄立傳以示來者而知復秦之不易也

秦隴復漢軍第二鎮戰記徵文啓事

東亞之大陸磅礴鬱積久而一發最神速最偉大上下五千年所未聞東西數十國所未有者非中國之革命乎江漢之潯首以義聲爲海內倡關中豪俊起直追百二關河指日光復東通豫晉南聯川鄂西禦甘隴大小數百戰奔馳千餘里迂互五六月死傷數萬衆將校堅忍耐勞士卒爭先恐後義俠響應景從民衆戮力一心終能式遏強寇保界河山以弼成我文明神聖惟一之共和大民國轟轟洋洋哉哉吾秦戰事之在中華民國革命歷史上之位置價值洵乎其無二上也今以我同胞拋擲無量數之腦血心血頸血贏得此後永永無極之幸福完完全全付之吾儕而顧忍聽其淹忽隨物化淪胥以終古乎秦人數不喜事鋪張致璀璨光華之事蹟瑰奇雄偉之人物不得與河聲嶽色並有千古已足惜矣自共和成立臨時政府屢徵革命戰史兩月以來粗有端倪用特設史局專職斯役惟是案牘書函率多疏漏戰士戰術缺焉不詳至於個人行實地方情況亦未

由悉知非周諮博訪湮埋者正復無限如有親歷戎行目覩戰况或編入日記或次爲傳略或敘一事之顛末或述一方之梗概體不可略事取徵實所望隨時寄達以匡不逮庶幾英雄壽世峙銅像之巍峨載籍生光長石室之聲價諸君子倘亦樂於從事乎

鄒子良寇遐李桐軒馬彥狝李仲特井勿幕井崧生韓子淮師子敬吳寶山于海滄薛卜五焦子靜紀子文楊子廉党仙洲等爲革命先烈任師竹嚴文軒募捐立碑公啓

敬啓者耀州任君師竹澄城嚴君文軒吾秦學界鉅子革命偉人方在髫齡已懷大志及夫壯歲益勵實行憫漢族之陵夷六州屏息憤胡塵之煽虐四海陰霾每念九世深仇輒墜君山之涕淚欲聯三秦豪傑驅除韃虜之腥羶在昔屈伏於清已作秘密之運動痛陳民族大義聞之者莫不椎心糾合關輔英年行之者未辭胼足二君之將事可謂勤矣三秦革命之動機由是起矣向使天能假年鬼不瞰室則三秦起義之日卽二君効命之時穎考叔當拔幟先登呼衍氏定聞風早遁其所建樹豈讓時賢孰意二豎爲災竟登元瑜於鬼籙羣陰構禍暗刺節士於宵中壯志未酬辛酸嘔血英姿長沒泉壤藏精贖不能以百身恨乃貽於千古幸共和告成土宇已復雖由生者金戈鉄馬効力疆場實已死者瘠口焦舌先聲鼓吹倘使無報功之盛舉何以闡國士之幽光是以同人等擬建豐碑

表揚遺烈此非抱人琴之私痛實足壯河嶽之榮光惟以力綿未克任重伏望知音志士好義高賢大沛廉泉爭操量鼓不惜傾囊以助庶幾集腋而成使一片貞珉永作千秋之紀念而兩賢遺事得借衆力以流傳是同人等合掌仰祈私心禱祝者也

革命大祭通電

沸空鑢吹喧喧聞革命之聲繞地蒼茫起起卒招魂之祭河迴嶽夔亂衆人勞風捲雲馳城圍戰合中原銅馬蹴踏土以西來半夜城烏飛啄人而下瞰斯時幽燕陷落河朔分崩舉三十萬之秦兵還櫻衆怒有八九年之戰績莫救垂危誰歸崎谷之尸可拋黃河之指喪元先軫灑血王琳信怨毒之難堪遂喪亡之不少矣乃若居庸關下往日嚴疆永定河頭去年高壘列長城爲戰格橫大漠爲軍台抵抗東胡支持南口望神京不遠旋師則拯掖生民棄張北以行改道則紆迴寧武賀蘭山畔有陣如雲壩水軍前磨騎若電保長安於垂破解八月之重圍纍纍國殤哀哀戰友至於鬱陶久困之中城雖無恙然在轉側盼援之際人盡何辜看骸骨之橫撐僅旌旗之未改百年喬木摧賸寒灰一掬藏粮翻成禍水衣冠委脫街衢之饒殍縱橫樓堞墮頰血肉之殘痕歷落既久攻而不陷將萬戶以爲墟得失係西北之安危生死共東南之戰伐蟲沙化盡換來一片紅城猿鶴傷多始

見中天白日却餘檢點痛定悲呼更有處處戰場年年兵燹自然流涕現是此難鬼火青
燐驚鼻鳴而不定游魂綠慘將孤燈以難埋饒墓廬井灶之無存斯溝壑壑之必吊辛
苦則荆榛十日艱難則風雪長途間孱愁之遺民將觸體而有語矣况自改革以來關河
多故甚弘化碧豈僅三年築客懷鉛蓋經屢仆或則高呼就義東市駢捐或則銜命渡河
西台慟殞歌河岳日星而不屈遂囚牢捶楚以橫終有狙擊以成羣有嬰城而死門裏裳
張儉走死無歸擊賊陳東捐生已決爲畫策於軍門旋遭疑忌卽投荒於巖畔仍被搜餘
凡茲志士仁人同殉國民革命抑有蘇俄先覺聯爲階級之爭並世勞民遠作農工之助
參加指導慷慨犧牲今當赤潮澎湃之時益重黃土迷茫之痛瓜同蔓盡草向城春願起
九原何能百贖茲於中山先生二週年紀念之辰適在陝西收復之際特舉行革命大祭
於紅城負土成塚象祈連爲大塚刻銘瘞石藏劍屨以垂徽上懸革命之紅旗下種傷心
之碧草所望闕文見告成夕陽紅淚之書遺事搜羅口口口口口口口口口口口口視茲息
壤定想生芻一束隨山川雷鼓以同臨露雍九歌並風日靈旗而振采陝西革命大祭籌
備處啓

祭同志衆議院議員尙君天德文

孫文

維中華民國十有二年十一月十日孫文以同志衆議院議員尙君天德之喪致名花清酒於尙君之靈而告之曰夫惟哲人邦國之寶慮其不壽以頌以禱然而國人所欲殺者每如荆棘之滋蔓欲生者每見芝蘭之夭折倘非人力易窮不應訴諸天道幾年以來又以國步之艱責任之重死傷者之日多離叛者之可痛將欲簡練同人奮策義勇作庶民之朝氣登治理於極峯而君逝矣嗚呼文所痛哭者不始於君文所期望者不止於君而君則昔爲文所期望今爲文所痛哭之一人嗚呼哀哉尙饗

張義安將軍誄

茹欲立撰

惟民國七年三月十三日張義安將軍戰死於鄂粵二年十二月二十有二日葬於富平北門之外嗚呼哀哉初段祺瑞圖謀禍國而陝督陳樹藩黨於逆剝削民財擄殘民氣士有不附己者必羅織而誅夷之當是時耿端人直以警備軍謀誅之於省垣巷戰兩日夜不克而去之子以寡弱之衆處乎三原與逆旅曾繼賢分城而居明示以退讓而陰以備戰出其不意創敵要害用少犯衆全師大獲旣而義兵四起雲合霧集然皆爭長圖伯師無謀律叫囂謹認不思進取子乃慷慨誓軍渡渭長驅奮其鋒銳逼之城下凶醜駭懼城門晝闔者數十日久之敵援大至衆寡懸絕然猶裹創冒進屢挫敵鋒卒以志窮憤

發佻身敵彈非夫忠勇邁世義不撓屈有古烈士之風者曷克如是今海內重擾國亂未已阻兵安忍者爭據據邑苟且圖存者各自爲計聞鼓輦之音則思將帥之士心乎憂矣莫知我哀乃爲誄曰

民始建國禍亂潛苞袁實首惡段繼益驕西南豎義海內鬱陶陝人奮起整我戈矛烈烈張生名位未充寥寥練卒困偪鮮通屈志池陽如女處宮密謀其事潛攻於中敵不及拒投械西東難自我發諸軍應響不矜不伐功無居上當仁不讓廉斯可獎曾嚴雖潰陳勢仍張外恃輿援內修甲兵盤據要處伺隙跳梁苟不肅清終爲我傷如彼農人去草務耕刈芟蘊崇不使復榮如彼斬蛇寸磔腹腸懼彼不死後罹其殃惟此張生敖然自任勇不先嘗怯孰敢進手提其旅指揮臨陣馳騁風徂敵乃坐困屏息堅城如鼠處隙前徒倒戈歸我明德將遂一鼓滅此朝食拯彼民黎登之衽席悠悠諸將知下廝養謀士不見尋丈忘彼協力爭爲雄長紛然論議強半持兩曰納其使曰與之講空言會師逍遙河上——師老援闔人逸我勞衆寡雖殊神志不撓撫循夷傷躬親壘壕先仆繼登陷堅摧豪勝敗之機變化一朝身殞敵彈名垂雲霄嗚呼哀哉 自子之歿風雲劇變我時在圍心摧志慘算其成敗竊獨興歎既我來歸節物屢換徒聞子名弗覩子面顧瞻舊部誰

依誰戀汝忠汝烈何由再見嗚呼哀哉 孫子用吳試兵於女彭越據梁蒼頭特起子之軍聲孫彭足儼凡今之人誰復子似日居月諸桂萼三載暑往寒來星移歲改兵不素肄勢成瓦解人之云亡國邦殄瘁嗚呼哀哉 觀子銘旌想爾高致如見旌旂如聞涕泗痛哉將軍歿而猶眎嗚呼哀哉

董振五哀詞 綴序

劉允承

民國七年段祺瑞迎吳勳復辟而坑陷其部國會議員紛紛附民黨首領孫公南渡建政府於廣東川滇黔靖國軍繼起不足敵北董君振五呼陝人應之北軍防湘南者敗棄衡山岳州將不守微陝軍之牽制南北對立之局幾傾一時知名士始賢振五振五日雜卒伍中奔馳不遑隨張義安圍長安城三面以城東一面任郭高曹盧四軍城敵有段密書獻南關者方函約東西合圍猛擊功見旦夕奸人某某百方離間而城東之師遁走從此逍遙河北矣其先豫寇劉鎮華擁重兵潼關甘言議和今以東路無阻遂長驅西犯振五隸胡笠僧部下謂君年少多智時爲智累急令解長安圍以自固忽進忽退之日以將帥爲望之義安於兵械相交金鼓震怒之時戰歿勳縣人心惶惶壯士失色振五慷慨直進氣傾全軍衝敵之堅者摧敗之餘衆踉蹌竄退自相踐踏以死屍骨遍原野軍前推

馮子明爲支隊長鄧寶珊贊襄焉已則專督進義安先鋒二營追擊復圍長安於是振五之聲威赫然遠播迨後遵令退兵乃護義安樞返里余逆於興平旅次會諸將領言義安事與振五深夜對坐悒悒想悲泣逆料敵騎北指必敗我猜疑失馭之師輒大聲誦「向使龍城飛將在不教胡馬渡陰山」之句以寄慨鷄鳴假寐忽嘔血容升急用土掩之恐兵士有知而氣餒者振五素精密纖毫無遺然至此已心力交瘁矣此後各將領果謀畫疆土自保不相往還笠僧欲作其氣以斗清犒軍之三月陳劉二逆集全力帶二十餘營渡渭直撲關山勢張甚涇陽富商民潛遁一日夜告急書飛馳至百數十通危急存亡間振五同諸將領擁岳西峯東征西峯時尚負重傷卽裹創慨應振五夜起簡裝星夜出發適楊虎城戰界防三日彈盡糧絕軍心大擾鄧寶珊率部援之陳樹藩劉鎮華師大敗振五與鄧寶珊李虎承合軍時分紮相橋田市間牽敵左翼嘗言對打無奇功因率部乘勝東南繞敵三十餘里襲取上張渡請西峯進駐司令部於此振五連襲權家洛家韓家攻下邽皆獲全勝敵猛退四十里對紮火線延長六七十里相持四五十日嗣以農忙敵我相約停戰振五引全軍返相橋相橋屏蔽三原東面極目平衍無障霧可遠敵亦可延敵所謂四戰之區在所必爭者也振五數年前奔走革命時曾結納潛匿其間故於形勢瞭

如指掌當時對友言曰據此以待敵來必無生還者以故敵雖明偵密探卒未敢動自援羌白後靖國軍勢愈散渙振五專意練兵越兩月于右任張伯英入陝就總司令竺僧辭職專心治兵八月出師渭橋振五欣然往與竺僧約曰於渭橋交口兩處架浮橋掃清東路以成前者未成之功竺僧深韙之乃渡渭揚言攻省敵盡集請軍於城內外嚴爲防守振五一更後引衆舍驕忽折而東夜行八十里至馬駒寨搏擊敗鎮嵩軍精銳一營有餘悉收其器械馬匹俘百餘人敵甯連長詣軍前獻書求還所俘因優遇而遣之振五循謹寡言至戰地則目瞭手戟指揮佈置正氣所感雖老將宿卒亦聽從無失未有時預定某衝鋒某接應某扼敵援某架橋梁於交口果能絲毫不爽鄠縣退兵之後兵氣未有如此盛者料敵應驗亦未如此奇者陳劉由是閉兵不敢出河北軍復大震人以功歸振五振五謙讓不居也此時川滇援軍分進抵興漢界張伯英從南山繞道至三原竺僧日整飭士馬約會圍長安城陳劉盡載子女玉帛出關城內外居民驚散彼時伯英入下邳說曹建安竺僧又入固市見舊部姜宏模假道渡渭取潼關宏模時持兩端振五苦勸不聽遂被劫入長安一時三軍失依蒼黃變色振五憂憤成疾陳連電招振五降振五去書峻拒陳亦大爲折服未幾葉荃佔鳳翔王安瀾奪興安呂超取漢中陳盧川滇陝三軍合勢腹

背受敵計出井勿幕游說三原冀緩我西上兵彼得從容兜禦漢南川軍井固陝西民黨盟首久不直陳所爲卽與在原同志協謀討陳時尙有以井爲陳派而疑者振五力爲白之已而長安城內同志陰糾兵三營謀內應求井外助詎師渡河而謀洩殺志士三四十人興平乃鳳翔岐邠乾長安之樞紐涇原一路用兵西方者在所必敗爾時爲賈福堂所竊據恣睢暴厲首鼠敵我間以爲民害振五深惡之乃從紅崖渡西進欲竊以通葉荃滇軍及郭盧兩部然皆爲陳軍困於武功西原因募死士致密書乞援於我振五不欲出兵一般縱橫游士瞻爲謗說振五憤而出之會諸將領於涇陽塔永樂店衆號五千振五部署已定自爲前驅一日夜行百五十里紮大王鎮一帶離敵二三里挖溝築壘親率四五騎誘敵敵帶十餘營猛攻振五通知楊馮石各部敵來伏戰壕不准發射必引至五十步內然後還擊使敵敗覆於此連戰兩三日無不如所算敵大沮陳亟遣張鴻遠部詢悉我軍弱處猛攻振五恐弱者敗而强者無守志乃隨騎兵六七名冒炮火往援寶山力阻勉其更爲所以勝者振五素禮待寶珊且極敬愛至斯勃然怒於言寶珊不得已先行振五繼之飛一彈中目而殞其時搏戰正烈兵士憑壕抗殺不相知聯軍將士一尊約束擊敵敵因大敗潰退兵士始知振五陣亡皆哭失聲寶珊恐爲敵乘商諸子明星夜退回三原

以保留張董之精神君歿日正北虜入路進兵之時噩耗傳來使我含哀而不敢哭悲乎悲乎君弱冠入曹印侯幕而師事之余與印侯爲同去友每見必稱君初相識於戎馬中未敢輒深許越月印侯爲陝大吏所忌幾殺之印侯舍部隊偕君出潼關隱姓字混跡魚鹽使君與我從此不過焉而以富商大賈相周旋而已何成就至全國安危所繫之身而竟長逝耶悲乎悲乎余知君之異凡衆也不因於師不介於友余二年入京至鄭州同鄉負販子二十餘輩嘲君之食不知美衣不知華貌纍纍而口期期時集勞民野夫密談古今人物之卓絕者今則效之余始知其有心於世余欲見君深論君適從印侯往來滬漢未幾滬甯難作勿幕邀余渡江會印侯有所謀方喜藉以晤君行裝已備知印侯事洩繫湖北獄君皇皇哀求於四方卒出印侯印侯謝客養疴西湖韜光寺君侍疾讀書其中印侯病歿君扶柩返葬華麓余往哭印侯會葬數百人君雖默然無語深情依依言必稱余曰先生余惡先生之名太濫命呼之爲三兄君於印侯墓所奉郭希仁命建共學園樓高近十丈藏書數萬卷以爲他日共同退休之所今竟不可得而獨使余哭印侯哭義安又哭君於壯盛之年耶悲乎悲乎袁世凱謀帝制山陝甘民黨健者景梅九李岐山續西峯鄧寶珊等鼓吹大西北主義與冀北僭號者相抗散居清涼原窟甚君適在三原主大有

公司事余投資假爲機關飲食醫藥之費舟車轎馬之資不使稍缺其計劃精密有過人者初余病續西峯遊日本李岐山省城事敗景梅九被執君勸余潛逃余不肯哭勸曰此時可無我不可無公岐山妄動於康吳村及富平縣皆敗河北之隱情已不能密偵騎且佈滿四郊君與寶珊言曰不動卽爲人制乃各懷炸彈會李虎臣之衆入櫟陽攻固市戰荆姚繞流曲鎮馬額鎮涇陽縣克醴泉圍咸陽而袁世凱死自三原分散後意君必不免於難無聊問卜卜者謂聞董君治事勤與人忠周身花班如龍鱗當富貴壽考以終富貴非君六壽考余所希今雖殺卜者以止其妄甯有濟耶悲乎悲乎笠僧被騙入固市謗言繁興羣集於余及陳氏又設騙局出笠僧余復力言以爲不可無識者斥余爲不仁不義因痛念十年馳驅千里結納不能行所主張反爲軍魔政僉所困欲自殺會烈友於地下共白心曲君慰余曰公身望所歸也怨所叢也山行必崎嶇水行多風波無艱難困苦不足謂之當大任公其勉維危局豈知君歿之後更難於前滿腔塊壘將向誰訴而誰寬余也耶悲乎悲乎君讀書不多習兵未久收殘卒屈大敵論者每與古今名將爭高下聞人志士愛君之一往直前而重其死也羣祝頌之君言與義安圍長安時曾論南北爲閭牆之爭藉以操練兵馬禦外寇耳相約事定絕交遊分處同州鳳翔一意練兵編制之法別

有心得雖德英日法百戰百效之書有不盡適用者嗚呼使君終助義安陝西之軍聲當揚海外無我安君亦能繼行其志於將來乃竟無子息以歿叔族莫不悼惜尤天余謂民之視君如父母而君之視民則子也余重惜天下之民失乳哺何君死之小也悲乎悲乎君名威字義五扶風重氏亡年二十有五詞曰

車必有輪兮員於輻矢發以拔兮利在鏃槍斯人之竟天兮吾民佛福生芻以爲弔兮念彼空谷吁嗟天不生子兮則亦已矣或予不予識兮又將焉訾天既生子予已識子兮云而過死從古大地無終否兮何靈離之數化而奪余美地維解兮天柱圯雲慘慘兮天無氣招魂四方兮諒難得使我淚盡兮心酸惻

黃監院監祭委員楊仁天先生墓誌銘

于右任撰文並書張繼篆書

先生諱仁大陝西藍田縣楊氏年十九入府庠繼選優貢受業於牛夢周先生清末入中國同盟會辛亥陝西舉義隨曹寅侯先生起兵渭南任敢死軍標統曾與醴泉甘河之役陸建章入陝大殺黨人渭北逐陸軍起先生多所盡力陝西靖國軍時先生在第三路歷任隊長參謀遇事識大體十五年西安被圍八月先生時居城中圍解後予入城先

生述市中餓死者屍骸多未掩埋乃命其收骨數千具葬之城東北隅軍民數萬負土成墳卽今所稱之負土墳也十九年南北用兵先生與甄士仁等密組民軍二十二年任監察院監察委員抗戰軍興派駐西安於撫傷兵慰難民及調查政治均悉力從事近以來院述職九月四日屢在渝西郊小龍坎遇敵機轟炸受傷逝世享年六十子五大乾永乾遠乾篤乾振乾女二綠竹蕙俠孫女一端容先生性果毅弱冠後親承關學以道自任不盡其用哀哉中央念其効忠革命明令褒卹並給治喪費五千元十月六日大乾扶柩歸里十二月十八日安葬於宋呂氏四獻祠北銘曰

扶義戴仁肫肫儒行關學之功著於革命小龍坎之亡敵四獻祠之風勁迓靈爽兮來歸示民模之真性

中華民國二十九年

蓮舌居士蒲城李桐萱先生暨元配馬孺人墓誌銘

蒲城王頤撰文 長安宋聯奎書丹 富平高樹基篆蓋

嗚乎吾友李同萱先生游戲人間殆所謂竟體皆旃檀香而無一能亂者乎先生與免仲特公均受業先君吉人公門下前後七八年同時入黌序惟時頤齒尙穉詩書粗上

口隨諸長者學綴文先生愛之如弟多所裨益自是兩家子弟以世誼通往來者數十年如一日先生晚歲覃精內典願與同好以故相契尤深今先生已矣願雖譴陋銘幽之文其何敢辭按狀

先生姓李氏諱良材字同營蓮舌居士其號也世居蒲城東鄉富原村祖廉叔公祖妣氏聿父蔚若公妣氏王兄仰特先生有異稟貌奇古廣顙深目高鼻眉間有黑痣大豆許能吐舌作三瓣如蓮生唇際故自號曰蓮舌居士性孤介寡言而善談名理廣座中莊語諧論娓娓動聽雄於文得左國家法不喜舉業故亦不售然先生之學行不以此稍減也先生靈根宿慧生有自來當同治初元先生尙幼與母兄避回亂墜土窟中村衆爭入母忽心悸急易地賊驟至衆盡殲旃而先生全家得無恙知有佛佑稍壯從師讀夜深恍在山洞中燈火熒然出見明月當空萬山皆白即朗吟白雪滿山月滿山鶴唳風聲半夜間清光入面寒即悟前身爲僧數十年於長安市上見阿彌陀佛請供齋室忽有聲曰授汝陀羅尼後之北平遂皈依格西喇嘛而敬信三寶奉密教焉豈偶然耶然余竊謂先生讀書能會其通不爲前賢所囿故能出入經史貫穿百家而獲見佛學之大嘗曰菩薩惟五蘊皆空故能度一切苦厄無爲而無不爲是寂滅相是不住相是實相舜之飯糗茹

草衫衣鼓琴若終身若固有亦此理也此儒佛心印也彼襲爲者烏足以知之光緒丁丑陝歲大侵先生苦饑糠粃和黑豆爲食冬日手足皴瘃至不能著襪履讀書猶琅琅作金山聲設帳華州某富家一言不合而去曰義不可留也丙午蒲城高小學校校長常明卿爲邑令構陷瀕死且興大獄先生在省竭力營救得平反曰義不容辭也性孝友父蔚若公及母王孺人先後沒哀毀骨立哭不成聲至得哮吼氣逆症事兄仲特公終先生身無一言牴牾其大節彪炳如此洵非硜硜自好者所所能爲而及謀社會之利益民智之開發教育之普及則又寤寐飲食惓惓不忘者王寅歲先生在同州與張百雲組織求友學堂以科學倡後進風氣閉塞譏訕叢集旋已宣統庚戌各省設諮議局先生爲副議長大吏弗便公文來往吹瑕索瘢先生據理抗爭民氣爲之一振辛亥革命軍起陝西首先響應先生與黎黃陂有素思有以聯絡之挺身膺代表赴鄂渚道經武關幾瀕於危民國紀元教育廳派充全國讀音統一會會員開會首都多所建白今之通行國音字母卽當時所定也返省後當道聘書修革命史公暇與同人組織易俗社以改良戲曲移易風俗爲已任聚徒數百分班授課戲曲之由先生手自編輯者六十餘種皆有益風教之作晚歲深悟普及教育非注重兒童及成年失學者不可乃爲識字紙牌號曰民行集其法見集

中以試教兒婦幼孫入之以漸毫不覺苦幼子隼九歲耳聾猶能以國音字母教之通文義工圖算先生蓋將以行之家而有驗者推而及全國也綜觀先生忍辱苦行本大無畏之精神行方便之慈悲言論行事何一非自般若光明海中自在流出哉若夫壽躋耄耋家庭雍熙其子若孫蜚聲中外政界學界醫科工科均能以所學卓然表見舉世所忻慕艷羨祝禱而不得先生處之泊如也茶餘宴坐時嘗語頤一吾無始以來如此身世不知幾生幾滅矣緣遇則聚緣盡則散曇花泡影吾何戀乎頤聞之如遊危峯遽澗中聞懸泉滴乳松籟徐吹五蘊聚落一時寂杳矣嗚乎先生生於清咸豐庚申年冬月初二日卒於民國二十一年二月二十日享壽七十有三元配馬孺人同邑蔚亭公女婉孌淑慎事翁姑孝能得歡心光緒戊戌八月先生卒生子五博協枋杜戒杜戒早歿幼年二十卒博出嗣兄仲特公京師大學畢業歷充教育要職協遊學德國工科畢業歷辦引涇導淮及民國辛未江淮水災工賑現任陝西省政府委員兼建設廳長繼配韋孺人生子男隼女班滴唐得源孫賦京賦都賦林賦豐賦鎬女孫賦蕭賦艾賦蕙博出賦寧賦洋協出京都林畢業德國及國內大學俱服要務以民國二十一年三月十八日與孺人合葬於蒲城祖塋子首午趾銘曰

邈矣先生志潔行芳匪夷匪惠不老不莊儒佛消釋獨守心王室有賢婦曰扶風鄉
迺及先生維德之行昔也悼逝今獲偕藏浮根漚謝茂緒遐昌佳城鬱鬱猶時聞菡萏之
香

三原朱子敏先生墓誌銘

富平郭藩撰文 富平馬庸中書丹 咸陽張靖篆蓋

三原爲關中名區山靈水秀實生魁傑元勛耆碩代有傳人唐李衛公靖明王端毅
公恕其最著者也今季六月其東鄉朱子敏先生卒於里第遠近聞者痛老成之凋謝相
與歎息陝西省政府主席邵公力子西安綏靖主任楊公虎城派員吊奠致賻千圓塋有
日矣其子秉彝以書暨安邑景梅九所爲行狀來請誌墓之文藩與先生交且久義不容
以不文辭爰述生平所歷概略並論次其所以爲銘之義藉以永厥傳焉先生諱思聰子
敏其字自明洪武以來世爲三原朱氏幼讀書不屑屑爲章句學清季嘗爲陝甘總督掾
累功保知縣以親老辭歸辛亥改革與井公勿幕策拒清軍事後不言功袁氏盜國佐胡
公笠僧樹護國之勳靖國之役主總部軍需又與岳公西峯守渭北宏濟艱危能人所難
胡岳兩公相繼督豫岳公後又統南路軍先生皆在陝任後方司令又爲陝西財政廳長

主持大計厥功尤多當靖國軍時渭北一隅大軍雲集餉糈時匱先生推誠相與民樂輸將嵩軍圍涇原先生與田公潤初堅守半載嘗以私人負責貸財濟軍賴以待援解圍胡岳兩公卜塋華麓先生均爲經紀喪事期於妥善後遂杜門深居從未干謁當道楊邵兩主席高其行誼先後聘爲省府顧問本年四月其夫人劉氏疾卒縣寓歸塋于其鄉逾月先生卒春秋六十有四在生不治私財年荒而家人啼飢身沒而無以爲塋亦可謂難矣自軍興以來未有若斯人者也子一秉彝女二長適同縣王正書次適富平雷普澤孫男二均幼以民國二十五年十二月九日塋于其鄉先塋之次辛酉乙趾銘曰

茲山曰荆茲水曰渭誕孕厥靈曰朱先生其德觥觥忠信廉貞轉粟輸兵鄼候是程返宅佳城松柏青青可朽者形不滅者名陵圯谷傾視茲刻銘

男秉彝泣血納石

長安張炳彥刊石

朱佛光先生誌銘

朱先生諱先照字漱齋晚年改字佛光陝西三原東鄉朱家灣人自謂明秦王之後裔幼時受太夫人侯氏之教卽以種族革命爲己任年廿餘設塾城中學生遍一邑中式

光緒癸巳科舉人甲午以後以外患日深遂究心於經世之學謂中國改革非科學經學並重不爲功乃與孫君芷沅發起設勵學齋廣購科學書籍報紙以勸導有志之士而西北結社之風自此開新學知識亦由是日啓是時康派學說風靡天下先生乃著康氏糾繆並指斥其政治主張之錯誤右康者疾之復盡力與之爭戊戌後自信益堅而倡導加勵及聞中國同盟會成立見孫先生之演說則勸學者加盟以響應於西北對於保皇立憲諸說隨時隨地指斥其非由此益定西北革命思潮辛亥起義西北主持革命者多出其門陝西都督府辟爲顧問先生仍以教授自給嗣知袁氏將盜國乃陰結同志鼓吹救國不稍懈民五爲某中學教師以氣衰失足折其一股愈後乃扶杖以行民七陝西靖國軍起遂棄督署顧問而歸及余領靖國軍設總司令部於三原請其每日至總部講解經史與政治爲備肩輿則不願乘並任兩中學教授每日扶曳葵杖蹣跚出入顛頓街衢同課畢則在街頭買一餅一粥以了一餐而所事則時間不少誤即風雨泥濘亦不稍避某日天大雨余使人勸其少息先生曰天雨能阻我乎其堅苦真摯之精神當時軍人學省多被感動靖國軍得爲長期危難之支持反革命文化之傳播實先主精神之所激勵也嘗聞昔人遇父言慈遇子言孝我則遇人言革命而已又言平生跼蹐關內研究經學未

能與海內經師一遇提倡革命未得一見孫中山先生此願復何日償今欲以垂暮之年跋出關門而關內外戰爭又不已爲之奈何蓋其時年幾七十矣及余十一年出關請其南遊乃未及而逝矣先生容貌奇古氣宇軒昂善談說終其身從事於教育爲人講解經史疑義科學新知革命原理常數小時不少倦而風發泉湧談諧雜作愈久而趣味愈永故所至莫不喜悅生平不喜著作而好講解每獲新知輒抄成帙爲學生講論後卽隨手散去少時習程朱之說嗣專致力於經學小學以許鄭爲歸於前清諸經師所述作無不遍覽博涉記憶無遺旨而於朱氏說文通訓定聲尤多所致力當時長安毛俊丞先生亦以經術授學者先生與爲昆弟交故關內稱朱毛二經師讀書筆記盈數尺晚乃盡棄之專心內典以爲談哲理者莫能出乎此也卒於民國十三年八月三十一日享壽七十有一國民政府以先生之道德學問爲西北泰斗畢生致力革命興起者多乃令給治喪費二千元門弟子因發起公葬購地爲園於邑之南郊謹擇於二十四年一月十四日安葬以誌不忘夫人張氏子志筠前逝孫自強銘曰

畢世窮經復革命關學門庭易許鄭以身許國毋不敬雲興西北兮老且病一筇一足與物競鏤而不舍見至性南望鍾山景行行爲天下式兮至於聖

受業于右任恭撰

胡公笠僧墓志銘

維中華民國十四年四月十日國民軍第二軍軍長河南軍務督辦胡公勵生薨于位春秋三十有四天下惜之越十五日歸骨于秦庶民塞道涕泣欲從治喪者定于十一月十六日安葬華山王猛台下以余知公囑爲文埋幽質遠按狀公諱景翼字勵生亦字笠僧陝西富平人生而魁梧奇偉初入學聞鴉片中東諸役每畫鷹與日形以射之賣史慕徐達驅元之功自號中山朋輩因戲呼之爲中山王宣統二年春入同盟會倡議結新軍中會黨與渭北刀客且介同志井勿幕錢定三李仲三鄒子良等一再盟于雁砦寺傳播革命真義秦中革命軍之起有大力焉武昌首義陝軍九月一日響應勿幕任陝北招討使公爲第一標統帶以四十騎大破會黨張南輝于耀縣威名振于河北山西民軍失利勿幕東援升允率甘軍西至攻三水淳化公禦之張戶原血戰終日凱旋疾呼取飲立盡半缶嗣南北統一甘軍退勿幕自請解甲公繼之約張義安赴日入成城學校外蒙獨立學界推爲征蒙軍代表至滬知袁氏意別有在遂止三年一月復渡日時民黨多亡命東京設浩然學社肄兵公亦與焉得遍交南北英俊將歸國余介謁孫公中山孫公囑以

陝事曰俟破京後再迎先生公偕馮毓東歸國道京津約劉守中入山西結三晉民黨謀討袁未成歸陝入第三旅教導營軍官連畢業編爲游擊營營長有百餘人駐富平洪憲改元陝督陸建章助逆尤力各省民黨多失根據謀由西北發難建章知渭北多黨人盛陳兵仗親出巡以警之又令其子承武率精銳模範團按行富平公商之武觀石石象歲等決議佯迎承武入縣署伏兵夜半起激戰兩日夜降其衆生擒承武猛溥西安城下建章哭乞盟不半月而陝局定嗣陳樹藩督陝僅編爲中二團團長移防商縣抑志練兵民黨之基本隊伍十大連田是練成六年夏西南護法軍興陳督加入督軍團耿直計擊不中退守歧山公奉令往討惟助陳助耿皆非所願張義安知其意十二月舉兵三原與陳部鏖戰三日破之公馳至樹陝西靖國軍職陳軍來攻破之義安渡河圍西安又連破陳軍陳急迎劉鎮華部入關義安力戰死公痛失良將調隊渡渭而陳又自將來攻襲戰關山之間數月會麥熟下令停戰俾民收穫陳軍亦不能進是時兩軍久相持余問道歸聯合諸軍推余主持軍事繼爲固市守將所紿單騎往被逮入省以死國自誓陳使歸約以所部降弗允忿破建章功亦不加害幽于署角小樓中潛心經史規摹行草積二年所學大進得日記尺許九年秋皖敗于直得釋河北人民如狂歸而整軍理財興教育連歲荒

軍餉竭蹶甚而中小學校陡增數倍十年夏直軍入關陳軍敗退馮旅長玉祥爲前鋒余令公助撫陳部徐衆公念苦戰五年民力不繼欲受編余以大義責之去。原公夜半至余家誓終報國竟受編爲暫編陝西陸軍第一師師長十一年三月直奉交惡馮督率部先行公與約輕裝出關將領疑不前乃首先出發水陸兼程東下抵新安值趙倜軍攻鄭急馮軍不能支乞援鄧寶珊李紀才弓富魁率隊馳至出其不意進攻破之岳維峻雲龍又下開封歸德豫定奉直戰事亦解曹吳以公起自民黨阨之置軍保洛間復薄其餉直軍將領亦代不平公委蛇隱忍竟得保全十三年秋吳佩孚集諸道之師攻奉公密囑李仲三劉守中等陰結馮孫中秋夕洛陽動員令下立率全部至通州以餉彈待補充爲辭遲勿進吳因不敢以重兵束遣使促之乃留一旅于通其餘絡繹分布喜峯口至平地泉捷報朝至曹吳方慶幸夕已回師與馮孫收復北京成立國民軍未幾吳返渾扼楊村窺京師公命岳維峻趨唐山李紀才李雲龍協同馮軍進攻戰方殷紀才夜襲其後擄潘鴻鈞等吳逃兵艦直軍之在榆關者亦全潰近畿烽息吳迂道回洛復收合殘部北犯公至彰德與敵遇轉戰至鄭十二月十二日入開封就督辦職網羅各方人才日謀刷新政治而劉鎮華愍玉琨引其鎮嵩軍全部約十萬出陝佔豫西進逼鄭埠公百計求和不得

督師黑石關一戰而劉逆悉死兩省粗安方規畫賑濟收撫潰散而右臂生疔連割兩次自知不起口授遺囑氣將絕猛呼曰英雄至此肝腸寸斷矣公爲人闊達痛快喜習拳術多力體肥重作書至百餘字輒一再寐及覺書未嘗失次或頃刻書數十事分委辦理若寐而構思者然治軍十餘年無時不以愛國愛民爲倡導綜經過戰事無不以少勝多其在關內諸役尤烈故鄉人每競稱之母侯氏終日績紉妻林氏妾盧氏口氏子希仲方十歲公臨危其父角亭公在側撫之曰汝身已許國吾不得私悲夫孝養之子耳銘曰

太華雲開中原天曉振臂一呼豪傑多少爲將爲儒爲僧爲佛胸有千秋心無一物亦孫亦徐亦關亦岳國之少年世之先覺王翦爲友王猛爲鄰古今百戰獨爲蒸民靈兮歸來我亦雪涕十億勞民一聲萬歲

安吉吳昌碩篆蓋

三原于右任撰並書

中華民國十四年九月

扶風王伯明先生紀念碑文

扶風王伯明先生以清德爲天下望革命志節之士於國家方造冀先生亮直之風長在天地以光烈我民祚焉

先生諱兆離少從三原賀復齋先生游繼學於咸陽劉占愚先生二原守理學咸陽重經世之用先生體會旨要既舉鄉試舍去任教職慨異族專制失政毅然入同盟曾從事革命辛亥陝西光復以省議員被選爲中華民國第一屆衆議院議員四年袁世凱將叛國使各省以代表議國體號爲行政議員先生時以安葬本生父宏模公歸里富局物色及之敦促就道峻辭不赴洎國會續開乃入京出席以中國儒家政治哲學是啓太建議議尊崇孔子之道翕然爲時仰重六年總理建護法政府於廣東先生南下出席非常會議被聘大元帥府顧問旋從總理於上海以目疾寢劇就醫北京曹錕欲賄致總統輦金羅諸議員先生憤甚謂人曰國家之敗由官邪也官之失德寵賂章也議員如此代表民意之謂何卽日登車而目痛甚不得已返醫舍持金勸赴選者紛然來其時九城腥沸相視無作羞恥語將選前夕諸游說坳持者復疊至先生益怒咄之曰某平生自有出處頭可斷賄選不可能也事後失明返里常居長安與人對辨聲而已日使人讀書聽之有得欣然忘倦或有述作卽口授書之中央以先生峻慨清操令給金卹贈先生終身蓋異數也二十三年國民政府主席林公蒞陝造廬以故人禮諮問語人曰王先生北方氣節士竟失明可念也先生貌清癯長身修髯持躬廉介不爲物謀至性友愛急人事不

少踟躕晚歲里居值抗倭戰起昔昔問兵事得失日望中興於勉勵子弟忠貞者無不言
嗚呼心乎愛矣非於國家民族明明長視者乎先生卒於中華民國三十一年二月四日
壽七十有三喪聞中央執行委員會暨國民政府主席林軍事委員會委員長蔣暨監察
院院長于成痛哲人唁悼切至陝西省政府賻萬元助葬致禮祭先生著有仁學圖說
仁學緒言讀經讀史隨筆各若干卷其世次子孫誌於墓譜於宗帙者別有載今地方有
司與故舊逮從遊者既備祭敬續德行刊碑以告萬世

劉允丞先生事略

溫良儒

先生姓劉氏諱守中字允丞世居陝西富平縣到賢鎮遠祖端自明初遷鹵泊灘南
柏玉村因家焉曾祖大賢妣氏馬祖世保妣氏李父德習字仲貞在剛直行篤謹受業於
賀復齋先生之門歿後原于右任先生銘其墓墓田半夢周先生爲文以表其阡妣氏
韓班職內凝張箴外則訓夫以禮教子有方仲貞公五子先生次居三蚤歲讀書清梵爲
復齋先生再傳弟子賦性剛毅儀表嚴貌清癯字淵深如秋水一泓孤松獨秀雖在
童年歲者早以遠大許之嘗以苦學致仲貞公成其名讀書爲最樂之事自當尋其樂
處應遵朱子所言循序漸進只不間斷自有進無卽此可知先生之家學淵源而畢生致

力於正誼明道之所由來也秦中士風因受關學之陶冶與夫李二曲王山史王端毅公康僖公馬理諸遺老之薰陶大抵崇尚氣節敦品重行然間有才智短絀之士或拘泥不能以自拔縱多潔己之行而於濟世匡時之道每有遺憾先生資稟既高又復好學不倦故能得關學之精髓擴而充之斯先天下之憂而憂後天下之樂而樂矣此其六十自序中所謂予讀書清麓常有飛越之想者也

民國紀元前三年憤異族之失政喪地辱國遂結納豪俊如井勿幕郭希仁曹寅侯李岐山諸先烈加入同盟會共誓廓清辛亥武昌起義陝西首先響應斯時清將趙倜三陷潼關升允負固乾體先生參與軍幕轉戰東西靡役不從及兩路通和互相罷兵使陝甘毗連之區回漢雜居之民不至慘遭殘殺愈深仇怨此雖出於郭希仁先生之籌策先生亦實與其議陝局言定政情未洽民黨中堅井勿幕痛心紛擾首議裁兵因自行遣散所部一師之衆出關東游曹寅侯亦解兵柄出居漢上先生鑒於本黨同去被殺被逐者目衆以事不可爲遂與胡景翼張義安諸先生偕往北京燕趙豪俠之士多所結納以先生平居讀史素重游俠推許季布侯贏之爲人故能折節於草莽之賢而致其力以盡國事

民國五年袁世凱竊國以洪憲紀元陸建章號稱屠伯督陝附逆殘殺日甚先生與胡景翼岳維峻董振五鄧寶珊等陽設大有公司於三原爲革命機關破產聚客共謀發難命董振五與李岐山約李經營西安董以奪三原駐軍槍械自任謀洩同志身殉者如王紹文等二十餘人董幾不免先生愈憤興軍護國渭北民黨風起雲從胡景翼虜陸建章之子承武於富平因破其軍董振五又下醴泉圍咸陽以窺西安陸懼獻省城以贖愛子而陳樹藩繼督軍事陝禍再起

六年段祺瑞組織督軍團解散國會約法再毀先生乃促張義安董振五鄧寶珊發難三原聯合各路同志樹靖國軍旗幟於渭北擁護護法政府推胡景翼先生爲總司令旋推請于右任先生爲總司令井勿幕先生爲總指揮分道進軍西安連戰皆捷樹藩困迫待援不幸張義安與鎮嵩軍戰於郿縣北原中彈陣亡井勿幕遇害興平胡景翼撫降故市被拘不歸各軍大震樹藩貽書誘降先生以大義覆書絕之激勵將士共支危局其他艱難蹉跌類似於此者不勝指數均能化險爲夷於以見先生困心橫慮素養挾持之大其自序中所謂「四年之間抗八省之兵喪我勿幕陷我立生隔絕我希仁陣亡我義安振五」情詞慘痛不忍卒讀

九年直皖戰起先生計脫胡景翼於難出繼勿幕爲總指揮段閣既倒樹藩亦走先生因以東去但未嘗稍息仔肩

十年直軍入關胡景翼得

總理許可爲保存實力從權改編先生由山西輾轉至滬上晉謁

總理有所請示

十二年奉

總理命同丁惟汾王雲勳兩先生北返布置北方軍事十三年與馮玉祥胡景翼孫岳諸先生樹國民軍革命旗幟於北平迎

總理北上主持國是是役也發縱指使實惟先生而段祺瑞利用時曾復起以執政權先生引爲憾恨擬奉

總理立國民政府於河南不幸

總理逝世胡景翼先生亦於豫西戰後相繼云亡此在先生革命過程中爲最慟心之事迨岳維峻綜河南軍政值吳佩孚新敗之後處豫鄂邊境派間者至開時說岳佯爲卑詞以求親好而陰與湖北之蕭耀南勾結圖謀再起先生欲回新破劉鎮華之師一鼓

而下武漢與岳意相左卒爲降將田維勤等所賣致兵敗嶧陵卽先生自序中所謂予是以有顛軀之辱囚繫運城者半年蓋恨之也

十五年先生居平遙以書史自課兩年之中未嘗一日釋卷

十七年先生有南京之行旋赴蘇杭遨遊山水十八年讀書吳縣網師園於精研小學講求史地外尤喜涉兵學酷嗜孫子十三篇多能發其奧義蓋先生素稱知兵亦深以此自負也

二十年讀書太谷鳳山酌泉寺擬久居之而九一八瀋陽變作國以復出由太原與馮玉祥同車赴南京出席本黨第四屆第一次中央全體會議共赴國難先生爲第二屆中央執行委員此次係以當然委員出席全會被選爲國民政府委員

自二十一年至二十三年之間兩入蒙古徧歷盟旗秦派調查實業則關心國防其於調查實業所得者有察綏盟旗實業調查記關於視察國防所得者則詳載其日記中二十四年始歸富平故里先生追念革命先烈倡議建立陝西革命先烈崇祀撫卹委員會及陝西革命先烈華麓祠墓造林董事會

二十五年本黨第五屆全體大會推先生爲中央政治會議委員二十六年復南遊

讀書無錫之梅園見國事日急乃赴上海意在研求國際大勢先生推想中日戰啓當在明春而蘆溝橋戰釁果於翌年七月七日爆發矣先生由上海繞道至南京武漢旋即回陝明年再至武漢不避艱險有黃河沿線之視察與台兒莊將士之慰問入冬以後寇愈猖獗侵佔我廣州奪取我武漢先生倡言關中不可輕棄謂不守河東則關中不固無關中不惟無兵可征亦且無餉可籌四川雖號稱天府如精金外漏不能一朝有也張溥泉先生甚韙之因聯袂赴重慶向中樞直言國寶得失多被采納是時荆襄南陽同遭敵鋒先生乘馮玉祥先生調查江防輪艦往來荆宜三峽間聞豫鄂大捷乃返重慶繼至成都遊青城登峨眉凋殘滿目愴然傷回後寓居三原每有拊髀之歎時招故所與游愛國志士暨諸豪俠少數輩引犬策騎獵原野間舉山足水涯遇險要形勢之地溫誌之備有萬一得爲國家盡死力其用心之苦有如此者先生行年六十矣於關懷國事之餘猶孜孜讀書不息特約李亮工先生至華麓學社講說文要旨與英人喬惠亭研討歐洲史地索求兩次歐戰之所由來同時且從事於著述有續漢書郡國志釋略補註一書實足嘉惠士林于右任先生壽先生一聯名高洛下耆英會胸有亭林郡國書卽此可以見先生生平致力學術之所在矣先生常以國事憂勞終年多病今歲十月初間因張

溥泉先生有重慶之行由三原赴西安爲其餞別又往華下一展諸亡友之墓並同胡總司令宗南赴潼關視河防工事歸來臥病不起臨終無一語及家事而其六十自序文中憤慨國難詞氣激昂且多追念亡友之傷痛語可以證其平昔所講一倫之義一倫者合父子兄弟夫婦爲朋友一倫也他如愛才重士亦誠動人得英特磊落之士往往數語激發能令振奮拔俗蔚爲國器生平成就識拔之青年不知凡幾殆屬餘事耳至其政治主張就先生十餘年來常以告人者曰「一兵一農」一兵一農者即兵工農合一之謂蓋先生素服膺顏習齋先生兵農合一之說亦即承總理農工政策之精神也嗚呼先生其人傑歟

先生生於中華民國紀元前三十一年十二月二十九日子時卒於民國二十年十月二十三日下午五時三十分享壽六旬有一配土子二奉學上校園長奉衡中央軍事政治學校畢業女三慧貞適陳桃貝菊貞高級中學畢業孫男二澄宇澍宇奉衡出孫女二靜寓奉衡出滋寓奉學出

劉允丞先生六十自述

民國紀元三十年一月二十六日即舊曆二十九年臘月二十九日適爲月盡予六

十年前此日除夕降生今者家人欲盛設爲壽予止之父母兄弟俱存每用錫果鷄蛋紀歲時而已非所好也其後馳騁於東西南北無人致念予亦從而忘之矣追思六十年間大低皆在悲慘之中清光緒七年予呱呱墮地伊犁條約成四歲有中法之戰法割我安南十四五歲有中日之戰日割我台灣逼迫我朝鮮十七歲德佔我膠州灣法佔我廣州灣二十歲義和拳超八國聯軍入寇破我京津滿政府奔竄西安二十一歲定辛丑條約賠款四百五十兆兩二十四歲日俄之戰朝鮮取消獨立并入日本版圖予此時讀書清室常有飛越之想予是以有與同盟會之結納三十一歲武昌起義陝西首先響應東西戰爭無役不從兩路通和亦得與聞其事三十三歲日本佔山東強我承認二十一條件三十五歲袁世凱竊國以洪憲紀年予是以廣招亡命破產聚客興軍護國陝人所謂逐陸之役者也三十七歲段祺瑞巧於自謀對德宣戰加入協約國張勳因而復辟安福系解散國會中華革命黨黨人多與予結合予是以興陝西靖國軍擁護護法政府四年之間抗八省之兵喪我勿幕陷我立生隔絕我希仁陣亡我義安振五卅八歲予父見背僅居喪百日墨經以出四十歲予母繼逝值諸同志欲率軍就北洋編制以存實力予營葬後潛匿山西絳州平陽平遙太谷等地正欲東出以直皖戰見阻四十二歲胡立生

岳西峯分駐彰德順德迎予與處予少作周旋由武漢赴南昌北伐軍敗退贛南予復由九江東下至滬孫中山先生又經失敗先我而至黨人嚮慕張溥泉奉命邀予夏加新盟予允註籍而不願作誓此與辛亥以前之意無二致也四十三歲予不肯從孫先生居廣州取慧能不應徵長安之意爲喻慷慨而北過徐泗遊青齊抵天津胡岳適來爭致殷勤兼與段祺瑞張作霖派時有接洽見馮玉祥孫岳亦在此時終未以孫先生相屬之語見告也直奉離合無常予是以有鄆鄆叢台之臥隱北京戲院茶寮之浪迹矣四十四歲曹琨賄選總統予連絡馮孫胡岳十萬之衆於是定約立國民軍爲首都革命既迎孫先生及黨人北上矣而不以誠見待囚曹琨而不固逐溥儀而不殺予是以與各將帥在若即若離間也四十五歲商諸立生求孫先生介紹俄代表鮑羅庭由蘇聯接濟大批軍火擬奉孫先生立國民革命政府於河南不幸孫公與立生相齟齬謝予是以有顛軫之辱囚繫連城者半年遂改名留連城予本名守中字允臣兄弟五人道業中正四人皆吾父敦請大先生賀復齋所賜嘉名允臣又犯先輩寇某尊諱甯洲高義亭先生欲易曰蘊沈民國改元以字行者成爲時尙予兩存之以求率真惟臣字乃僕賤之稱或呼以丞予以丞亦事人者里舉凡吾國前此之恥辱後來之慘痛將見爲人臣爲人父之不如也予何

員會及華麓祠墓造林董事會逢張錫與共產黨互爲聲勢倉卒發難囚蔣介石於西安新城大樓世界注目國內鼎沸予以坐困愁城三家旋卽敗盟不意天大風波迎刃而解矣五十七歲寓無錫梅園上海愛麥虞限路擬研究國際大勢推想東方戰端當在明春而七月七日蘆溝橋一觸卽成大戰陷上海棄南京予走後賊皆跟踪而入矣五十八歲由武漢飛陝再至武漢敵機濫炸各城市予是以有台兒莊之鼓舞黃河沿線之視察入冬寇攻下我廣州奪取我武漢陝西軍政當局或欲輕棄關中而苟安漢南也予謂不守河東則關中不固無關中不惟無壯丁亦且失餉糈矣四川雖稱天府如精金外漏不能一朝有也張溥泉蹙之促予聯袂至重慶國策之失多所指點于是蔣白兩氏大招文武會議于武功農林專校始有堅守陝西以安北方之決議焉五十九歲元月元日鄭州陝西會館團拜予向同鄉演講秦人往古盛德予北人也不忍北之之水深火熱將歸而與共危亡然其時荆襄南陽同罹敵鋒夫地理之勢隨山川而東此時北歸正中敵分我爲華北華南華中之毒計矣乃乘馮煥章調察江防輪舶往來荆宜反覆三峽豫鄂幸而大捷折回重慶僅一時許敵機狂轟此五月三日事也四日繼炸全市照耀如洪爐從者學悌奉敏同遭掩覆生命幾殆奉學小事攜孫女由桂林適來亦有損害予於是與之狼狽

遷居成都又炸予於是遊青城登峨眉慘炸嘉定之機復襲擾山中無何蘇德協定歐戰暴發予於是整裝下山與俄新大使潘友新款談於林主席筵上追念前使陸幹支屢浼人約予爲之講授中國歷史與孫子十三篇之懇摯不禁慨然予由成都飛陝西陝西幾無縣不炸郵機亦從此日停航誠巧矣哉是後陝甘兩省日必十餘架或三五十架或七八十架甚或百架以上無地不擾無時不驚予自傷脾裏肉復生於是呼喚舊侶大事圍獵六十歲抽演四史溫習左傳特約李亮工至華麓學社講述說文要旨家居三原茹卓亭亦治說文時發新意更約英人喬惠濟講歐洲地理歷史與民族殖民及於兩次歐戰之所由來讀書雖至樂而圍獵不廢也從前六十年皆 父母之年歲數盈縮予不得而專焉從今而後爲予復生之第一年兄弟妻子均年長於予數十倍年曆不知新舊黨派無分彼此兒既生兒女亦有子所餘未了之願以不了了之耳予或時作喜笑怒罵則視爲嬰孩孺慕枯骨驚夢可也留運城姓不承於古名非取於地惟篤朋友一倫所謂君臣父子兄弟夫婦不過古人一時假名耳若欲緣用各自任意牛馬鷄犬本非自呼僮僕皂隸由人傳稱倘有人更道及予前六十年交四海之衆連百萬之師主張軍事任國一兵一農等精義予亦認爲山童野老談天說謊而已平原禰衡本孔融之論譬父母若甌噐

寄盛其中豈盡無理而必躋身於獨行蕩家破產毀肢滅性取孝名於枯朽無知之骨亦見其用心偷薄矣儀禮喪服傳曰年十九至十六爲長殤十五至十二爲中殤十一至八歲爲下殤不滿八歲以下皆爲無服之殤蓋在古生死之分皆有定制遺言薄葬云云斯爲巧求於兒孫也若再度旣冠當與世代賢豪并轡聯鑣首問俄帝所侵伊犁之地非古烏孫國乎赤俄所據庫倫非我和林格爾乎康藏印緬不使英夷立足安南暹羅不容法泰酣睡日美必成鷗蚌吾爲漁人待時以俯拾之耳然後小豁胸臆宏揚國教庶幾不負生我者與我所生者矣古人云一死生爲虛誕齊彭殤爲妄作真通論也若齷齪從人附於降王之班予父祖不以庸爲嗣予子孫將以爲俘虜矣可不懼哉可不勉哉

華麓陝西革命先烈祠墓記

溫良儒

陝西革命先烈之葬於華麓者墳祠旣已成立咸謂不可無記以良儒隨諸先烈久

屬記其事義不敢辭乃爲文曰陝西革命軍之初碩然爲世真儒以先覺領導後進而集陝西辛亥革命之勳始終身任其艱功成乃超然遠引畢生以改進社會民生爲志事學足以濟時識足以成務德足以範世凜然臨大節而不可奪者一人曰臨潼郭先生希仁氣量包山岳胸懷如光風霽月真誠篤摯之氣充沛眉宇間磊落嶽奇與人握手談

語語出肺腑識者皆談爲奇男子而當大難遇險阨未嘗不毅然以身任之者一人曰臨潼曹印侯先生樹勳

有蓋世之略濟時艱而成大勳發縱指使未嘗挫敗一時英俊特出之士皆樂爲用雖疲散烏集之衆一經鼓舞無不爲之爭冒白刃視死如歸其用兵雖古名將無以過平生志量操存殊有似宋之岳少保者一人曰富平胡立生上將景翼

以良平房杜之識終始主持陝西革命軍幕府團韓彭絳灌之屬爲一致而終身不失儒者氣象出處本末類李鄴侯之所爲者一人曰富平劉允臣先生守中

是皆陝西革命先烈皜然在人耳目而並葬於華山之麓者也蓋三人者皆與郭先生爲道義交而劉先生與郭先生氣誼爲尤篤也

曹先生於民國二年卒於浙之西湖翌年春郭先生命門人董少將振五歸其喪公葬於華麓王猛台前四年郭先生來華麓乃爲曹先生治墳園園內起屋數楹名其園曰共學園而講學其中當是時袁世凱帝制將成先生思有所爲高陽孫禹行天水鄧寶珊嶧縣續西峯臨潼劉靄如藍田楊仁天乾縣吳希真皆來會已而陝西革命軍遂再起遂袁所置將軍陸建章以去世所稱護國之役也先生講學共學園時常曰待國家事了當

來此共學此名所以誌也雖先生之徒亦以爲然而寧知共學園一隅不復更有先生之足跡也耶

郭先生之卒在民國十二年其時先生之徒多隨軍遠出無以議葬事家人遂葬先生於臨潼先塋其後劉先生乃並祀先生於共學園以其爲先生講學處也

胡上將民國十四年卒於河南軍務督辦任公葬於華麓其墓在共學園西北且於墓之西南建胡公祠自是華麓一區遂爲陝西革命先烈歸骨之域

十七年蒲城岳西峯上將維峻殉難於鄂北之新集中樞憫公死事之烈既優予褒揚而鄂陝豫三省人士感念勳德乃公葬於胡墓之東並立祠祀之公墓側有梁子璋等九人墓蓋衣冠塚也九人者皆從公於新集之難而其屍俱不可得九人姓名暨遇難始末詳於碑富平田潤初將軍玉潔既賁志於鄂中竟無以得其屍乃爲誌銘爲櫬納衣冠與岳公之喪同時來歸葬其兆在胡祠之南范君升初十四年二華之役殉職馮將軍子明葬之朱文公祠南視其旁塚壘壘者皆一時同難之衆悉國殤也

馬將軍克齋之塋在文公祠西其卒在民國十六年其後衛將軍總成之喪由豫來

歸葬雲台觀南

玉泉院之西朝元洞內有靜觀樓者爲已故直隸軍務督辦高陽孫禹行上將岳讀書處孫公既卒乃就其處立祠祀焉蓋民國十三年國民軍一日夜擊破曹錕數十萬之衆於榆西使北洋殘餘軍閥掃地以盡當其時國民軍之聲聞四外而孫公實長國民第三軍從事最力者也公與陝西革命諸先烈游最久交最契平生又最愛華山且公讀書處故祀焉

國民政府既建劉先生任職中樞每來歸輒至華下省視諸先烈墳祠感念平生知舊所與抵掌談天下事者半歸泉壤往往低徊留連歎歎不忍去於是謀封樹之不殘於樵採享祭之得以時舉而諸先烈之祠之不廢於學也乃成立陝西革命先烈華麓祠墓造林董事會延聘董事若干人以主其事蓋凡諸先烈昔日賓從子弟多與焉計以祠墓之餘地造林卽以樹藝之所得作守護塋壠及以時祭奠之費又以其餘組華麓學社以爲諸先烈後嗣教育之需且本郭先生之遺志欲藉以闡發關學提掖後來使皆得成爲大器具材蔚爲時用並募建學社社址大樓五楹於胡公祠內棟宇甫落成於二十六年而抗戰軍興凡劉先生計劃之有待舉行者一時皆無以實現而劉先生亦竟卒矣先生卒於三十年十月卒之既月乃公葬先生於胡塋之南胡祠之東岳墓之西

臨潼段君澤青之墓在太素宮北君少負重名受知於劉先生常從胡岳諸公游參加首都革命其卒也王復初君輓以聯曰賈生才大難爲用李廣數奇不封侯亦可概見其爲人矣以民國三十二年來葬去劉先生之卒未三年也

嗚呼諸先烈已矣其德業事功皆足以佈信史而傳無窮良儒獨自念平生師友之誼話言猶在而墓草已宿俯仰之間都成陳跡可勝痛耶蓋陝西辛亥革命軍起良儒隨曹先生於軍中迨胡公之革命首都督軍中州也良儒居其幕下岳公繼督豫良儒任職左右良儒之識郭先生與劉先生也曹先生實介之良儒之得不廢於學也郭先生實勛之而劉先生則更終始啓誨於良儒者爲多撫念平生知遇之感又不覺臨風而隕涕也
中華民國三十三年十二月扶風溫良儒未定稿

華麓學社工程記

溫良儒

華麓一隅旣爲陝西革命諸先烈祠墓之所在劉先生允臣張君德樞牟君文卿爲謀久遠計議組華麓學社以爲講學之所乃建大樓五楹於胡公祠內以爲社址其工程經始於民國二十六年四月越三月而工竣背華嶽而面渭水登臨遠眺三輔形勝如在掌上樓之左右有屋翼然通於兩端其上爲平台其下爲窟室樓之西偏有屋五間沐浴

之室庖廚之屬在焉樓前爲二門再前爲大門門之西屋四間爲車室工既竣題其樓曰華麓學社劉先生又親題二門上三字曰亦待齋昔顧亭林先生有愛於西土士風之醇其友華陰王山史因築一室署曰待齋者於華下以俟之其後顧先生卒來定居劉先生蓋取山史之意亦欲待天下賢者至而共相討論於學耳嗚呼何圖先生之志未竟而忽已下世可爲深痛已華麓學社之建雖不屬於胡公祠而借建於胡公祠內者借地也其管理之權交諸陝西革命先烈華麓祠墓造林董事會蓋爲永久紀念諸先烈也是役也樓屋及前後屋共費二萬三千元皆集資爲之集資者劉先生允臣岳上將夫人及牟君文卿張君德樞與良儒也而設計督工終始其勞則尤推張君德樞焉例得并書扶風溫良儒謹記魯橋茹欲立爲書之中華民國三十五年二月陝西革命先烈華麓祠墓造林董事會立石

王伯明先生事略

溫良儒謹撰

先生姓王氏諱兆離字伯明世居扶風縣之七里橋高祖文榮字受天事繼母以孝聞有智略性勤儉故家業日隆興平馮孝伯先生光裕爲撰七里橋王氏書香發祥記配氏李曾祖虛堂博識強記經史百家與夫醫藥卜筮之術靡不究尤邃於醫著方症便覽

眼科經驗補虛集濟陰備類家常必需胎產三十二問等書尤工寫生所繪晚蒸軸先後時賢題跋迨滿配氏白繼配氏巨氏王祖星樞字璇璣少聰穎能文多力嫻武術累於目疾以諸生終王太蕤先生用賓爲撰神道碑配氏楊父世昌字威廷配氏康繼配氏李氏趙本生父世規字宏謨易士而農性和厚克勤於家生平不求神問卜配氏李于右任院長爲撰懿行碑

先生字午橋後從賀復齋先生問業爲改伯明貌清癯持躬甚嚴篤於義臨事不苟性剛方而遇人則極和熙少學於祖比十歲六經四子書皆上口入庠後負笈清麓求爲弟子不數月乃恍然於爲學之不得綱領而賀先生之教果有異於尋常者乃精研宋五子書篤志力行以爲讀書之樂得未曾有賀先生故後入涇陽味經書院受業劉古愚先生蓋賀先生之學篤守紫陽家法以正誠爲基而嚴於踐履劉先生之學無漢宋門戶之見而必歸於實事求是正課外兼及史地算數織紡蠶桑又多取報紙雜誌令諸生遍閱之使周知世務此舊時設教者所未有而關中人士之維新亦以此爲權輿焉先生既從賀先生久飽聞修己治人之要又從劉先生學饜飫於經國藥時之方於是曉夜孜孜以爲學者欲大有爲捨劉先生之學其又奚求作仁學圖說及仁學緒言闡明仁孝一體之

說領鄉薦後歷任鳳翔西安各中學教職時值庚子難後外侮日亟民生日蹙政治日腐才智之士憂之咸以喚起民衆刷新政治力圖自強爲職志報章鼓吹靡不在此而中山先生所倡導之同盟會收志士遍於全國先生鑒於當時官僚之暮氣已深政府之頑固守舊乃於宣統二年入同盟會求政治上之澈底改革焉

辛亥革命成功先生當選爲陝西省臨時省議會議員省政府旋任以宜川縣知事堅辭不赴民國二年當選爲第一屆國會衆議院議員當時雖改建共和而袁氏當政對兩院議員勢迫威脅或啖以金錢以是受其羈縻而爲之游揚者衆先生獨以不能舉其職爲憂四年先生以葬宏模公歸里是歲袁氏謀帝制命各省選舉代表會議解決國體問題所謂行政議員者也當局物色及先生促赴省先生力辭不往

七年應廣州國會之招至粵被聘爲大元帥府顧問十年隨總理至滬先是北京政府挽議員欲令勿去粵不得則厚其餽廩例俸外更倍酬之組經濟調查局司其事又派王揖唐至滬留議員使無南去議員受其請者皆領款於哈同園無復顧忌先生謂同鄉議員寶瑞卿先生曰傳謂國家之敗由官邪也官之失職寵賂章也議員代表民意而行爲如此時事可知

十二年大選問題起直系軍閥曹錕謀當選所以籠絡議員者備至先生時以目疾增劇就醫北京爲曹奔走者勸之出席大選不爲動選期前夕又以厚利啖先生曰但一出席舉某人聽自便卽畢生可無慮衣食矣先生曰某平生尙未謀溫飽若迫我甚是我畢命日也其人相對嘿然遂巡却去其後首都革命國民二軍軍長胡筭僧入北京訪先生詢拒選事笑曰我若後死者必爲先生誌墓之文蓋拒選議員當世所共目爲清流者而先生之事尤人所難云

十五年後累於目疾同陝益劇乃令人持一卷對面之先生坐聽以爲常中樞以先生清德雅望重一時惜其以勞致癩瘵乃明令年給養老金特典也

二十三年今國府主席林公至陝訪先生於寓廬清談而已蓋先生與主席同爲第一屆國會議員在粵時過從尤密云先生晚年家居值鎮戰事興徵發補充之事地方人士每求爲請於當局先生既嘗以國難方殷必有財者輸財有力者輸力而後有濟又向當局述民間疾苦未嘗以勞艱言鉅而惜其力也

三十一年二月先生偶患寒疾霜令家人日誦新聞紙聽之不倦不意病日增遂至不起訃聞中央及地方黨部國府主席林公帥蔣監察院院長于皆有電致悼焉先生生

於中華民國紀元前四十二年十月初八日卯時卒於中華民國三十一年二月四日午時壽七旬有三配氏白側室馬繼配劉子二憲周即少明白出中央陸軍軍官學校畢業現任陝西保安第七團團長憲昭本先生弟象離子先生養以爲子孫男二長安濟安憲周出中華民國卅一年二月二十二日王伯明先生治喪處謹述同邑後學溫良儒謹撰

郭希仁先生事略

先生姓郭氏原名思清字時齋一字思哲後改希仁以字行世居臨潼田市鎮之遊方村曾祖秉高妣氏任祖興翰妣氏劉父安義篤信好義母氏王慈惠勤儉井臼躬操皆以德行聞於鄉里妻孫子二長家春次振岳女三長適同邑張德齊與家春俱職水利局能繼先生之志次適渭南曹育駿季適渭南常孟民爲一時彥先生生清光緒七年十一月十八日以民國十二年五月二十一日卒於西安春秋四十有三

先生儀容清癯體幹修偉目炯炯有光沉毅淵嘿博極羣書學術之氣粹然臨事英斷處武莫屈事過仍溫溫和易平居簡敬粗食布衣澹如也

先生二十三舉孝廉時值戊戌變法庚子辱盟之後懷國勢阽危力深究古今興亡之原與東西各國富強之術慨然決康濟之志光緒三十三年丁未赴日本考察政治敘

育翌年返國主張革命益堅且急矣

會蒲城令李體仁指縣校長常明卿與學生有革命色采大肆羅織答責常與學生三十餘人陝西教育會開週年大會於西安衆懾於清吏淫威無敢言其事者先生奮起大呼曰李體仁摧殘教育毒螫師生使血肉橫飛士氣俱盡今日開全體大會不發此事吾深爲秦人羞吾更爲秦人痛矣遂放聲大哭全場震動體仁遂褫職卽世所謂陝西蒲案爲革命之導線也時光緒三十四年戊申十月也

是年先生與曹印侯劉藹如賀絨之諸先生設麗澤館於西安與黨人馬開臣景梅九敬之昆仲郭瑞浦李岐山林卽卿李仲特鄒子良王子端焦子靖師子敬張翌初任師竹王一山耿冀儒諸君深相結納宣統元年乙酉由陳會亭景梅九介紹入同盟會卽以其館比鄰馬開臣之書鋪爲密議所旋舉諮議局議員被推爲副議長當時同志多激烈而先生獨以穩健稱羣謂劉秀討莽謹厚者亦爲之加盟者日衆嗣公推先生爲陝西同盟會分會長密畫革命之餘究心書史編印六十年交涉記略及噉社學譚並聯合同志分赴各縣宣講以喚醒國人救國思想

初陝西新軍爲道員王毓江所控領陝撫恩壽私人也爲恩通賄鬻官無所不爲黨

人彭仲翔張聚亭陳會亭馬彥若諸君聯名摘發其奸先生乃由諮議局揭恩王狼狽不法狀於資政院王與其羽翼被褫恩亦罷去於是張翔初以督練公所委員爲協司令部參軍官繼轉參謀而張靖清彭仲翔錢定三張仲仁黨自新曹建安陳伯生劉伯明張伯英張季芳范篤生張虎臣諸君亦遷擢有差軍中陝人勢盛而西北革命之根基以立同時又創設軍事研究社於西安西嶽廟陸軍中學及小學諸生時來聽講革命思想乃益銳發莫能遏時四川黨人熊克武蔡體平劉文輝湯萬宇諸君均在陝相與策畫舉事往來甚密

旋井勿幕奉同盟會命返陝謂東南同志多年舉事不成非謀劃不周以東南地勢交通便利易於敗露欲改變方針從西北着手先生見革命風潮已彌漫全國陝新軍勢力亦半入手於是以黨友柏小餘等之助金令張奚若赴滬購買製造子彈機器及炸藥又以鄒子良李仲山胡立生馬開臣等運動會黨而革命勢力乃結合一氣

辛亥九月陝西革命發動期近先生與井勿幕當內外策劃之任發縱調度迅協機宜先是井以事赴北山留先生與李子逸黨自新在省主持機關及武漢舉義陝西事急先生與新軍同志錢定三張伯英張仲仁張聚亭計以張翔初在新軍中資位較高宜爲

代表八月晦夜西安城南林家墳集議定明日起兵破滿城逐滿官吏推張翔初爲大統領建秦隴復漢軍大統領府分設軍令府參謀處民政府三部而先生主持參謀兼民政府嗣改軍令府爲軍政部專理軍事合民政府參謀處爲總務府總理軍民各事下設參議處參政處祕書廳銓敘局以同志党自新馬瑞堂陳雨亭彭仲翔茹卓亭張聚亭張靖濤陳伯生李子逸常明卿高幼尼張衡玉王錫侯分任其事而先生實總其成蓋翔初素欽先生學行倉卒中一切用人行政多就商決更以先生爲同盟會支會會長之故舉凡內外部署以至安民籌餉治軍交涉諸大計胥藉主持一時文告亦多出先生手恆隔日不得一飽浹旬不遑眠是時新軍初發難民兵應之羣雄虎顧各樹旗幟不相下而市阻土猾雜側其間黨會各首領意見紛歧或至決裂羣情洶洶不可終日而在黨會最有力之錢定三東出遇難先生不避艱險以全局安危自任商於翔初兼納各派意見起用新舊紳耆肅號令戢奸宄擢尤暴戾者僇之於是驕兵悍卒徐就銜勒而地方秩序以定惟其時清室尙負固東則遣兵犯潼關三陷三復西則甘肅軍深入咸陽醴泉俱危一時人心搖動咸議悉兵出武關以奔武漢先生獨以關隴居中國險要與武漢四川相犄角牽一髮而全身動折一足而全鼎覆未可輕言放棄乃一面派兵抵禦苦力支撐一面與同

志劉允臣敦請名宿藍田牛夢周興平張曉山並派黨人彭仲翔吳善卿金利暄張生午白星橋諸君先後赴東西兩路議和申以大義藉出奇計緩敵師以裕防戰卒定關隴建西北革命重鎮

辛亥革命後先生與井勿幕力主裁兵減政以謀恢復元氣休養民力蓋慨夫清季弊害之深舉凡地方民病癥悉心研求欲一舉而廓清之而同志狃於地位權利不作遠圖事多尼阻先生知不可留乃辭職以去陝西省議會成立舉先生爲國會議院議員亦堅辭未赴

民國二年先生欲作歐陸之遊或尼之曰共和改建吾輩夙志今舍衆庶幸福不謀而欲泛舟遠遊是不可也先生曰吾病乎拘於墟者竊欲察鄰國之政爲中國十年後計耳遂取道西北利亞赴歐洲道經北京五省協會以陝西反正先生之功爲多開會歡迎先生蒞會講演中國此次革命係世界政治思潮所趨孫中山先生首出爲天下倡陝西起義由在東京之四省協會派員到省運動之功一官參與斯役者約五六萬人主其事者又百數十人余個人之力直大海細流耳何敢貪忝且國基初奠艱難正多未可遽云成功余所以謝政事而遊歷者以現在社會文物程度俱不足專門人材未出凡百設

施難期速效此刻人材富聚於下年高者應開通社會改進現狀年壯者應趕造學問預備將來云云於是遍歷俄德法英義比瑞荷諸國所至悉心考察其政治教育農林水利旁及風俗習慣登於日記四年歸國知袁世凱盜國之謀甚急乃聚徒講學於華山北麓之共學園一時有志之士從遊者衆隱隱爲劃策討袁之樞所其後靖國軍名將董振五赤亞武等卽所親加培植者也當時會華下者有高陽孫禹行崞縣續西峯天水鄧寶珊興平史可軒等在渭北策劃運用與先生互通聲氣者則有劉允臣諸先生時陸建章督陝本袁黨羽世所謂屠伯者也邏騎四出捕先生甚急先生乃偕劉藹如潛入山西與當時反袁最力之趙城張衡玉有所計議未幾陸被逐先生返陝欲有贊畫未能如願時南北意見不相容先生曾赴京欲有所建論無補而歸

六年秋充陝西水利局局長兼林務專員先是先生於民國二年遊歐時特注意於水利見德法荷蘭河渠之整齊堰閘之靈便水工特修農商交利輒慨乎吾國之河政頽敗溝洫不經時李儀祉先生再至德國學習鐵路工程先生謂之曰吾國西北多旱災凶年飢饉更不絕書君曷改習水利繼鄭白之蹟以利民乎鐵路工程不如水利之利陝較速吾歸而創其始基君將來總其大成可也儀祉乃改習水利先生歸國後與友人論水

利書有曰希仁數年來感吾陝頻遭荒旱擬大興水利以爲根本永久之計而苦無把握到歐洲留心觀察並會以平日思想於水利總義總法略有端緒若得大力提倡普遍開辦三十年後庶可使西北無荒旱之患而各種實業之緣水利以興者亦可次第發達於是有水利譚之作及長陝西水利局調查涇河谷口疏濬草灘河渠修理中店潏河渠莫陵廟壩河堤壩陵區壩堤沙河倉壩堤閘家灘遙堤補治商縣府君廟丹河堤長武縣胡家河渠立法設計獎勵不遺餘力乃遭逢世變兵火不息民窮財盡未能大有所爲儀祉先生九年學成歸國先生乃舉以自代於是所計劃而未及施行者如涇渭等渠皆以次舉矣今涇渭一帶渠道交錯田園膾膾先生實有以樹其基也

七年長陝西教育廳仍兼水利林務對教育水利農林皆研究有得苟事之有裨於國家民生不必責任所在輒竭心力爲之歷年長教育會天足會紅十字會設音樂研究所國語傳習所孤兒院通俗圖書館修孔廟選師資審教規推廣教務擘劃奔走日無暇晷當長孔教會時開經史溫習會約同事從事講演凡經史大意與各國政法興學富民諸大端反復講演以輔教育之不逮時值新文化運動蓬勃之際反孔反舊禮教之風瀾漫全國以此頗遭時流評詆而先生堅定自持毫不爲動手編尊孔百喻以自勵並著新

舊說一篇以見意其略曰「竊常謂學當正論是非不當論新舊是故吾學舊者舊可得新必不至於頑固善學新者新不厭舊何至流於迷篤夫亦在真知灼見而已若夫聖賢溫故知新深造自得之要義則又學者所不可不知若稍識舊學之門戶卽自號通家甫涉新學之藩籬卽蔑視一世是指祖先之屋址之傲人倚富豪之門牆以自炫也烏乎可哉至於四書六經諸子百家歷史文字以及前代儒先之學說雖不能遍觀博識然當披覽而研究之則學業經濟醞釀深而識量以闊且亦足發愛國之深情動恢復之觀念若概目爲陳腐無用令後來者承其風氣直奔髦視之不復致省譬如嬰孩襁褓而離鄉閭於其井里墳墓祖先名字亦并不能記憶故鄉之景物未印於腦則戀愛之情緒不生於心他日至於成人望其關懷桑梓不萌鄙薄之念難矣顧亭林先生周遊郡國所至嘗考其古蹟金石論者謂其足繫人眷懷故國之思而况經濟文物之燦然者乎一憶先生歐遊歸來在華山賦一詩云歷盡千重險方知太華尊誰爲仰止者願作導遊人先生定學問於一尊以教育爲己任其志早見於華山高詠時矣

九年閏中大旱義賑統委一員會開會某災區當急賑幾度會商洋員某多方駁難議終不決一日又開會洋員持議如初先生直前怒叱之曰汝洋人視吾中國人命如草

草芥今先斃汝命再議賑乃提以拳諸委員驚異解脫之議立決次日卽施賑十年華洋義賑會修築壩濠涵等河堤五處某洋員勒不發款先生扶病赴會與之抗辯洋員憚其威直悉從之而大功以成時某軍隊包運土藥干時政事連當路各衙承旨莫敢言先生獨建議痛懲以懟當路乃卽日盡辭各職以去其不畏強禦亢直敢言類如此

先生在官不治私產辭教育廳長後餘俸四千金卽以三千分捐孔教會芸閣學舍咸林中學及其他私立各學校並以在水利局薪俸購測量儀器以故去官未逾年卽極艱苦疾久售其所乘車以度日常事聞之餽以千金先生曰俸薪某所應得若憐其貧病而資之某絕不受他人憐也蓋先生時尙有水利局欠薪在公也先生沒無以爲殮友人賻金爲治喪乃歸葬於田市鎮游方村祖塋清風亮節臨臨尙矣

先生志道深思殫力於著述講演數十年如一日卽祈寒酷暑未嘗稍懈操勞過度寢以成疾然猶扶病講述伏枕秉筆終致不起其著述刊行者計有近思記思齊文存能近取譬春秋隨筆儒教綱要說文部首說文漫錄五聲辯難水利譚從戎記略平見東遊記歐洲遊記瞰社學譚六十年交涉記略知人類鈔聖蹟備考政術叢談國史講演錄天演通音轉舉隅及歷年自述與日記數十種其未刊行者有張橫渠學問之方詩集說詩

集傳補正方言輯存左氏傳箋記鄉職要略管子約編等書常謂秦人之病在對於著述發表過於審慎吾輩應立矯而獎勵之以收拋磚引玉之效蓋先生之學不拘一家言稽古證今而不泥於跡比類屬事而必合於道博通以挈其要精審以抉其微不隨不激務準於是而要以實事求是爲歸蓋早具古聖賢康民利物翼世濟危之志故其見於文章講演及事功也皆成已成物之大者其燦爛若日星云其致某君論學書有云弟少治舉業二十後稍閱書籍自後雜治宋學及今天演家言以其間涉獵羣經攫取其粗綱大意比合於世事妄意爲致用之資就中唯春秋周禮稍多用工夫欲條舉成書苦爲社會奔走奪其日力卒不能就近來始悟向者鹵莽滅裂之病且趁此投閑歲月仔細治經一番六經不能兼治擬先治詩禮以二者於身心最切要也其入手方法必先參先儒古訓以求文義明瞭但訓詁家言必擇其精當不支躁釋矜平如王伯申父子之著作不取攻駁爭勝如班固所譏使詞巧說碎義難逃無關大體二文義既明則就經文玩索必反之吾身而有裨益按之世事而有關係不苟爲泛博以騰口舌三義理必虛心涵泳以求精確其不安於心者寧闕疑不强解孔子曰知之爲知之不知爲不知又曰於其所不知蓋闕如也四性情有偏所見必謬漢學家多好強詞勝人此最學人大病朱子在宋學中號爲

涵養深純者矣然詩集傳十三四亦不安於人心此亦其不及聖人之一端又云孔子祖述堯舜憲章文武修周公之業刪定六經以垂統緒爲中國文化之樞紐使無孔子秦皇一焚項羽一火歷代典籍撕滅盡矣立國精神當何屬哉再就歷史一端言之歷史爲立國之一大要素爲東西學者所公認先孔子而與孔子齊名者爲老子老子不傳歷史後孔子而與孔子爭名者爲墨子墨子亦不傳歷史孔子晚年本魯國史作春秋又使弟子子夏等求周史記得百二十國寶書參互考訂左丘明因據之以作傳成一部詳明編年史太史公繼春秋作史記而後漢書以下各史皆模仿以成司馬溫公又本諸史仿左傳作通鑑後人用其成法於是數千年之歷史貫穿無遺中國數千年來所以蹶而復振亡而復興者實惟歷史凝結之力中國學者不讀中國歷史則已若尙讀中國歷史而反排斥孔子詆毀孔子譬狂童之唾天類小人之剝廬非但數典忘祖而已可見其學說涯略云

先生人格學問事業功名爲世所仰顧人第知先生之事業在興水利辦教育施賑禁煙諸大端而不知其豐功偉烈實在於尊孔道以挽救陷溺之人心倡革命以建共和明體達用誠中形外以身作則不自假滿蓋關內三十年一人而已今先生之沒已十八

年矣而後生承風知禮重義益淬厲革命之精神曷莫非先生人格感化有以啓之良儒侍先生門牆見間較切欲於行誼有所纂述奈十餘年中俗務鞅掌學殖荒落未敢率而世變日亟竊恐曠時逾久耆舊凋謝著述湮失無可詢考則良儒之罪戾滋深今春至三原監修龍橋請謁劉允臣先生於其寓廬劉先生與先生相知最深承其指示編敘生平行誼之榮榮大者謹以就正於國內賢達庶使來者知先生立身行事之梗概焉民國三十年五月 日門人扶風溫良儒謹記

郭希仁先生碑記

景梅九撰

郭希仁先生陝西臨潼人也生於清季賦性淳篤治學有方冠歲舉孝廉觀清政失綱慨興康濟之志光緒丁未東遊考察教育聞革命主義而信焉戊申歸陝值蒲城令李體仁指縣校長常明卿革命大肆羅織先生在西安教育會開會謂體仁摧殘教育毒螫師生痛秦無人放聲大哭全體感動李因褫職世稱蒲案爲陝革命導火線是也已西與摯友曹寅侯同時加入同盟會寅侯近狂先生近狷而皆能歸尙於中行其風度議論同爲當時同志所領服及先生被推爲陝同盟會分會會長密劃革命方略力謀實行即以所設之麗澤館爲祕密機關庚戌陝撫恩壽引用私人王毓江掌新軍通賄鬻官穢聲載

道先生時充諮議局副議長憤之以狀達咨政院王削職恩亦引去秦士在軍者始獲兵柄辛亥武昌起義陝西首先響應建立軍政府先生充軍事參謀兼綰民政主張東抗清軍堅守西安拒升允彌爭修和關輔以安先生之功也共和告成先生力主裁兵減政與民休息未克如願乃子身赴歐洲徧歷各邦詳察其政教風習取鑑良多歸國值李儀祉遊學德國習鐵道工程先生告以歐陸河渠修暢工商交利囑改習水利儀祉從之學成代先生掌水利局開涇惠渭惠兩渠獲繼鄭白之績實先生啓之也七年先生掌教育廳創辦通俗圖書館葺文廟立孔教會嘗設經史講習會以作朋友講習之地溝通古今中外學術捐除門戶新舊之見又喜獎勵後進一時翕然成風關學賴以復振憶先生遊歐歸賦詩華山云歷盡千重險方知太華尊誰爲仰止者願作導遊人所謂定學問於一尊以教育爲己任其志已見於賦詩時矣九年關中飢華洋義賑會派員來陝會商賑務某災區宜急賑洋員阻議先生嚴叱之洋員畏懾議立決論者謂先生兼備智仁勇三德良非虛譽先生儀容清癯體幹修偉目炯炯有光畢生廉介自持取予不苟功成身退不矜不伐著述等身不自滿暇居恆粗食布衣澹如也高風亮節同時無兩友人求予爲先生撰碑記昔蔡邕言吾爲碑銘多矣皆有慚德唯郭有道無愧色予於希仁先生亦云

臨潼曹印侯先生傳

溫良儒

先生諱樹勳印侯其字也一字音吼臨潼人少孤貧力農奉母年二十自悔失學從同邑包海涵受業晝夜鑽研不輟學爲文下筆奔放不羈無扞隔語入泮後每遇文會輒一日成數十藝見者嘖嘖歎爲異人光緒三十年富平張扶萬先生主講橫渠書院張本關中淹博士先生得其指授學益大進遂博覽羣籍時王敬如講學里門其學主程朱能貫穿新理先生踵門委贄執弟子禮往來講論經年大悟歸築土室顏曰逍遙洞取古今中外賢哲遺著摘條手抄貼壁殆滿上下千古瑩然貫通先生之學自是大定三十四年與郭希仁劉藹如賀紱之分門治學於西安麗澤館先生鷄鳴起練體力張兩臂迴環擊柱聲震屋宇每深夜演說痛陳時艱與人心陷溺慷慨泣下聞者興奮宣統二年應選拔試北上自題小照寄友云「天地盜完猶恨少虛空踏遍尙求深江山河嶽開王霸怒馬神龍鑄鉄身潮翻宇宙風顛海日照中天月滿輪若問先生真像玻璃肚子金剛心」可以想見其概矣是年八月各省一次請開國會秦舉先生爲代表東南人士多薄視西北當會議時甲此乙彼日中不決先生宿病新愈慨然曰此事無容辯駁之地請卽向政府索我民權來若弗獲當各擲頭顱謝天下衆驚顧無一語然咸服其忱摯京師各報

紙競爲標題轟傳九衢既還聯合紳民倡辦地方自治遂加入同盟會川蜀抗路事起入西安約同志組織革命軍密赴渭北招募道聞西安反正率鄉團入臨潼以應錢定三督師東出先生留守臨潼錢至渭南遇害張伯英繼之潼關反正先生爲籌糧三千石餉軍繼又入西安謀招河北壯士略甘甯謂我不搗彼彼必犯我勿甯先出制之議未決會潼關失守伯英函招救援先生飛書走使十數日得勝兵萬餘遊俠輕生仗義之徒悉歸之號敢死軍破產貸資以具軍資自食粗糲務與士兵同甘苦潼關克復而甘軍東攻分道薄乾州鳳翔鳳翔守兵單圍尤急先生奉調二日夜馳抵鳳與甘軍血戰三十餘次率烏合之衆以土槍刀矛衝馳於快槍怒馬之間無一人畏却者卒能保危城屢西陲使敵騎不得東竄論者偉之共和告成先生首議裁兵時諸將新立功當事者難之先生曰請自我始一朝遣散十餘營僅留正兵屯田兵各三營裁兵後卽條舉陝西實業擬次第興辦而尤致力於涇渠之開鑿當局者抑其才終不令得志有所爲已乃悉令散其餘兵先生遂專志經營商業自此欲以財權雄世民國二年養痾漢口先是二次革命軍未起時黃克強李協和諸公馳書先生約同舉義先生既籌歸陝響應矣而以病未及行至是謀泄被捕入獄獄中上書辭旨壯烈既得釋會天熱舊疾增劇移居杭之西湖爲靜養計竟於

二年十一月沒於韜光寺年三十二翌年春先生高足董君振五以郭希仁劉藹如諸先生命歸櫬華麓玉泉院各同志同道賻金公葬先生於太素宮東之王猛台前共學園內先生貌豐下目熠熠射人行步矯捷與人交握手出肺肝不合則推誠面責無瞻徇雖悍將莽夫一見無不傾心其學問自成一家議論思想均能抉破藩籬尤善領導後進自爲學約若干條其言皆雄肆奇闢足以開拓心胸苟天假之年使持其說馳騁一世其成就豈可量哉

民國三十三年陝西革命先烈褒卹委員會主編西北革命史徵以良儒受業於先生而徵傳記之文於良儒乃就希仁先生所撰行略及趙城張衡玉先生瑞璣所撰墓表而參以良儒之所見聞者爲傳如上

國民政府委員富平劉先生允丞墓誌銘

騰衝李根源撰

余友允丞既歿訃告至痛不絕於余心嗚呼君遽止於是哉君性剛毅體貌清癯器宇淵深讀史喜游俠推許季布侯贏之爲人慨清末失政喪地辱國屢見侮於列強遂陰結豪俊與井勿幕郭希仁曹印侯李岐山先後加入同盟會辛亥武昌起義陝西首先響應君與希仁籌策安定陝局丙辰袁世凱竊國稱帝以素號屠伯之陸建章督陝日肆殘

殺君與胡景翼曹世英岳維峻董振武鄧寶珊共發難謀洩幾遭不測……丁巳段

祺瑞解散國會約法再毀君聯同袁樹靖國軍旗於渭北景翼任總司令勿幕爲總指揮分道進攻西安勿幕戰死景翼被拘諸軍迎于右任任總司令張鈞副之陳樹藩貽書誘降君覆書絕之直至直皖戰起始以計脫景翼於難甲子與景翼聯合馮玉祥孫岳建國民軍討曹錕不幸景翼於豫西討平憨玉崑後病逝維峻督河南軍政君起欲以新破劉鎮華之師直下武漢乃維峻兵敗崑函君被繫運城半載南京政府成立被選國民政府委員中央政治會議委員抗敵軍興武漢繼南京淪陷君倡言關中不可輕棄謂不守河東則關中不固無關中不惟無兵可徵亦並無餉可籌四川雖號天府如精金外漏不能一朝有也識者韙之因赴重慶向中樞直陳國策得失多被采納未幾回陝寓居三原招致諸豪俠少年數十輩引犬策騎較獵原野遇險要形勝地詳誌之備有萬一嘗精研小學兵學酷好孫子十三篇與英人喬惠亭研歐洲歷史地理求索兩次歐戰之由來著有讀漢書郡國志釋略補註民國三十年辛巳十月二十三目疾終三原北城寓次年六十有一君氏劉諱守中允承其字世居陝西富平縣考諱德習性直行謹受業於賀復齋先生之門君蚤歲讀書清麗爲復齋先生再傳弟子關中學風自李二曲王山史講學後又

繼以復齋先生之薰陶故承學之士多戾契致於名節處則敦品重行出而以濟世匡時爲職志周禮稱儒以道得民友以任得民如君者殆儒而能任者歟余自長陝西民政蒙難君爲之奔走營救厥後晤君於開封再聚於吳門三會於武漢余赴新疆君已旋陝聚談旬日四年不見君而不遽料遂與君永訣矣人之死生離合殆亦有數存乎某月日葬君某山之陽銘曰

不世才傑多產秦中任俠尙節克振儒風君固書生崛起習戎學丞先正勵行潔躬挾持既大智略無窮曾張道誼未竟事功生爲人豪死亦鬼雄永留奇氣化作長虹

中華民國三十一年二月 日

國民政府委員劉君墓志銘

君諱守中字允丞富平人也先世居到賢鎮明初遷鹵泊灘南柏玉村以訖於今代章令德曾祖大賢公妣馬氏祖世端公妣李氏考仲貞公雅有儒操妣韓孺人生文夫子五君其叔也髫年穎悟有若成人家近八公原故金宋鏖兵於此君憑吊往跡慨然興懷稍長讀書清麓卽密交當世豪傑之士同盟會立遂加盟焉歲辛亥義師起武昌關右響應君預其謀功成不居避跡燕趙迨袁氏僭帝使陸建章爲陝西將軍肆其爪牙多所殘

害胡景翼岳鍾峻用君之策卒獲剪除護法之役景翼樹幟渭北號靖國軍亦奉君爲謀主其後胡部改編君走上海值曹錕當國穢德日章總理孫公授君方略說馮玉祥孫岳舉兵迴指旋以肅清端木之辯曲逆之謀君蓋兼之已而總理告殂景翼不祿維峻繼督河南軍務邀君贊襄兵潰嶠函暫遭幽繫此由轉運匱乏將士不習有以致之非君之咎也民國十六年奠都南京翌年任君爲國民黨第二屆中央執行委員並選任國民政府委員又數年日本乘我不虞侵據東北君以爲善守疆圉非可託諸空言乃兩入蒙古周歷各盟旗見諸部落有經始墾殖丕變舊風者力贊助之記其考察所得約二十餘萬言時政府措施百端未遑暇也歸息故里不忘舊勳先後創立陝西革命先烈撫卹委員會暨華麓先烈祠墓造林董事會二十六年七月蘆溝橋變起中樞詔君視察黃河沿線防務因建議關中輿區不可輕棄當道遽之遂定守河保關之策繇是轉戰八年關隴屹然爲西川屏障君之識偉矣退居三原閉戶著述成續漢書郡國志略補注北方學者自顏習齋李二曲皆重躬行君慕其爲人踐履篤實每游山川必詳其阨塞險要又嘗主兵工農合一之說言皆有用不尙華辭性嚴毅而樂獎借後進故士多親附事有糾紛難理者得君一言靡不心服繼於平生師友最嚴憚君而談讌之歡亦若家人父子三十年

夏道由三原要君過長安市會同盟故舊觴杓既傾意氣猶昔不意君歸後胃疾猝發遂以十月二十三日卒於三原春秋六十一邦國殄瘁吁其哀已配王夫人子二奉學玉衡女子子三慧貞桃貞菊貞孫男二澄宇澍宇三十一年 月 葬君於華陰華麓先烈墓地繼爲之銘銘曰瞭山川之形勢兮察比跡於寧人服顏李之學兮又彊慤以律身當玄黃之始造兮後人孰知其艱辛國威替而召寇兮用君之謀決勝於帷幄告九州之既同兮靈庶幾其瞑目

張繼撰并書

中華民國三十六年一月

國民政府委員劉公允承墓表

公諱守中字允承富平劉氏考仲貞公賀復齋先生門人也仲貞公有五子公次居三蚤歲讀書清麗憤清政不綱與井勿幕郭希仁曹宣侯諸賢入同盟會辛亥陝軍起義皆爲動力事定公出遊燕趙觀天下大勢結納豪俠袁氏叛國前命陸建章督陝殘殺日甚公與胡景翼岳維峻等陽設大有公司於三原爲策動機關因起義遂陸次年促景翼樹靖國軍幟於渭北苦戰數年策畫多出於公十二年出關至滬謁 孫總理奉命同丁

惟汾王法勤聯合馮公玉祥孫公岳以胡景翼作基幹爲首都革命之役及維峻兵潰嶠
函公遭拘留居運城半年當事者始識公爲真革命黨人不可侮十七年當選本黨中央
執行委員並選爲國民政府委員九一八國難起奉命兩入蒙古調查實業國防記其觀
察所得至二十餘萬言旋被命爲山西陝西監察使未就歸里倡立陝西革命先烈撫卹
委員會及華麓先烈祠墓造林會二十五年被推爲中央政治會議委員七七抗戰後視
察黃河沿線防務及政府遷渝公建議謂關中不可輕棄當道躋之遂定防河之策旋回
陝寓三原時招舊遊獵原野以習勞平生治事之餘孜孜讀書著有續漢書郡國志略補
註性剛毅貌清癯愛才尤殷遇英俊之士片言獎借能令振奮爲國器晚歲服膺李學
說主張一兵工農政策三十年十月二十三日酉時卒壽六十一配王子二奉學玉衡女
三慧貞桃貞菊貞孫男二澄宇澍宇孫女二先世居富平到賢鎮明初遷滹泊灘南柏玉
村曾祖大賢妣馬氏祖世端妣氏李考諱德智母韓孺人所居附近八公原爲金宋戰場
故公束髮讀書卽深受影響卒成時代學者銘曰

頻陽一老劍吐銛 狐筑萬里踏龍荒 龍蛇在歲賢者殃 太華歸骨白雲翔

我來銘之萬古香

中華民國三十六年一月

三原于右仁撰并書

扶風王誠齋先生行略

門人溫良儒敬撰

王先生玉汝字誠齋一字覺一世居扶風銀王村曾祖塋父皆爲醇儒先生幼孤然聰穎能自致於學鄉人艷稱之目爲神童入庠後以拔萃試京師藝業高一時論事尤刻至以不能遷就權貴人故終不能得志先生於書無所不讀尤邃於詩有匡鼎之雅每談詩援疏證注陳義典塙娓娓千百言辭意淵雅令人有感於興觀羣怨詩之爲教者深也先生初從咸陽劉古愚先生學劉先生爲西北經師大儒以經世之學教門下一時識略之士多出其門然劉先生獨重愛先生謂他日可立事功者必先生也辛亥革命軍起秦中清人以重兵三路長驅搗西安先生佐敢死軍統領曹印侯軍鳳翔與甘軍浴血戰數十日夜甘軍號西北勁兵壁壘森然其人皆快槍怒馬當之者無不披靡時印侯方臥病軍事一倚先生先生用新集烏合之衆持刀矛當十倍之兵鏖戰數十日勢轉張甘軍卒不得逞迨袁世凱稱帝以號稱屠伯之陸建章督陝捕殺黨人甚衆黨人方約討袁逐陸密謀日急渭北西路機關密佈陸亦偵騎四出伺察非常時先生主西路與諸黨人緘扎

往來如織方將發難而事洩在扶風被逮入省時民國五年二月也會主獄者爲一老儒見先生風采大敬之時就獄中叩經義先生上下古今援引精博其人不覺傾服以是獄竟緩迨陝護國軍入西安陸去而袁世凱亦死黨人乃迎先生出獄其時當局者銳欲革新政治力矯積習以爲革新政治必自縣制始乃推請先生爲扶風縣長還治本籍以作模範縣人得治本籍實自先生始蓋以民國元年先生任宜川縣長政聲著一時故當局必欲先生往作模範也先是扶風田地差徭至爲淆亂有地已售而糧不過戶民無地而納租至數世其害不絕且糧名冗複田級繁多猝不可辨省胥吏因緣爲奸利而鄉民受其病焉先生至耙梳滌蕩一切廓清之積弊一空縣人如釋重負至今稱頌焉其後調長邠縣尤多善政民國六年段祺瑞組督軍團解散國會約法再毀先生與陝黨人劉允臣張義安董振五鄧寶珊等樹靖國軍幟於渭北擁護護法政府推胡笠僧于右任先後任總司令一時慕義歸附者無慮十餘萬人而餉糈大絀雖素號才能者皆却步不能任餉事於是共推先生主籌餉局其後雖頻年戰鬥而軍糈未嘗有匱乏之慮者先生力也民國十年直系軍閥西寇局勢突變先生與楊虎城迎于總司令于武功重整軍旅堅毅抵抗次年于總司令去陝先生乃北遊故都當是時李印泉長農商部李前長陝時已識先

生爲陝黨人中健者至是提請任先生爲實業專使以開發西北農田水利而事卒不偕論者重惜之先生貌清奇目光炯然聲如洪鐘當其快意議論風發若決江河性磊落慷慨勇於赴義好急人之急然正直若神明不可干以私尤喜汲引後進得先生陶冶而成就者不可勝計以此名動遐邇其所知交皆一時俊傑門生故吏遍關輔其器業識略多有類先生者當時碑誌之文多未能道其詳故余就所能記憶者次爲行略先生卒於民國十三年享年五十一子三長瑞鸞早卒次幼誠前臨潼縣長現任陝西省第十區行政督察專員公署祕書次瑞鸞醫女四均嫁

民國三十二年八月門人溫良儒敬撰於咸陽專署

國民革命軍第二集團軍南路第四軍軍長蔣君朗亭墓碑

岳維峻撰文 宋伯魯書丹 毛昌傑篆額

孫子曰將者智信仁勇嚴者也夫今之世擁兵者衆矣求得其一二似且難况兼之者幾何人哉舊部蔣君其殆庶幾可爲之彰君諱世傑字朗亭陝西蒲城龍陽鎮人少與余莫逆文武共習爲人沉毅有大志清季失政隱然憂之中山先生首倡革命粵東殊嚮往會井勿幕歸組織陝西國民黨余與君偕入洪憲事起胡公笠僧及余樹義富平邀

君與俱攻西安既定陳伯生作督任笠僧團長余營長君連長以次相層接此君從軍之始因念黨義友誼乃肯出靖國軍興南北分立以革命宗旨同服屬於南笠僧爲第四路司令余第三支隊長君第三營長仍相隸屬君營屯相橋爲三原東道門戶知形執扼要深溝高壘以固吾圉後在豫守信陽部署亦如之尤加意故皆歷久弗能失笠僧定河南諸將戰於漳河旬餘勿克檄君助出奇襲後路一戰而捷黃河以北無敵踪笠僧督豫君守許昌愁玉琨卒攻禹州團警內變四城門存一請命恐勿及先分隊馳援不少緩亂以定餘敵遁去余於豫奉命西征黑石關既克洛陽得而復失警報至羣議往救君見與余同直追陝州擊走餘衆返復洛陽上年唐生智之變余時任第二集團南路軍總司令委君長第四軍原駐隨州唐令其助已陽奉教而陰戒部衆按兵黃州勿爲左右袒唐不久敗寧漢復合不爲無功凡所計慮非明而斷能然乎可謂智矣余督豫命將一師守信陽豫東戰事變幻吳佩孚令寇英傑劉鈇山率重兵相繼圍攻久勿能下均甚失利吳數洩教士勸改編或退讓不爲動誤聞余死耗且信而泣乃解甲去後吳宴君於漢皋座客曰疇昔之役使子深知吳公者當早言歸於好矣君曰軍中聞將軍令保信陽知有岳耳卽吳公來我亦戰也吳大奇特契之許授以師警備武昌又命爲援川總指揮悉不就蔣介

石總司令至漢勸之出爲豫北招討始授命成軍駐隨蔣下野任中央暫編第六師長義勿助唐與忠於余同始終不背友不忘黨可謂信矣君駐陝之相橋故市豫之磁州彰德時治軍清匪安民保商外尤汲汲興學以益民智笠僧既取大河以北地吳佩孚集兵許昌謀抵拒聞君且至約退鄂毋相偪爲延一日始進恤民免戰可謂仁矣撮君戰績剿匪二華佐余迅奏膚功援救蒲城奮身得城出余於險防守相橋中央第四混成旅來攻君槍械不滿三百當敵軍四團之衆相持四十八日敵無功而還各道解圍三原得無恙進取故市時笠僧羈於省余爲代君代余隊長率君往攻一鼓而下靖國軍勢力以拓迤後笠僧就編陝軍師長余任混成旅長君團長聽命中央奉調出關便道援豫留君守洛陽登封土匪蠭起一力削平之洛陽危而復安旋移磁州勦匪臨漳神速蕺事吳佩孚北伐余當中路君次熱河國民二軍成立推笠僧任軍長余第二師長君第一旅長返取唐山以一團一營勝兩師奪其後路而直軍散矣西征一役君所向皆捷偃師戰廿餘日人以鎮靜稱愁玉琨餘黨王老五盤踞汝州力駢而去葉縣詹旅之變立時消滅有功必先無戰不力可謂勇矣平時重訓練故軍紀獨整駐彰德時請設訓練處躬親教導成爲節制之師信陽危急時警察內變火司令部君戒城外勿內顧違者斬有某排長返救立斬以

徇衆懾服自後無敢違令者可謂嚴矣一身備五德雖不敢望古之名將然視今世之擁兵者偶乎遠矣革命成功乃不及睹惜哉君以病卒於民國十七年三月六日家人旣以禮葬丐余爲文表墓余不文輒紀崖略至其先世見太翁碑內不復贅銘曰

象祁在華賢者成 鍾山白馬更奪將軍關內枕戈中州共揖撼山則難背鬼最力如林設校將慕儒風名關利藪浮雲太空一片丹誠金石爲裂出岫氤氲黃花晚節雪鴻歷歷勒諸貞珉韓山語綠剔笞有人峴首題碑武夫滋愧爲道生平不禁墮淚

民國十七年十月穀旦

溫成功傳

王季方

溫成功閣丞先生次子也性疏脫豪邁不羈幼習商不能耐持籌去又從學亦無所就時靖國軍方建幕府於三原各路革命軍雲集三原故家子多入部伍爲軍佐有君素所善友招君共入第三路支隊學生連君遂往時年二十三其後二年君任排長常以所部備敵交口兩金間屢伺隙襲敵戰每有功同列皆服其勇然君能優禮文士與士卒同甘苦以故能得人死力十三年以功升任連長益自砥礪心知以力致青雲非難事在自爲耳於是更以餘暇致力於學十五年鎮嵩軍再入關分兵犯三原君奉命以所部守西

城門累戰卻敵敵不敢逼以功升營長一夕敵猝至薄城君以所部出城突敵深入敵旣卻而復合苦戰良久敵屍橫集不能支會日暮從者曰俟明旦更決戰君曰敵憊矣當乘昏黑盡殲之語甫已而流彈中君昇歸卽逝時年僅三十其師長甄公極痛惜之以君爲三原名賢之裔更令公葬君於三里店君之祖塋令全軍官長皆臨君喪時民國十五年十月也主喪者君之族叔賓階先生與君胞弟懷恭也君娶某氏無子

恭毅公之後由明季以來衣冠蟬聯不絕代有傳人古謂仁者必有後斯言信矣如成功之磊落邁往而竟早逝豈不惜哉使其果得克展厥用其成就庸有晷耶

董振五致陳柏生函

與公別久矣念想之懷無時或已比每思以一書陳左右少竭志意以報高厚然有所懼恐不蒙深察而猥以利口之倫見擬故每欲握管輒又罷去繼思振五受恩蒙惠不在衆人之後固當少紓胸臆以盡其喁喁之愚辭淺理弱未必能發公之深省耳竊聞之作天下事惟言行有本末舉措服人心者方可以得衆而持久故袁世凱以一世梟雄而敗不旋踵失衆故也今日陝西星羅棋布環而以公爲的之衆悉公部屬也公不追念人之所以離心離德之故而徒奮然以求武力之解決竊以爲公乃未之思也公謂焦某禍

陝命振五緝捕之振五踪跡至三原而楊某以肩輿送焦出走再踪跡至富平而姚某則宴焦於城內拒不令振五入城楊與姚皆我公親信之人非公之意當不出此嗚呼狐埋狐搨出爾反爾不知公作事何爲如此反覆當日弄此玄虛竟何心哉

胡君立生雄資英發愛國之心出於天性四海之人所共稱道自隨麾下來臨軍約束則忘其家援桴向敵則忘其身富平一戰而陝局大定論者謂立生當顯蒙上賞不次超擢乃編制之日位不過團長且令縮編其所部爲一營另撥二營足之且派令弟陳振橋來監其軍嗚呼公遇人如此尙能久稽天下士乎取舍乖謬是非顛倒不知公當日必須如此作法竟何心哉

郭方剛之侵晉也實秉公命以行公固得晉爲吾外府郭既渡河公則電告晉人曰陝警備軍司令郭堅以其部譁變東竄其勢將不利於晉急擊勿失又派三團之衆備於河上曰無令一人得返嗚呼變幻離奇真匪伊所思矣不知公當日爲此種種竟何爲哉公欲作天下事而不能推赤心於人腹又從而設陷阱以坑之翻怨人之背已此實難矣論者皆謂公雄才大略足以立事特智術太深疑忌太過手段太辣有知人之明而待人則乏終始之誠有政治之才而應務則或二三其德其於人也急則用其力禮之惟

恐不至安則忌其能培之惟恐不顯是皆足以道公心跡公行事豈不然乎

辛亥以還神州板蕩立國精神掃地以籌政府爲逐鹿之場封疆成割據之勢禮教失而民鮮廉恥寵賂章而人思非分攪擾搶攘鄰懷覬覦我天南元戎是用痛心疾首拔揮日之戈憤移山之志檄告中外誓清河山海內賢傑從之若市右任先生拔節總師六路之軍爭奮身命以此衆戰何有不克公自顧矢計舟中之人盡成敵國窮蹙無聊乃招劉雪亞於嵩洛資其綿力欲以自助論者謂劉之爲人蜂目而豺心公蕭牆之憂將從此始他日取公而代之者必此人也

立生之入故市也於靖國軍前途固無所損然立生究爲物望所歸公若遇之不以禮不獨六路之人必將求甘心於公而已竊恐竹帛青簡將不能爲公作恕語也振五與立生分則部屬義同手足然不能以一人之私而棄公理吾願祝立生爲關岳文史早就千秋吾亦不敢不勉爲起剪頗牧承其志意來書語意殷拳然深恨公之不我知而猥以流俗人相待也此時此地請無多談

竊常怪以公雄才大略本足以立功立事而不免虛用天下士此天下士之所以相攜而去也古人有言多助之至天下順之少助之至天下叛之此言雖簡可以深思倘公

能一日追悔其故自懟所爲翻然改途推赤心於人腹則天下士未必不再至公之庭振五見天下士之皆至亦將泥首請罪豈爲晚乎頃據軍訊滇川黔鄂靖國聯軍十道向陝秋風場塞大戰在即請勵兵秣馬以待毋多談

六先生事略序

余自束髮受書見古者宏通磊落有爲之君子所以立身用世修己治人之道心焉向往想見其人及長求友四方得從一時先生長者游所以從容咨詢饜飫於道義文章之途熟聞夫古今成敗治亂之故欣然知所謂宏通磊落有爲之君子者得於并世師友之寧非大幸乃默數生平裨余尤多者六人二十年來相繼殂謝使余如失舵之舟汎汎於駭濤巨浪之中茫不知岸泊何處誦子桓旣痛逝者行自念也之語不亦大可悼歎哉夫六先生者亦已各有千秋矣獨念昔日從容問學之樂不可復得良用耿耿因裒集六先生之傳狀事略都爲一集公之當世非敢謂章前賢也時用取閱以爲立身用世之輔云

曹先生印侯類古之烈丈夫精光浩氣籠蓋一世而長圖偉抱僅於開國之初小試接鐔而遽歸道山遂使績不逮德可勝痛哉

郭先生希仁操存踐履皎然一守道君子也著作宏富心有千秋造次顛沛未嘗草草久歷清要而沒後至無以爲歛其風義寧可攀躋哉

胡先生笠笠其偉略氣概有岳少保之風碩然稱當世人傑海內名流羅爲賓友其規模信宏遠矣坐鎮中州八方共仰年甫逾壯遽爾殞逝故天下尤痛惜焉

劉先生允丞學雖源於清麓而得名則以經世其述作類諸子書若龍門王氏之所爲知交遍天下所至稱劉先生而不名終身以國事爲懷不究其用是可悲耳

王先生誠齋事蹟志趣似羅羅山以宿儒卓行匡時艱而濟大勳用經術迪後進經其推引而成就者不可勝數固忠節之匹亞也使時有曾胡其建白寧可量耶

王先生伯明劉古愚先生高足也以明經碩儒贊劃革命風襟義烈足以令頑廉而懦立古謂歿而可祭於社者徵先生其誰與歸

昔向子期有思舊之賦杜少陵作八哀之詩皆低徊平生師友之雅感住傷逝舒幽懷而悼舊游讀之令人感古人風義之篤也昔陪侍於諸先生之間承殷殷啓誨之勤俾得稍免於愆尤感念疇昔莫已於懷因纂此集庶諸先生之聲音響歛得藉是而常在余前用以爲砥礪之資庶寡過乎

中華民國三十二年六月

溫良儒謹識

白毓庚先生傳

王菊清

白毓庚字秋陔長安縣新築鎮人性端直激烈初學書卽喜學劍有不可一世之概由陝西武備學堂畢業經北京練兵處以官費派往日本留學畢業於日本振武學校在留學期間倭政府突發表取締中國留學生規則十三條留東各生觀之僉曰是以亡國人待吾國學生也憤何可忍時文學界推胡漢民爲代表武學界卽舉毓庚爲代表停課罷學與之抗議更求駐日公使湯樞向倭政府極端交涉收回成命詎料湯係老官僚忠失重心弗聽從毓庚怒攔其面先總理時派何子奇杜伯同景梅九三人勸毓庚入革命同盟會聯絡西北各省作革命事業陝西同志公舉毓庚爲同盟會分會長歸秦運動革命相機行事甫有端倪說得新軍八營全體歸順該軍統領劉瞻漢荐毓庚於陝撫曹鴻勳委任第二教練官又電荐何子奇爲一標標統指顧可以成功乃在東諸同人不明真相邀某某聞同鄉會反對子奇因未到績敗垂成深可憾也毓庚復到東瀛見總理復命相對歎歔隨變換作法從言論界著手同席梧軒合編戰時國際公法答案又與杜伯同景梅九茹卓亭諸同志倡辦夏聲關隴晉話洞庭波各報鼓吹革命晉話報贈毓庚別

號西安洞庭波贈毓庚別號天劍取天劍定西北之義光緒乙巳繼奉總理命回陝工作當投身陸小主任兵教暗中誘導但疏而不密爲西安府尹昌齡覷破捕押中經親友多方援救卒得脫險迨辛亥九月初卽從前陝督張翔初將軍樹革命軍幟遙應起義爲武漢聲援皇皇革命大業月餘告成用兵之始毓庚充張將軍之統帶轉戰潼鳳無役不從共和後解甲歸田家貲餘資只薄田數畝僅能自贍省方念其前績復委任軍裝局長兼省府諮議及靖國軍興又東西奔走不殫勤勞時爲第五路司令高峯五參謀長往見吳佩孚於洛陽備述關中禍亂民之疾苦乞加以師援助十五年鎮嵩軍圍西安毓庚又充籌款委員竭誠調劑歿時尙充西安警備司令部參議事在民國二十二年間攷其一生事業自入同盟會以至終命雖時有通塞而志不少屈可謂斯勤斯慎必敬必忠矣但天不假年卒不得以平昔所學盡貢獻於社會可哀也已逸史曰槃槃大材常蓄於遇驥足未展而鵬賦先成堅苦半生付諸流水不得與同學各少年赫烜一時徒稱名於沒世惜哉

楊松軒君家傳

蔡元塔

君諱鶴年字松軒嘗自號補拙軒主初度之辰其大父春秋正七十故乳名從心君

一生熱心教育事業而君之梓里以關西棊爾邑其教育遂不後于通都蓋嘉名肇錫之初若有以兆之矣曾祖諱嗣修祖諱同春字仁齋考諱增龍字耀海以字行妣氏劉以民國紀元前四十年卽遜清同治十一年壬申生君于陝西華縣南鄉龍潭堡君家世居之地也有第三人曰鶴守鶴慶鶴瑞女弟一人曰淑貞適段配王氏同縣兵農堡人少君二歲生子女四人長曰鍾健次三均女子曰芝英芝芬季曰鍾華孫曰感孝新孝慈孝鍾健出君以民國十七年十二月十三日疾終于手創之華縣私立咸林中學校所謂以教育事業終其身如君者洵無間然焉君幼時遭家多難九歲始入堡塾讀書然性聰穎又自勵年二十一補學官弟子次年食廩餼其制藝爲懋任提學政所劇賞有聞當時先後肄業少華味經兩書院其在味經也會劉光蕢先生講學於此主持革新論學重實驗不貴空談行爲尙實踐不務虛聲君終身得力之書蓋植基於此焉爾時卽與諸同志組織友仁學會又成立集義書社書社之組織頗類今之書報合作社兼具圖書館性質又創辦天足會會約有「有子不娶纏足婦有女不纏足而讀書」之語此君從事社會事業之發軔也嘗佐其父創設蒙養學堂於龍潭堡當時風氣未開鄉人多稱爲「洋學堂」橫加非難君識卓志堅時以一阻力卽助力一自勉已而益集合諸友好發起團體興學之

舉成立華州教育研究會附設兩等小學堂君當選爲教育研究會正會長兼主持學堂要務知華州事楮君知君賢敦請兼任州立學堂堂長於是余提學使視察學務有陝西特色之褒詞時清廷於科舉之制猶將廢未廢也歲己酉君舉恩貢然殊不重視之仍汲汲焉以興學爲職志辛亥武昌建義天下響應改革之際地方不逞之徒輒乘機爲亂先是君銳志興學久爲頑固者所不滿無知者流嫉視學校尤欲逞志於生君故當時有一起手不起手先洗潭峪口殺完不殺完先殺湯鶴年一之謠君力持鎮靜初不欲令學生散歸嗣以人心兇懼勉徇衆請聽諸歸而獨身留校中十二月二十六日知華州事湯君宜瀚速君往州署示效死守城意以家小託君並以所僅存之廉俸銀四百兩授之君俾爲其家善後費及渠身後事君既受託以銀存邑中恐厄險乃於次日回家爲之安頓而是夜州中卽變州署被焚學校亦被搶掠一空嚮使君是夜仍留校殆必無幸矣君於是著有華州變亂始末記民國肇興舊制丕變地方當道有非借助於本邑正紳不能集事者君嘗受委爲財政紳時軍興之後事事棘手困難萬狀君任勞任怨卒使之靡不就範元年共和告成天下粗定謀及學事有議以私立兩等小學與邑校合併者君力排其說遂專辦高等未幾省軍政府羅致君任教育司次長力辭不獲勉強赴任居無何卒因省

政彪維且不慣官僚生活月餘卽辭職仍回邑專辦學校二年當選爲省議會議員會期屆滿復回校擘畫一切四年附設師範講習科於高等校五年籌設私立感林中學校苦志經營鑠而不舍至八年四月卒底於成厥後維持改進監督資財任重責專仔肩難卸直至畢命其中而後已嗚呼難矣君一生最痛心之事有二焉其一妣劉太孺人之喪君適東遊漢滬比聞病遄歸已不及十日君以有生四十六年足迹未出里門今一日遠遊竟遭母喪故終身引爲遺憾又其一則君卒之前半年家遭匪劫仲弟鶴守竟爲匪所慘斃君痛悼實深然君才長應變逆來順受每遇至不幸之事除人力所不可挽回者其餘若物質建設雖驟遭破壞不久卽恢復如初焉於家庭然於學校然於社會事業亦靡不然觀其辦賑務救水災以及各公益慈善機關君一至則事成立法立莫不仰賴焉其才可知矣君所受皆舊式之教育而思想則甚新其於子女也必令其受完滿教育不因環境困難而易其初衷今長子鍾健留學德國已於君卒之前一年得理學博士學位越年回國任北京地質調查所技師之職兼國立北京大學等講師君猶及見焉其殆熱心教育之初食其果歟惜此後不獲親見耳

論曰君之言論豐采惜未親承余又未嘗至關中幸嗣君鍾健爲余述其先德如此

然嗣君謙謙不敢侈言故所舉已恐未盡而余才疏筆弱於嗣君所舉又未能盡書也聞君之喪妣著有何恃錄後喪考又著有何怙錄其它若逢吉集及歷年辦學紀念錄等均未獲睹異時若獲盥讀更如親至關中一訪華縣故老或更有軼事隱德宜續著於篇者歟

柏筱餘先生紀念碑

同邑高又明撰并書

溯自張橫渠以躬行實踐之學倡而關中士習於樸其特立獨行足以矯浮誇而振末俗者代不乏人柏君筱餘余總角交也於辛亥鼎革之際贊襄革命熱誠澎湃屢輸巨資古人所謂毀家紓難者何多讓焉君諱惠民字筱餘一字效愚世居涇陽縣西之柏家村以商業起家父諱森字子餘清歲貢生中書科中書妣氏姚氏薛氏魏子餘公不惜優禮重幣爲君延聘名宿授以身心性命之學君讀書務觀大略與姚文山先生相友善過從甚密究心時事已不局於占畢矣嗣肄業於三原工業學校以經世爲務捐資興學於本縣石橋鎮設惠民小學校於本村設效餘女子小學校並供學生以書籍制服君慷慨好義志士樂與之遊遂於己酉歲（宣統元年）加入同盟會其時在陝同志不滿百人且皆文弱書生耳君愚坐而言不能起而行也先爲統一組織廣事宣傳商之余乃立一

勤公社」於三原推紀時若張立卿王治平等主持之由滬購運書報分發各縣聯絡各地學校師生互通聲氣書籍中如黑奴籲天錄鐵券之類以各地爭購不敷分配君爲之出資複印以廣流傳庚戌春（宣統二年）井勿幕先生銜先總理命從外返陝寓君花園中之水榭亭者二十餘日集合同志訂章程擬計劃通訊方法暨術語之研討歌謠之編製與散佈均於此中商定之故陝西革命之事業實於此胚胎焉會畢由君提議撮一影勿幕指亭顧君曰他日國是克定而吾人尙在者復置酒高會於此斯不朽之盛事媲美「蘭亭」矣從此渭北會務推宋向辰井勿幕鄒子良與君四人爲總揆督導各縣分會之成立與西安同志郭希仁張翊初李桐軒等取得聯絡齊一步驟不半載間三原「勤公社」得張警吾謝墉等諸人爲之佐富平則有焦子靜蒲城則有王敢陳寇勝浮醴泉則有羅少鴻晁式之乾州則有吳希真鄠縣則有崔寶航興平則有張復堂史可軒武功則有張仲良涇陽則有王菩僧周伯敏高季維李春堂耀縣則有成柏仁于鶴九胡定伯白水則有曹俊夫紛紛成立分會擴張勢力會員逾千矣然武裝仍付闕如復經開會議決由西安同志運動新軍渭北同志聯絡刀客——刀客者仗義行俠之流有武裝組織以抗拒滿清官府者也——李仲三欲資其勇力爲我効命齎書往說俾來加盟當

時會務發展固由各同志之活動而經濟則資君之力爲多又以軍火無著君立持現金伍千元羅少鴻捐麥二百石於陝北馬欄山開礦冶鉄鑄造手榴彈並廣事招納凡外省潛踪入陝之黨人咸匿踪於此是年夏又持金伍仟推由張奚若赴滬購買製造子彈之器材以沿途搜查無法運回乃改買黃色炸藥及宣傳書籍多箱運陝散佈於關中陝北及山西甘肅各地亦廣播革命之種子其時總會將於廣州舉義特派劉一峯（熊克武化名）來陝視察并策應風聲所播清吏亦漸有覺察君一面協辦會務一面以興學育材爲掩護工作與清吏相委蛇除本縣設學兩所外又於三原獨資創辦英算專修科涇陽蔡縣令贈以「文明先導」陝西曹巡撫贈以「信古好禮」匾額復被選爲陝西諮議局議員該局舉行開幕典禮之前一日西安府吏傳諭謂屆列憲蒞會時議員須站班以侍君倡言「吾儕代表民意非其僚屬何站班爲附議者多人以此忤當道遂辭歸究心社會事業捐萬金爲涇陽教育基金曹巡撫以君捐資興學專摺奏保賞戴藍頂花翎欽加道員銜特旨雙月指省選用親友中有以此賀君者君笑頷之而已臨涇渡口爲通甘大道坡度峻急遇霖則泥濘載道輒有覆車之厄人畜多殞行旅苦之君慷慨捐巨資興工三月化爲坦途矣會陝甘總督升允出巡蒞三原提學使朱宴之胡平甫與焉

胡於焉爲姻婭席次升允語涉君謂爲少年英俊而惜其所與往來者多非縉紳並誘以仕進勸其改行囑爲傳語蓋升已微有所聞而見疑從事偵察矣顧君氣不少餒更趨積極乃會務雖日見發展而意見則不無分歧遂於大雁塔集合勤公社與西安負責者及刀客之流開一密祕大會擬定於三原臘八會期乘西安清各官憲出城之日舉事時會中分急進與緩進兩派此議尼而未行君一日在其花園與同志集議畢感憤賦詩曰「仗劍獨立感慨多吾儕壯志共消磨赴湯蹈火男兒事不取自由奈時何」時某君和原韻以慰之曰「人定勝天在琢磨通盤籌劃妙機多魯陽挽日尋常事莫向夕暉喚奈何」此後日惟馳馬觀劇迴異往昔旋大抵焉適郭希仁劉允臣王敬如從西安來訪家人因君病篤未敢以告迨病癒始知深以爲憾遂萌遠遊之志欲以窺察各省之情勢辛亥歲正月各商號經理以清賬目賀春節集其家君告以將有遠行經理中公推年高者三人進諫以歷年用款太多千金立盡徒滋物議對家中正當開支反顧而不予一日遠出負責無人前途固不堪設想也君以贊助革命事屬密祕未便發表僅示以爲公衆謀福利本身並未浪費而已遂於二月初偕王悟塵王麟編及余束裝東行抵洛陽訂造馬刀長矛各千來復銃百以提倡武術名義分批運陝存寄三原耀縣各地民元起義時集藥

王山之民軍所持武器多仰此沿途觀風訪古於四月初抵漢口時長江風雲日急自九江以至湖南各處黨務歸譚人鳳負責聞君至漢特派旦宅賜吳禮倉洽商機要蓋清鎮標統領張勳之衛士營營長任庭耀陝人也俾君以鄉誼聯絡之以故留漢月餘始赴滬時宋教仁于右任陳英士譚人鳳諸先生主持總會於滬上君爲宋譚所契重贊襄黨務之外深慮陝西軍火運入不便乃囑余留滬攻製造炸彈炸藥之學迨民元升允率甘軍入陝陝西軍火不繼所持以禦敵者卽開廠自製之炸彈拒甘軍於乾縣咸陽間始終未能越雷池一步謂非君未雨綢繆之功歟復於五月著王悟塵負機密返陝兼囑王君自其家攜五千金以賑涇河沿岸之被水災者是年夏暴雨浸淫安徽沿江數十縣盡成澤國難民絡繹於途君復捐三千金派人分途救濟之會廣州之役七十二烈士殉國黨人流亡上海者由民立報館暨霞飛路總分會負安置招待之責雖革命軍屢仆而民氣激昂尤以青年學子多紛紛退學各回本省以推進革命工作君按日於克復學報社中招待陝甘川返籍學生酌助資斧俾利遄歸復聯合青寧陝甘豫五省在滬同人組織同鄉會以爲聲援又與趙菊樵勵樹雄徐朗西組織平民共濟會提倡工人儲蓄以君之盡力黨務熱心社會事業也先總理手書博愛二字以授之慰勉有加是歲八月武昌起義南

京安徽戰事緊急君以巨款助軍餉陝西則自九月初一日光復後戰事尤烈因清吏升允以甘軍攻於西袁世凱派豫軍攻於東醴泉失守潼關危急彈械缺乏電滬告急乃由子右任介紹以君之家產爲質向外商某行購步槍萬枝大砲四尊併子彈運抵陝西民軍以振陝難以紓此款後雖由軍政府支付然在革命勢力風雨飄搖之際肯以家產作質以求國事之砥定實屬難能迨清帝遜位共和告成家中函電屢催君乃摒擋一切於癸丑（民二）十一月整裝歸陝抵家後詎陝甘商號均已倒閉漢口存貨又兆焚如惟滬上之負債纍纍亟待清償耳而君仍處之晏然以爲四川商業尙存生活無虞也猶復熱心教育倡辦公益不稍懈隨與勤公社同人商善後僉以軍事急待結束首由北路安撫使井勿幕敢死軍統領曹印侯倡爲賣刀買犢解甲歸農忽晴天霹靂宋案發生矣君聞耗痛哭憂憤成疾語言錯亂遂足不出戶乃挽于右任先生書隱憂亭三字并序其後以易水榭亭之額蓋紀念宋教仁先生也未幾而四川之商業二十餘處水田房屋竹林山場均子餘公所手創或被侵蝕或被霸佔竟化烏有而君遂以質產鬻物度生活旋遭荒年周轉不靈因欠三原某錢莊三萬餘金無力歸還速君於獄鉄索琅璫後經調解以物償債時民國十五年也夫以養尊處優之人久羈縲絏出獄後遂身患癆痺寄寓西安

處境蕭條親友覩狀有不勝今昔之感爲之歎歎者君反慰之曰「爾不聞四野哀鴻乎吾猶在天堂中也」因歌曰「天地爲廬舍精神寄太虛形跡雖蕭條吾樂一如昔」一日鄧寶珊偕老友數人往訪猶侃侃而談時以國事見詢語不及私自竊戰軍興每聞捷音則歡欣若狂及聞某地失守振臂大呼或拍案擊床目覩敵機橫空尤爲憤激因之病日增劇回鄉靜養竟於二十九年二月十三日逝世君距生於光緒十四年四月二月享壽五十三歲以民國三十四年五月十六日葬柏家村南新塋辛山乙向葬期擇定國民政府中央曾明令褒揚君德配胡氏子紀憲女紀華均天次子紀會隨侍在側嗚呼余與君少小相依託介之加盟其見義勇爲慷慨激昂所貢獻於黨國奠基之初者誠非淺鮮竟以蕩盡家資負債莫償陷於囹圄之中而君處之泰然不聞怨尤其時同人多流亡在外愛莫能助良用疚心今者水榭亭之高朋大半凋謝而主人之墓木已拱矣回憶前塵煙雲過眼援筆記之使後世獲悉革命事業中曾有此無名英雄作奠基石也

中華民國三十五年 月吉日立石

附錄民國三十六年十二月三十日收到于右任先生書一小冊內首章載述柏君筱餘生前事蹟又與余信一封併敘其事茲附錄於後信云又明老弟同志……寄上

「涇原故舊記一本」有誤處希指正爲荷小餘兄之長處至今猶念念不忘也專肅卽頌時祺右任印十二月三十日

其書「涇原故舊記」序文及柏君之記述錄如后

余原籍涇陽生於三原始就傳涇陽北鄉十一歲復入三原讀書十八歲後往來涇原三大書院間（味經崇實宏道）自髫年迄壯歲一時志同道合之學友以學問事功相砥礪者多有所表見於世其抑鬱而死墓有宿草者亦不勝其悲天定勝人歟吾知之矣環境之造成也以漸而羣生感受也至酷百餘年來吾國材智之士力不能竟其業學不能得其地才不能致其用窮苦困阨中道而仆者乃社會之普遍現象而北方尤甚余之得友其人及身聞見其行事者特千萬分之一耳昔在北京吊茹懷西詩「九原莫道人情薄老友吞聲送紙錢」今之濡毫作記亦吞聲紙錢之意也

民國三十三年七月一日于右任記於成都西門外高埂子寓廬

柏君民字筱餘涇陽西北鄉人自犂角卽豪放不羈家素裕聞余遠遊海上有所作爲壯之遂挾資往遊時方二十一歲自云欲遍交天下豪傑見余助民立報八千金晤陳英士贈以萬金曰「此余遠遊之志也」民國成立公絕口前事其扶持同志之心則始

終如一民國十五年以商業上之牽連被拘入獄及釋已癡迷不省人事長臥興平縣某宅中十六年余往視之連呼其字公似聞聲而習翻身瞪視復睡去展轉炕上十餘年忽於睡中長逝時二十九年某月某日也國民政府有令褒揚

上文高又明附錄三十七年九月二十九日

甄士仁先生傳

二十三年五月孔堯天撰于京

甄士仁字壽山陝西麟遊人明兵部左侍郎儀十六世孫儀於明有勛建專祠於邑迄今存其大父名陶序有長者風父名揚清拔貢以功授五品銜士仁幼承庭訓讀書聰穎異常兒年十五入邑庠倜儻不羣常大言曰真尋入鳳翔府中學堂肄業會清季受創四裔士仁憤內政不綱外侮日至知非革命不足挽危局乃慨然棄文學武初入陸軍小學繼入陸軍中學因井勿幕加入中國同盟會革命之志益堅將卒業而武昌革命軍起士仁揚言於同志曰革故鼎新此其時也遂輟學隨勿幕謀西北響應事旋投効陝西民軍張鈞部任七標二營幫帶轉戰潼關商維岡所向有功事定策勳士仁自以學未成不就功解職復入陸軍軍官學校求深造時賢益奇之翌年畢業袁氏帝謀始著派陸建章入關督陝裁陝西民軍略盡搜捕黨人日益急士仁與同志吳希真董振五王紹文等

密祕運動逐陸討袁奔走於渭北西路紹文竟以身殉士仁問道獲免嗣同希真糾集健者起省西殲守兵奪其械連戰岐山扶風所向披靡時河北民黨雲起胡景翼虜建章子承武於富平陸氣沮與陝旅長陳樹藩成議陝平陳繼爲陝督士仁散其衆東遊京滬窺關河阨塞未幾陳昵時相以陝西叛殘害黨人益甚會西南靖國軍興士仁以有機可乘乃歸與同志密謀倒陳應西南七年一月張義安董振五等首義三原士仁偕希真等亦發難西路迭克岐山武功各要隘旣而東防告急復轉戰交口興市下邽上漲渡等處以爲聲援後遂練兵于交口雨金間閱八九年歷任靖國軍及國民二軍團旅長等職十四年國民軍革命告成景翼率軍入督河南時鎮嵩軍劉鎮華據陝遣部將慈玉琨亂豫爲景翼所破劉傾師東犯私召吳新田自漢中入長安與民軍抗士仁聯合各軍驅逐劉吳力戰數月卒保交雨勿失十五年國民二軍敗豫西鎮華乘變收聚鎮嵩軍餘衆爲匪豫西由荆紫關犯陝圍長安八閱月勢張甚時麻振武據大荔黨鎮華鎮華別遣梅發魁王老五等率三師之衆與振武協攻渭北士仁首當其衝堅結民軍留陝各部血戰半載卒大破梅等於交口與各軍進圍振武於大荔斬獲甚衆十六年于公右仁邀馮玉祥由俄問道援陝獲總陝西民軍考戰績擢升士仁爲國民革命第二集團軍第十七軍第三師

師長本黨始正式組成陝西省黨部士仁以功望被選爲陝西省黨部第一任執行委員首以黨義訓練所爲關中各軍倡嗣玉祥主陝甘政巨匪王有邦聚衆據吳山爲害陝甘甚烈吳山勢險峻玉祥初遣部將孫良臣張維璽率數萬衆圍攻屢月不克乃調士仁率部由涇陽乾縣間道入隴士仁探知吳山形勢僅一路可通山頂而匪又以重兵扼守非用奇計不能破也因揚言奉急命出關北伐使匪不備拔軍東行數里忽折入吳山下出其不意仰攻側襲激戰三日夜卒覆其巢殲其渠帥救出肉票數百人然所部僅五千人耳吳山平陝甘邊境安謐兩省當局大加犒賞後助馮盡平陝匪俾馮無後顧之憂始能悉衆從中央軍北伐也洎北伐竣功統一告成中央決策編遣士仁善觀大局以非裁兵無以言建設乃首發通電請裁遣所部爲天下先維時各軍割據爲雄莫肯就範馮氏念其戰功不忍裁復調至耀州將令入榆林士仁力請解甲乃從陝省政府酬庸簡任爲陝西印花稅局局長到任數月剔除中飽廉潔自矢陝國稅興色自茲始十八年冬陝主席劉郁芬以玉祥命據陝甘叛士仁舊部散伏西路劉欲令維持後防士仁不肯從以關中連歲大饑請願襄辦賑務以救災侵時陝西災民子女被販賣出關者不絕於潼蒲遂以賑務委員名義渡河至晉籌辦陝西難民收容所於河東救濟累萬卒免於役十九年

玉祥自晉返秦，兵倡亂反抗中央。士仁以爲馮氏不除，大亂不止，乃乘機潛赴省西，招撫舊部，組西北民軍，建節鳳翔，以討馮氏。嗣中原戰甚烈，蔣總司令察知其情，授士仁陝西討逆軍第一路總指揮，連電促夾擊士仁，乃東征迭克岐扶興武等縣，復分兵收乾縣醴泉邠縣長武，斷馮氏陝甘交通，繼率部轉佔三原涇陽三水淳化，進迫長安。馮大震中夾復，派楊虎城乘勢入關，馮遂瓦解。先是士仁隻身起鳳翔，廣設軍職以資號召，破馮後部，勒滿數萬，收復關中，大半事定。虎城忌士仁功望，陽示親善，邀至省城，會商善後，乘機加害。時十九年十一月六日也。哲人云：亡邦家殄瘁，遐邇聞者，識與不識，莫不痛悼。海上開會追悼，哀啓遍載國內，各大報彌月，其部衆亦紛起抗楊，至有哭泣數日不進食者。後卒將虎城所派收撫士仁部屬特務師長李雲溪戮於軍次。（初士仁與虎城爲刎頸交，故恃不加戒。事後虎城雖惕於物議，痛自悔責，累思優卹，然已無及矣。）士仁性孝友好，任俠與人，交散千金，立盡有求助者，必量力予之，無少吝。且謙恭下士，能納雅言，以故士之有才略者，無少長咸樂與遊。又知人善任，沈勇有大略，率士卒能共甘苦，雖屢年餉糈無着，無去者。及戰輒自將，以前部衆無敢後，以數千之衆縱橫關中十餘年，政局屢易而特獲保全者，先聲奪人也。至其不畜婢妾，不置私產，純爲國謀，尤爲關西軍人中不可多

睹者平生好急人難十八年歲大饑人相食出私資備粟數十石麥粉數百袋濟人饑全活甚衆接見賓客屬下未嘗疾言遽色談論國家事雍容有儒將風才兼文武少有大志在職求才若渴見賢如不及惟恐失之聞人善必折節與交推心而後已故士多向之其遭妬亦基於此貴志以歿惜哉士仁以民國紀元前二十五年五月二十五日生享年四十有四遺子女各四人少以民黨從軍起卒於陝西討逆軍第一路總指揮任

紀金福先生傳

寇退

紀金福字子文富平人清光緒末年陝西師範學堂學生爲人短小瘦弱沉默果毅而慷慨好義事親至孝同里咸常稱道之由井勿幕寇勝浮介紹參加同盟會辛亥光復時奔走各軍間建樹頗多其後當選陝西省議會議員因當道對選舉有舞弊事不屑就憤而赴京請願及靖國軍建立渭北君歸任財政處長籌募餉項擘畫周詳不避權貴不徇私情厥功甚偉嗣任富平縣知事時同邑密友武觀石團長被大力者狙擊遺屍無敢收者君聞訊獨往撫屍痛哭爲營棺殮并安慰其家屬遐邇聞之莫不高其義觀石歿後其部屬感激君之爲人共戴君爲團長不願屬他人君以體弱不嫻軍事堅拒之而靖國軍第四路司令胡景翼又竭誠相委辭弗獲遂權就焉越年代胡景翼赴粵而謁孫總理

請示軍機歸途因事滯留滬上年餘返陝時陝局已變君息影田間不問時事君自少留心岐黃之術至此益潛心研討造詣既深著手成春醫名大著求診者日盈門踵相接遇貧窮無資者兼施以藥雖生計拮据而博濟之心不能自己亦足以見其襟度矣與同邑馮子明師長相友善子明駐節富平每遇大事輒就商之當寓滬時有友人子留學俄國君允資助旅費尙未及措置其人忽告以卽成行君遽取新製皮衣予之令典質易資而去無難色蓋其重然諾尙義氣有解衣推食之量遇事縝密精細謀深慮遠籌之既定必底於成雖有阻難中途不能改易以故同志友人有所疑難多取決焉君體素弱於民國三十年卒於里第年五十有四無子以兄之孫爲嗣女二

田故監察委員毅安事略

中華民國三十七年十月一日民選首屆監察委員田毅安先生因公致疾卒於西安時年五十有四國失老成時論惜之

先生家清苦無叔伯兄弟七歲喪母十四喪父阻險艱難一身備嘗早歲習經史夙夜無間後入師範肄業有聲庠序年十六以家窘執教鄉里邑令許爲奇才

民國九年駐軍某慕名於櫟陽創立高等小學校禮延先生任校長宣揚三民主義

從事革命工作十二年爲反革命勢力所壓迫雨夜越城赤足走數十里出潼關遊京燕
遍交當代有識之士十三年約同志入黃埔軍校一期習軍旅受知於王柏齡先生卒業
後供職教導第二團時革命武力僅有教導一二兩團十四年應岳西峯將軍之約任國
民軍第二軍騎兵第一旅少校參謀十五年調營長不久以功升步兵第二團上校團長
十六年任長江要塞司令部祕書參加龍潭之役十七年任新編一師一旅副旅長參加
二次北伐諸役十八年任新編十四師政治部少將主任參加浙川討逆諸役十九年任
陝西省黨部指導委員兼書記長二十三年任南昌行營設計委員二十四年任陸軍六
十一師政訓處長參加松潘剿匪之役二十五年任陸軍十七師政訓處長參加陝北延
川一帶剿匪之役二十六年任西安行營政訓處主任祕書二十七年任陝西省黨部執
行委員二十八年任陝西省軍管區參謀長三十四年任陝西省軍事征運委員會主任
委員三十五年任陝西省企業公司總經理

先生供職黨國勤慎奮勉所至有聲人多推重故得於二十年當選爲臨時國民會
議代表制定約法二十六年當選爲國民代表三十五年出席國民大會制定憲法國民
參政會當選爲第一屆參政員翊贊抗建大計多所供獻三十六年冬當選爲第一屆監

察委員先生獻身議席持重謀國不競虛名然遇重大問題侃侃力爭當監院召集首次會議時以病累身弱子女請緩出席先生曰「國事日急予何敢負人民之託」遂力疾赴京到京後病加劇但每日必照常與會友好勸阻笑允之然仍攜議案到會場克盡厥職未嘗少懈後經友人婉勸遂於休會時返陝不料竟爾一病不起彌留時猶殷殷以國事爲念言不及私嗚呼痛哉先生有遠識具膽略十四年春上書總司令 蔣公陳戰略及建軍計劃萬餘言深蒙嘉許急電召見並令與某機要科長商談十五年冬駐防彰德值當地紅槍會起滋擾百出曾奉命剿辦先生深體民隱洞察亂源隻身單騎走晤亂首述利害講大義萬衆悅服不血刃而亂平後軍隊移防百姓羣集垂涕遮留十八年中原之戰新十四師主將態度猶豫值全體官兵集會先生講解時勢剴切憚述中央必勝叛逆必敗語語中的衆志遂決斯役十四師戰績特著說者謂一篇宏論勝於十萬甲兵

先生治事精明尙研討二十八年長軍管區鑒於役政得失爲戰爭勝敗之基曉夜擘劃獎善懲惡所有重要文稿多出己手累蒙中央嘉勉今日陝西兵役行政爲全國之冠先生與有力焉三十四年主軍征會陝西應繳晉省屯糧十餘萬包例由關中各地運至宜川時值農忙天雨運價超過麥價若干倍先生不避衆議在各地變價由宜川購麥

填補紆民困裕軍精軍民交譽

先生好學不倦公餘之暇披衣跣足手執一卷焚香靜讀遇會心時輒朗誦不休學無專攻故見聞淵博尤愛吟詠自創體例所著有不值一笑詩稿日記雜錄各種待梓問世先生陝西臨潼人原名疇號易庵以入軍校改名毅安以字行生而岐嶷性爽朗平易近人然不苟同與人交出肺腑一諾千金對人事如己事處朋友如手足故人樂與之遊侍親至孝幼感家庭孤苦及子女成行每遇佳節拜祭輒以親死不得見子孫圍繞樂事便唏噓淚下嗚咽不成聲父寶荊公業商篤信義好與士君子交能熟讀經史母梁氏慈惠勤儉元配袁氏生子學紀女彩霞秦娥繼配毛氏生子煥新慶餘憲生女芸娥覺生

田故監察委員毅安治喪委員會編印

陳冠三先生行述

陳鼎甲字冠三又字柳溪祖居陝西長安細柳鄉人生而穎悟幼受業於名儒柏澧西高足蒿馨齋先生之門講授反身經世之學頗有領悟師目之爲奇器旋考入西北大學法政科畢業後又入陝西吏治研究所研習深造學業益進民國六年陝西靖國軍興奉張公伯英命密在省垣附近集合同志組織靖國軍第三游擊支隊遙應渭北靖國軍

聲勢率隊經由潞鄆歧郿渡渭而北抵達涇原時今院長于公任陝西靖國軍總司令駐節三原 先生進謁蒙贊爲後起之秀函介赴廣東求學行至長堤趨謁 國父親承教誨始得加入國民黨旋入韶關講武堂又得受業於李公印泉講習軍旅多有心得畢業返陝岳公西峯招致爲副官事無鉅細認真求是未幾全軍改編升任營長訓練有法紀律嚴明所至甚得民心民國十三年全軍密謀脫離北洋羈絆建樹民軍義旗 先生時方駐防北通州聞訊之餘當機立斷密製青天白日旗幟矯命出師直達北京接收敵械維持治安孫公禹行深爲倚畀此後天津及黑石關南口炒峯山諸役運籌決勝料敵如神胡孫岳三公獎譽有加 先生不矜不伐益自奮勵是年間 國父將有北上之行時先生負京津護路任務忭喜雀躍及晉謁 國父慰勉懇摯稱爲戎馬書生十四年春 國父薨逝 先生設位而哭悲不自勝嗣三充團長五任旅帥轉戰大河南北戰勝攻取所向披靡響應北伐多著功勛十六年北伐成功兩總師干極謀整訓師徒建一革命勁旅以上承 國父未竟之志惟以時事迭更志業未竟乃於十九年追隨今參謀總長陳公辭修參任戎幕後以其父染疴棄養 先生哀毀骨立閉門讀禮蟄居林泉絕意世務然對於國計民生關懷仍切地方疾苦多所建白極爲鄉人愛戴二十六年夏選舉國

民大會代表經長安渭南等八縣父老公民一致推選爲區域代表因七七變起抗戰軍興會期遷延時更入載去冬會議召開 先生赴京出席制憲告成蒙國府聘任憲政實施促進委員會委員乃以積勞成疾返陝養病歸自京甫逾月而逝卒年五十有二子二重慶同慶

樊亮澄事略

樊允生

樊亮澄陝西三原東里堡人家世業農昆仲九人先生行五天資穎悟而訥於言性喜交遊工書法精拳術不事生產每語人曰吾他日若能驅除夷虜使不危害華人斯願足矣其英挺之氣可以概見民國五年胡景翼任團長成立學生連張義安任連長往應之頗蒙賞識時年十九後靖國軍起三原先生任軍職旋被送入韶關講武堂肄業回陝後景翼時爲靖國軍第四路總指揮派赴蜀謁熊克武呂超等咸器重之先生自念學識淺陋終難展佈繼入四川講武堂繼續研究卒業後歷任胡部要職陝中先後各戰役均以身參焉胡將軍景翼督豫時駐馬店之役先生任營長躬冒彈雨不避危險卒負重傷迨楊虎城綏靖西安君任衛士營營長剿匪淳化值彈盡士卒死傷丘積尤奮勇馳突轉獲勝利其後爲楊子恆參謀佐王應榆辦警政皆錚錚有聲劉慕德師長一見如故亟以

兵一隊付之因將其隊游擊晉境與日寇大小數十戰無不殺敵致果永濟陽城屯之役奮力鏖戰軍聲著遠邇倭寇嘗迂道避其壘劉師深倚重焉既而日寇大集必在摧毀君所部士卒久戰疲憊不堪死屍枕藉巨彈翻發煙火迷漫先生意氣自若督兵進戰無所顧從者祇餘數人或勸其返作後圖先生曰全軍不保吾安可生還師竟陷先生卒年四十有五時民國三十三年三月也

陸軍步兵上校陝北國民軍第二團團長兼第一營營長楊明齋紀念碑

烏庠一日碧血千年白虹石馬風嘶共灑同袍之淚銀渠星隕難忘上將之功陝北國民軍第二團團長兼第一營營長楊公明齋者卽今綏靖主任楊公虎城之舊部也諱燉德字明齋陝之商縣楊家巷人也軀幹修偉狀貌魁梧聰穎過人任俠好義年十七肄業縣高小學校卽富革命思想辛亥民軍起義公投筆從戎以驍勇聞共和告成公毅然歸田護國軍興充陝西騎兵第一團第二連連長其後跋涉千餘里由關南間道出山歸靖國軍楊公虎城麾下編爲游擊營營長十三年冬陝北國民軍成立改編第二團第一營營長鴻遇順風魚縱巨壑蓋非楊主任不能得公而公亦非楊主任不爲所用矣旣而奉令懸駐渭北康橋來化潘驛等處荏苒立靖潰池無盜弄之兵鷄犬不驚婦孺識葉公

之面模範軍人之譽遂嘖嘖人口自民國以來陝局多故身歷戎行毅而能擾剛而不戢受風后之金法作楊公之鉄星馬嵬驛八牛村各役叱咤風雲山岳崩頽其多謀敢戰久爲儕輩所心折方期勛名日高國家攸賴詎當道虐民以逞陝人不堪其苦聲罪致討公奉虎城司令命令追敵於郿縣槐芽鎮之銀渠以少擊衆誤中飛彈竟死綏焉然由是而陝中大局遂定漢南餘孽肅清公之死堪惜公之功亦偉矣俎豆千秋風興百世誰曰不宜嗟嗟今日者感風雨而念飄搖寧無同舟之誼聞鼓鼙而思將帥益深猛士之懷爰伐石記功昭茲來許其他捐資興學與其民族世系俱見家乘示略也

西安綏靖主任兼十七路總指揮楊虎城

同立

陸軍第七軍軍長兼四十二師師長馮欽哉

陸軍第三十八軍軍長兼十七師師長孫蔚如書丹

中華民國二十六年一月

吉日立

井勿幕墓誌銘

餘杭章炳麟造

井勿幕字勿幕陝西蒲城人也家世大俠少與兄崧生習手臂十二歲以家中落走重慶依戚屬居稍長游日本入大成經緯諸學同盟會起密署陝西支部長陝西光復自

勿幕始也時民黨多少學子勿幕歸獨結田野奇材爲用亦與諸儒先相要多應者清宣統三年九月同志謀起西安以應武漢時勿幕在耀州倉卒推張鳳翽攝軍事陰戴勿幕爲大都督勿幕使人曉譬言亟易主帥徒自擾乃推任陝北招撫使行收兵徇直北諸郡縣下之渡河欲規復山西山西已獨立乃還渭北渭北者陝西繁富地涇陽三原諸縣在焉勿幕部勒士卒毋得犯民間尺寸渭北大安時諸將雖有功然皆以勿幕爲綱紀南北旣一勿幕卽散遣士卒遣一旅付陳樹藩而身走上海期讀書償素願習國文英吉利德意志書甚勤民國二年春賊殺宋教仁于上海東南諸將皆發憤欲舉兵北向陳其美等要勿幕甚急勿幕報曰倡義以來創夷未起苟無害國體者吾不欲與爭也自是壹意求學聞人言國政卽不應四年冬袁世凱將改號勿幕奮曰斯時不起民國爲無人卽挺走入雲南明年從蔡鍔出宜賓爲第一梯團劉雲峯參謀去與北軍鏖戰月餘勿幕處前敵時失食不近茵尋雲南兵在四川往往凌暴賴勿幕調護得無擾諸豪民亦樂爲用功最多世凱死從義師者皆以擁國體受上賞勿幕復走上海習文學如故會李根源被任陝西省長知勿幕爲陝西望力請任關中道尹是時陳樹藩已爲督軍數不法民甚厭之六年夏團長耿直兵變欲戴勿幕以傾樹藩根源數勸勿幕應之勿幕持不可曰假反側

子以傾人後不可制根源愈趣之勿幕退語人曰陝西事非我不能收拾覆樹藩易耳如諸君所爲無益也初勿幕在陝西具識閭里姦邪及諸將校情僞知倉卒不可杞治期蓄力聚財十年乃大起振治之陰有部署不欲與乘時要利者謀故不肯如根源計靖國軍起耆帥郭堅等從關中應之樹藩疑勿幕與謀時遣人司視勿幕遂移疾習外國文學用自暇雖退居當事視之如敵國七年民軍舉于右任爲總司令既入關謀環攻長安樹藩恐請勿幕爲解說勿幕亦以耆帥遽起秩敘將亂願自出說攝之乃許行到三原旬日諸耆帥皆來歸願聽約束者數萬士氣大振樹藩益懼悔遣勿幕行而郭堅舊部李棟材遽陰圖勿幕以悅樹藩十一月二十一日勿幕與雲南葉荃會師還將至興平棟材矯郭堅書要勿幕入其軍時勿幕屯軍去棟材營不十里卽輕裝以從者八人詣棟材至壘門伏軍起發銃擊之立死從者一人脫走歸報後軍至棟材已棄營走樹藩方置酒張軍樂得勿幕頭賓寮皆大歡勿幕妻妾在長安者聞變使老僕請其元樹藩不與會雲南四川援軍責問勿幕死狀甚急而蔡生方爲陝北鎮守使樹藩憚之乃歸勿幕頭于蒲城頌言殺勿幕者郭堅云勿幕死于右任如失左右手陝西事遂大壞西南援軍亦以命令退矣八年春城固康寶忠以葬告乃爲銘曰

秦晉甲塲以興良士任俠好修善刀而剗初起北山民不恩兵井竊倘若市閭無諍
燦忽遠引潛軀博皋隱見不恆唯義是要丹貞以燒桂馨斯靈如可贖兮种吳之亞

李百齡事略

王季方

李百齡字壽亭三原人初入陝西陸軍測量學堂一時同業多黨人以革命爲職志
先生從加盟焉參與辛亥陝西革命軍隸河北安撫使井勿幕部戰潼關駐軍韓邵間共
和告成赴日本留學入早稻田大學肄教育歸國後歷任陝西第一師範第三師範渭北
中學三原初級中學各院校校長先是陝西靖國軍興于先生右任返陝主持軍事禮延知
名士列幕下當時深識博學材器宏通之士如茹欲立李元鼎蔡屏藩王普涵李福蔭王
省三李秉章田蘊如王陸一與君皆一時之選而君之良規密謀爲獨多云其後北洋軍
大兵壓境陳樹藩亦南奔于公墓府西移諸君相從崎嶇間雖一日數戰形勢漸非而諸
君毅然不爲少動敵陣漸蹙犯益急兵且盡于先生知不可爲遂下令退軍而囑幕府諸
公出四川赴滬君與李元鼎至隴蜀間與于先生相失竟不得偕至滬豫人劉鎮華二次
擁衆入關圍西安分兵掠河北諸屬進圍三原于先生北上至西北利亞與馮玉祥籌援
陝計既決同至五原誓師分大兵爲五路日夜度隴向西安大破鎮華之衆于先生與馮

先後入西安遴任陝政者以君爲教育廳長組設革新建樹藁多其後于先生旣任監察院院長任君審計部祕書非所願也及十七路入關君仍被任教育廳廳長教界翕然樂再得賢有司也二十六年省府改組君遂家居不出研精問學蕭然不異初爲學子時君性恍爽與人無町畦其學特長於數學有神識每宿學累日所不能理解者持問君君受視片刻曰某類某式曾不假思索其敏捷有如此者當時陝西言數學者咸推君焉嗣是盡棄其學轉研深於佛老晚年所得極通博然性清介不妄干人故生計時窘乏賴諸故舊時助濟之晚年所往還最摯者爲茹欲立溫重爲諸先生三十八年元月七日以失足墮崖死遠邇聞其喪無不痛惜之

李養泉先生事略

蕭履恭

李培黃字養泉陝西城固縣人幼有膽略卓犖不羣入小學讀未久卽棄去清光緒三十四年入本省陸軍小學畢業後繼入直隸清河陸軍中學至民國二年始入保定軍官學校其時袁世凱禍國殃民摧殘革命先生憤之乃請假密赴南京上海加入討袁軍失敗後始回校肄業在校與山西徐雲程焦有雲本省王祥生程星五以及漢南各同志密切連絡從事革命活動同時與校外諸革命同志如山西李岐山續西峯周耀武馮欽

哉武勉之弓海亭本省于右仁曹俊夫胡笠生史可軒等深相結納計劃革命慷慨急難頗見推重迨畢業後應川督熊克武之約與徐雲程焦有雲成立警衛團任第二營營長轉戰年餘所向有功嗣改任講武堂堂長畢業其中者約三百餘人內百餘人爲本省靖國軍所保送故靖國軍軍官多出先生之門而先生所以赴川應熊公之約亦志在培育人才接應靖國軍故耳六年冬與熊部師長呂超帶大量械彈取道漢中謀接濟靖國軍中途被阻不得已回軍廣元與駐漢中陝軍劃界議和今川邊效場壩尙有先生所立界碑存焉九年歸里靖國軍總司令于右仁與胡笠生曹俊夫諸同志數度遣使相邀乃赴三原任靖國軍騎兵團團長團結內部辦理外交激勵折衝軍威大振先生與有力焉十三年冬直奉戰起時胡笠生已率陝軍出關參與戰役先生與李仲三任陝軍軍事總代表奔走喜峯口一帶參贊戎機爲功匪尠而國民第二軍之成立亦出自先生運籌之力焉十六年秋北伐軍至武漢委先生爲獨立師師長屯駐柳林一帶之舊部皆聞風來歸風紀軍紀至爲嚴整旋因父喪解職回里守制葬親後卽息影家園力事農田惟因聲望炳著爲邇時漢中當局所忌二十四年舊曆十二月三日赴南鄭將歸出城時遇伏殞命人皆惜之

祭李壽亭先生文

茹欲立

維中華民國三十八年一月十四日故人三原茹欲立謹藉香花果脯之設清酒庶羞之奠致祭於亡友壽亭李君之靈曰國事蜩螗生民塗炭華夷混合玄黃血戰人誰不死死亦何嘆嗚呼哀哉昔在民元余未識君袁氏盜國余乃東奔蟄居三島始聞君名高材奉派學有專精我歸自東君留彼邦遂陸擁陳君不聞聲靖國之役余居幕府君始歸來協贊教育軍遷武功與君同止不久敗散東西異趨于後三年余歸自滬南京奠定君勇赴之我乃後勁余副計政君處公幕周旋左右扶持弱者得免愆尤非君莫可爾後君歸服務桑梓余時在外相隔萬里楊和邵倡政平敦理百年樹人民思無已如何抗戰荏苒八年天翻地覆神州腥羶我歸自南首都播遷露餐星奔望君息肩招魂鎮驚笑語開筵厚意莫報爲歉甚焉同居里閭十年已久日夕相過殷勤斗酒談說道論清言磊磊示我篇章爲江爲海我耽染翰蓋小道耳君輒矜容如出於己君樂玄虛惟靜情寂我實遜謝莫能損益永訣先日相會與友美酒羔羊劇談不朽如何隔日蟬蛻瑕垢嗚呼哀哉我之猶女君之子婦願言相好共此白首奈何李君遽此長眠否極復泰萬事唯天方期握手笑語相寬夜臺寂寂九原何往文以告哀嗚呼尙饗

西北革命史徵稿引用書目

半哭半笑樓詩集

于右任著

有印行本

右任詩存箋註

王陸一著

有印行本

辛亥從戎日記

郭希仁撰

有印行本

秦軍東路戰記

張伯英撰

未印行

東路戰事日記

張伯英撰

未印行

秦敢死軍第五標始末記

薛炎撰

有印行本

如是我見我知錄

高又明撰

待印

辛亥新疆起義記實

李嘯風撰

未印行

李仲三六十自述

李仲三撰

待印

陝西辛亥革命記略

陝西撫卹委員會編纂

西北革命先烈事略共十三冊

陝西撫卹委員會徵集

郭希仁等六先生碑誌傳狀集

溫良儒撰輯

有印行本

西北革命先烈碑誌哀誄雜文彙集

陝西褒卹委員會纂輯

有印行本

陝西革命戰事記略

房仙洲撰

未印行

陝西靖國軍革命戰記

屈古愚撰

有印行本

迴憶錄

華孝康著

未印行

井案紀實

華孝康著

有印行本

陝西靖國軍第一路戰記

党晴梵撰

未印行

堅守西安勝利八週年紀念特刊

西安綏靖公署編輯

有印行本

富平革命史話

何守中撰集

待印

長安圍城紀事詩百首

聶匡著

有印行本

秦隴報

以下三種皆辛亥前西北留日學生創辦

存本甚少

關隴報

夏聲雜誌

程運鵬傳

君諱運鵬字搏九先世居三原南鄉曹渠寨以農爲業清同治間其父福堂公始遷居縣治經營商業遂著籍焉母吳孺人繼母李孺人生君及弟仲鯤君幼時入塾讀書以靈穎見稱比長受業邑耆儒朱先生佛光之門入庠食餼貢太學朱先生教學者以通經稽古誠已誠物君一稟師承故學精誥訓志在民社肄業昧經宏道等書院爲上舍生於學政考古時選取經學第一時清政不綱國事陵夷中山先生以革命大業詔示國人邑人士之先覺者咸聞風興起而朱先生於革命理論宣揚尤力及門景從君遂加入同盟會與于右任井勿幕諸先生相友善辛亥之役贊襄井勿幕先生戎幄光復後主持國民黨三原分部事旋當選陝西省議會議員二次革命失敗後參加樂羣學社（中華革命黨陝西支部）暨護國靖國諸役民國十八年關中荐饑當被地方推舉與朱仲尊先生辦理三原賑務以工代賑籌建市房爲佛光小學奠立基礎二十二年任國民政府監察院監察委員二十七年辭職平日對教育事業極具熱忱曾任三原教育局長三原公立第一小學縣立高等小學蠶桑學校等校長暨省立法政專門學校陝西師範學校講席性耿介蒞事方嚴每面折人過人則多其直諒云常詔諸生以立身行已應事接物之道

曰忠信篤敬直道而行汝曹當深念斯旨也體氣素健甘澹泊蔬食布衣若將終身家人以甘溫進奉時輒予訓誨自六十八歲失明後雖家居簡出而每遇地方公益事業之集會則有召必往往時策杖扶孫徒行以赴按時而至未嘗以步履艱難爲辭謝焉治家嚴慈寬栗居平對子弟不輕假辭色於孫輩亦如之君卒於三十八年一月二十九日卽夏曆正月初一日也元配徐夫人子二存誠新誠

附錄本會歷次組織概況

第一期 按本會於民國二十五年在重慶經中央政治會議議決二十六年遷在西安成立

陝西革命先烈崇祀撫卹委員會

主任委員 劉守中

委員 張繼 于右任 邵力子 馮玉祥

總務科主任 楊子廉

編輯 纂 成柏人

文書科主任 溫重為

第二期 按民國三十一年劉委員逝世後經于委員改為今名並增設編纂委員嗣於三十一年在西安陝西觀察使署開會決定簡章如後

陝西革命先烈褒卹委員會

委員 于右任 張繼 邵力子 孫蔚如 鄧寶珊

顧問 茹卓亭 李子逸 張伯英 張翔初 焦子靜

寇勝浮 景梅九

編纂部主任 王陸一

編纂委員 成柏人 張警吾 段澤青 以上三人未任事

房仙洲 馬亞時 華孝康

採訪部主任

牟文卿

採訪委員

劉藹如

曹俊夫

郭子興

李壽亭

張德樞

党仙洲

郭燕生

王丞齋

王德卿

楊子廉

王紘先

胡璧如

韓望塵

蔡江澄

周伯敏

王紹猷

溫重爲

李冲三

楊叔吉

張子宜

馮子易

劉凝遠

總務部主任

溫大緯

事務科長

李瑞峯

文書課長

王學悌

會計課長

朱海澄

第三期

按三十五年因編纂工作未竟經費無着公推寇耀三委員向省政府商請維持並推寇君爲副主任委員督飭編纂事宜

主任委員

于右任

副主任委員

寇勝浮

委員

張繼

邵力子

孫蔚如

鄧寶珊

張翔初

餘仍前表

張伯英

陝西革命先烈褒卹委員會組織簡則

一 本會組織遵奉 中央執行委員會專案決定爲褒揚陝西革命先烈及與陝西歷次革命有關諸先烈之志事並編輯史傳撫卹遺族定名爲「陝西革命先烈褒卹委員會」

二 本會設主任委員一人副主任委員一人委員三人由 中央執行委員會就本案原提請人所聘定者互選請陝西省政府備案（委員由中央指派）按此條辦法未及實行

三 本會委員及各部主任每半年舉行會議一次必要時得舉行臨時會議均由主任委員或其指定召集人召集之其他人員得經主任委員指定列席
四 本會會議職權如左

（一）決定本會內部組織及規章訂立事宜

（二）決定本會工作設施事宜

（三）決定提請褒揚及撫卹事宜

（四）支配並稽核本會經費收支事宜

（五）討論主任委員交議事件

五 本會得就革命所在勳望卓著之同志中聘任顧問

六 本會設左列三部

(一) 編纂部

設主任一人編纂委員若干人由主任委員聘任之編纂陝西革命各役先烈史傳及有關文獻

(二) 採訪部

設主任委員一人採訪委員若干人由主任委員聘任之採訪陝西革命各役先烈之生平事蹟戰役史實及其他有關資料暨遺族狀況

(三) 總務部

設主任一人下置事務文書會計三課各設課長一人課員一人至三人均由主任委員任用之分任本會事務及不屬他部諸事項總務部並得酌用僱員辦理繕寫校對等事

七 本會人員分有給職無給職兩種其給與員額及待遇由主任委員定之

八 本會經常費除由陝西省政府列支外臨時費及褒揚撫卹各費由會專案呈請

中央執行委員會核發

九 本簡則經呈報 中央執行委員會存案後施行

附錄

閱民國紀元前五年秦隴報殘本書後藉以糾正「清鑑綱目」所記辛亥年陝西新軍革命甘肅民軍起義之錯誤以存信史 黨松年秦隴報爲前清陝甘兩省留日同學所創辦余長留東同鄉會事務時所主持者當滿清專制權威正盛文字禍烈之時陝人士明目張胆以文字大聲疾呼激勵鄉人自辦西潼鐵路藉以鼓吹革命者自吾文始西北之有月刊雜誌自本報始繼起者有「關隴」「夏聲」兩報前乎此者則無有也於民國紀元前五年（光緒三十三年夏）出版於倭京神田區爲清政府權力所不能禁密寄內地閱者過目即付諸洪爐故現存者稀如麟鳳上年有世父子出示其先德所藏秦隴報殘本珍若拱璧回首匆匆四十二年矣報社同人已多作雄鬼展視不勝神傷現在隴海鐵路橫貫西潼直達天水將踰劍閣通巴蜀西北將通過甘涼出玉門關探黃河源玉田石油供給西南半壁秦隴棉毛藥材遠銷歐美兩洲四通八達交通便利人才輩出後來居上誰復計及四十餘年前西潼鐵路問題亦如四川之保路同志會爲革命之導火線亡清之發動機耶時過境遷似此殘報廢紙補窗覆瓶亦不足惜頃有友人持世界書局出版之一清鑑綱目一來詢其第九百七十八頁及九百八十七頁所記民國紀元前一年辛亥九月陝西新軍革命甘肅民軍起義兩則何以與當日事實不符特書始末糾正其失以存信史

遜清自甲午戰敗戊戌維新不成女主專政親貴爭立致釀庚子拳匪之亂八國聯軍再陷北京國勢愈弱外患愈烈政治亦愈壞各省路權礦產多抵押於外人「寧送友邦勿與家奴」（二語爲清室貴族所言）列強藉修路開礦之權以實行其侵略政策瓜分之論喧騰中外憂國之士紛紛遠涉重洋託庇外人藉報紙口誅筆伐以鼓吹民族革命最有聲色者爲同盟會主辦之民報其次浙江潮廣陵潮復報等流傳所至振聾發聵挾甘肅在西北交通不便越國求學者往東南之後人數爲各省之殿然進步之速則有足以驚人者自京漢鐵路通車後路線西展將入陝境陝人士爲杜絕外人覬覦起見留東學生倡議於前在籍士紳響應於內於光緒卅三年集議招募民股先修西潼一段東接洛潼公舉平利李實齋閣學山陽宴海澄丞參兩紳爲總會辦而陝西大吏乃以陝西士紳不喜事亦不任事奏請改歸官辦以陝西布政使爲西潼鐵路督辦隨糧加征修路經費雷厲風行致激起同朝二華臨渭扶郿興武等縣農民停耕罷市以請求減免當局如開導得法片言可以立解乃勞師動衆如臨大敵二華臨渭扶武等縣慘殺廿餘人到處捕拿株連無辜自是陝人士無敢再言集股築路者漢口德記洋行則乘機運動包辦當局贖贖危機一髮余時主持陝甘留東同鄉會事務兼長豫晉秦隴四省協會因召開同鄉緊急會議電告北京軍機處反對外人包辦一面電致京內外同鄉紳商激勵其躍踴招股一面在日京創辦月刊以喚醒家山民衆灌輸革命思想表面宗旨爲開通西北民智介紹東西洋文化門類分八字數四萬以上頁數百廿以上月出一冊洋洋一大

雜誌後改爲「關隴」同時蜚聲留學界者有同鄉繼出版之「夏聲」山西四川河南雲南等省均出有月刊各以省名報名目雖殊而宗旨則一余特著「論西潼鐵路官辦之失敗及外人包辦之由來」一文以聲討清政府激勵人民報端署播種意以吾文傳播革命種子耳嗣後關隴報中余復爲西潼鐵路事著有「甘督升允之大言不慚」及評論西潼鐵路改歸商辦署名爲夢覺時三原于右任同志亡命上海創辦神州日報長沙楊篤生主筆政倡導民族革命見予論西潼鐵路一文急調專欄登載影響之大速於置郵自是西潼鐵路四字爲朝野中外所公認越年遂由陝紳公請改歸商辦卽今日隴海鐵路之中段也陝甘素稱風氣閉塞文化落伍不爲當道重視忽此大逆不道之刊物出諸陝甘少數留學生之口甚足以駭人聽聞余於本報發行後回西安冀將傳播種子聯絡同志有某君者曾游歷至日京深知本報之內容密戒學生曰「播種胡說裏他回來了你們不要與他來往時革命黨人徐錫麟刺殺安徽巡撫恩銘謀大舉遠近驚駭陝大吏談虎色變甚注意余之行止友人得訊連夜促余速去陝然秦隴報則因此大增聲價爭覩爲快也報以秦隴命名者以歷史上秦隴原係一省隴並包括新疆關係最密切地勢高屋建瓴民氣勇敢耐戰軍事上得地利人和同志計劃以本報文字喚醒西北民衆團結西北人心預定將來革命軍從秦隴發難出潼關而扼嶢函聯絡汴洛約三晉同志一面出歸綏以撼山海關一面出娘子關以搗幽燕東南則沿江淮京漢水陸並進較之太平軍從半壁東南仰攻京津者難易瞭如指掌故辛亥年九月一日陝西新軍起義

旗幟大書爲秦隴復漢軍者緣此義旗所至民衆前驅新軍徒手千餘人一舉而撲滅西安駐防旗兵五千陝西巡撫升允督甘涼馬步數十營東進不能下鳳乾一城北洋新軍協統王占元毅軍統領趙倜合精銳西來不敢越潼關一步秦隴復漢軍旗幟飄揚於東西兩戰場大小數十戰苦鬥百餘日槍彈不足繼以鋤刃刀矛肉搏棒擊前仆後繼當時戰爭之鉅烈爲各省所罕見迴憶陝西革命軍之發動雖由同盟會員之倡導秦隴等雜誌之鼓吹然嚮應之者爲三秦民衆促成之者保定速成軍官實行之者則爲新軍士兵張翔初當時管帶新軍三營幸能當機力斷決定大計錢定三張伯英党自新張仲仁曹健安張靖卿諸人能以同心協力即時分頭齊進各據要塞巡防營全部嚮應當日光復汴城張翔初據東羊市軍裝局爲大本營連夜進攻滿城殲滅將軍督統以下八旗官兵俘獲撫藩臬學道府以下各漢官不三日而全陝光復遠近嚮應雖由人心思漢實亦天意亡清予於辛亥前一年回陝任教於法政學堂初三日與郭希仁王錫侯張衡玉張深如楊鼎臣高幼尼南雪亭諸人集議於舊咸寧縣署組織臨時軍政府衆推予起草組織法案大綱即時決定用黃帝紀元採民主共和制同時應變軍民分治大統領副統領之下設軍政內務外交司法財政教育交通實業八部軍需法制選敍審計四局公推張翔初爲大統領錢定三副之張伯英張雲山馬玉貴劉世傑等分任都督督師北伐党自新張仲仁張靖卿陳柏生曹健安曹印侯等任參謀長師旅團長等職趙城張衡玉總理民政府鄠縣王錫侯副之黃陂徐德修權西安府事嘉興蔡寶善權長安縣事卽日刊發官

印組織官署通令各縣文武官吏除滿人外一律照舊供職維持地方治安照會各國教堂轉達各該本國政府凡在陝甘教士教民及居留商民一律保護以前與滿清帝國所訂合法條約及借款賠款繼續負有效責任但不得再與滿清政府訂購軍械或借款合同同三四日之間秩序大定市廛照常營業時湖北先於八月十八日起義至十月十三日武昌軍政府始公佈臨時政府組織大綱廿三條未幾南京光復十一月六日同盟會首領孫中山先生回國經十七省代表開會投票決定中央政府設於南京公舉孫先生爲臨時大總統十三日至南京就任中華民國紀元改用陽曆以是日爲中華民國元月元日組織內閣斯時秦隴復漢軍政府成立已逾兩月因交通斷絕東南各省消息不得知若無名正言順之正式組織以發號施令羣雄殊不易駕馭人心亦不易收拾及南北議和清帝退位遵照中央政府法令以次改組張翔初被任爲陝西大都督各都督改任師旅長各部長改任爲司長余被任爲陝西司法司長二年改任爲司法籌備處長印文具在當時戰跡歷歷可指不意上海世界書局發行之「清鑑綱目」第九百七十八頁捕風捉影以塞責篇幅竟自比於涑水之通鑑紫陽之綱目實自不覺其妄誕也原文如下

（綱）陝西民軍起義推張鳳翔爲全陝興漢軍大統領

（目）陝西新軍本多陝甘人光緒末恩壽撫陝奏調皖人王毓江爲協統而皖人之入陝者遂日增多安慶之役熊成基部下幾全部援摯入陝北輩腦中素有革命二字及鄂軍一起聞風響應同時有車駕西幸避陝之謠欲爲先發制人之

計遂於九月四日由砲工馬步等營相率懸白旗舉事先佔省城據藩庫軍裝局焚電報局錢能訓以下逃避一空遂公推管帶張鳳翽爲全陝興漢軍大統領後改爲大都督時駐防旗兵砲擊學生隊四百餘人人情大憤遂有殘殺旗兵之事旋即平定

查王毓江爲安徽阜陽人於光緒末年以道員候補山西爲巡撫恩壽所信任嗣隨恩壽調任來陝充督練公所督辦恩撫與慶親王奔勛爲兒女姻親王毓江爲其心腹聲勢煊赫因督修西關新軍營盤不利於衆口部下利款揭控於北京軍諮處時陝西藩司余誠格升任湖南巡撫王遂隨余藩去陝入湘充全省巡防營營務長及長沙新軍起義圍攻巡撫衙門王毓江與防營統領黃恩浩督巡防營抵抗被殺於巡撫衙門大堂余誠格與藩司黃以霖提法司劉鍾琳均棄職逃事實詳清鑑綱目第九百七十五頁

熊承基揚州人宿有革命思想充安徽砲營隊官本擬乘光緒卅四年太湖秋操時起義嗣以西太后及光緒帝之喪秋操中止熊因乘機鼓動於十月二十六日黎明率砲兵營突攻安慶省城不克反爲秋操軍隊長江水師水陸圍擊失敗率殘部退至桐城樅陽廬州等處解散沿途秋毫無擾單身走哈爾濱復謀於車站狙擊清皇族載濤事洩當被捕就義於吉林此其清鑑綱目九百八十七頁所記述者與當時之事實亦相符足見時熊之足跡未到陝境其部下早各自分散其九百七十八頁所記之事實與其九百八十七頁所記何得自相矛盾夫保清與復漢各行其志勢同水火王毓江爲滿清道員臨

難不免不可謂非忠於清者著者何故湮沒其志以首鼠兩端之事厚誣之熊成基爲實行革命家不惜壯烈犧牲初謀不成復欲奮博浪沙之椎其堅苦卓絕之志趣驚天動地之事業實足以泣鬼神立頑懦增光史乘又何必割裂事實湮沒其哈爾濱一擊不與徐錫麟吳樾彭家珍史堅如溫生才周貞之陳敬嶽諸英烈後先相耀耶茲將民國前一年秦隴復漢軍起義事實與清鑑綱目記述錯誤列表說明

陝西革命事實

清鑑錯誤

陝西新軍於宣統三年九月一日晨起義

清鑑記爲九月四日誤

陝西革命完全由新軍官兵主動

清鑑記爲王熊之下影響誤

起義旗幟官印文告爲秦隴復漢軍

清鑑記爲全陝興漢軍誤

陝西新軍爲預謀革命早有三十六弟兄之組織

清鑑記爲聞風響應誤

新軍起義時標記膀纏白布撕去肩章口號爲滅滿

復漢

清鑑記爲相率懸白旗誤

新軍進城先焚巡撫衙門次燒提法使署後焚駐防

將軍署

清鑑記爲燒電報局誤

張翔初進城搜東羊市軍裝局散發槍械子彈

清鑑記爲據藩庫誤

陸軍中學學生守藩庫法政師範兩校學生巡查街

清鑑記爲駐防旗兵砲擊學生

道未傷一人

四百餘人之事誤

西安駐防旗兵與復漢軍巷戰於滿城除陣亡及自

盡外餘均收容關帝廟及長咸兩縣監中供給

飲食事定後遣去

清鑑記爲殘殺旗兵之事誤

東西兩戰場苦戰百餘日至民國元年三月始罷兵

清鑑記爲旋即平定誤

王毓江來陝充督練公所督辦

清鑑記爲協統誤

王毓江爲抵抗湖南革命軍被殺於長沙巡撫衙門

清鑑記爲腦中素有革命二字

大堂

誤

熊成基於安慶起事失敗其殘部退至桐城樅陽廬

州分途解散隻身走哈爾濱就義於吉林

清鑑記爲熊全部援摯入陝誤

再其九百八十七頁記述甘肅民軍起義幽囚總督長庚一節尤遠於事實原文如下

(綱)甘肅民軍起義總督長庚被執囚之

(目)甘肅聞山陝之變人心異常恐懼及伊犁將軍志銳被殺總督長庚知大勢已

去不可收拾憂鬱特甚未幾民軍起義長庚被囚全部遂宣佈獨立

茲將民國元年三月甘肅反正事實與清鑑記述錯誤列表說明

甘肅反正事實

清鑑記載錯誤

升允率甘肅全軍於宣統三年九月中旬攻入陝境

至民國元年三月始退回甘肅

清鑑記載未幾民軍起義誤

甘軍撤回蘭州文武官吏公推提法使趙維熙爲都督

宣佈反正

清鑑記爲民軍宣佈獨立誤

陝甘總督長庚因奉清帝退位詔書自解職去

清鑑記爲長庚被幽執誤

就以上事實比照宣統三年辛亥九月一日陝西新軍起義之事實昭昭可考著清鑑綱目者不知其見聞失實無心之誤抑或阿其所私意別有在甚冀及早改正免以訛傳訛淆亂後人聽聞至於陝西革命軍成功之迅速亦非偶然西北爲漢民族文化發源地民氣樸厚勇敢富民族性自庚子聯軍陷北京西太后挾光緒帝奔西安駐蹕經年專制君主之腐化情形滿洲貴族之昏貪現像完全暴露於長安市上致激起三秦人士民族復興觀念于右任半哭半笑樓詩草之獄卽其表現于爲陝西三原諸生中癸卯科鄉試富民族思想詩文多指斥時政尤詆詈西太后那拉氏甲申春赴河南會試三原縣王令得其半哭半笑樓詩稿夤夜進省告密陝大吏急電河南巡撫圍搜試場不得通電東南各省協緝于逃至上海爲馬湘伯老人羅致託庇租界初辦神州日報繼改爲民呼民吁民立宗旨一貫鼓吹民族革命同時陝西留日學生所辦之秦隴關隴夏聲等雜誌先後輸入陝甘同盟會黨人隨時潛回家鄉宣傳運動初得學界贊助繼則與新軍士兵江湖俠士相結合以竹筴市公益書局及健本小學爲其通訊處武備學生之留學保定速成軍官者亦有密祕組織與留日同盟會員通聲氣宣統二年錢定三張伯英諸人畢業回陝分任新軍各營教練連排長等職日與士兵接近互相結合密祕組織卅六弟兄會

聯絡遠近以西關外新軍營盤爲根據地林家墳爲其密祕會議場西稍門外茶館爲招待通訊處謀劃部署原定是年中秋夜起事風聲外洩陝大吏防備極嚴扣發新軍子彈兼以主持無人徒手未敢輕動然市井謠傳蛇影杯弓當局驚惶及至八月十九日湖北消息傳來西安駐防將軍以八旗兵操演爲名將軍裝局新式槍砲索去分佈於滿城四門凡形跡可疑之新軍官長學堂教員學生列名促錢護撫院捕拿新軍人人自危張伯英錢定三於八月卅夜密謀於新軍二營管帶張翔初約三十六弟兄翌晨集合於林家墳是日恰爲星期放假省諮議局於是日開成立會文武官吏咸集是時城外新軍同志公推張翔初領導即時決定各率所部於十一時由四城門徒手混進扯去肩章膀纏白布一路撲軍裝局一路搶奪陸軍中學堂槍械分撲巡撫以下各大官署先火焚巡撫衙門次焚提法使署錢護撫院以下人員逃遁一空舊有之巡防營全部反正學生市民一致勝纏白布響應卽日光復大城（按西安舊有三道城垣大城滿城皇城）聯夜進攻滿城西安將軍據城死守革命軍分頭登屋越城放火焚將軍衙門與旌兵巷戰其殘部退據北城門樓夜半縱火自焚墜城逃遁將軍都統以下旗員不知所終初三日內外城底定分頭遣將東克潼關西克長武北路安撫招討使井勿幕斐宜誠先後宣撫延榆綏一帶南路安撫招討使張仲仁安緝興漢兩府復漢軍之目的惟在光復漢業消滅八旗兵武力非若滿洲之侵犯中國以殺立威揚州十日嘉定三屠之外窮奔蠻荒之桂王由榔父子亦必絕其根株改名張用觀之朱三太子慈煥七十六歲亦不能留其殘生西安

駐防旗兵除陣亡及自盡者外餘均收容於關帝廟及咸長兩縣監中未戮一人不意有寄寓西安之前任陝甘總督升允乘亂逃至甘肅涇州清廷命其署理陝西巡撫督辦陝西軍務率固原提督張行志甘肅提督馬安良馬步漢回全軍進攻西安連陷長武永壽邠州等縣圍乾州不下分兵犯鳳翔西路之戰禍從此起矣東路潼商道瑞澂由風陵渡逃至陝州清廷命其鄉導王占元趙倜兩軍進攻潼關據東原以窺華陰副統領錢定三率隊往援輕騎先行爲渭南民團誤傷大統領張翔初連夜親自督隊東驅克復潼關東路都督張伯英追擊清軍至河南澠池車站適遇姜桂題率大部毅軍馳至潼關再陷復漢軍背山面河扼守吊橋以規復潼關再得再失東路戰禍延長矣而西路數百里平原敵騎四馳竄擾攻乾州之游騎突陷醴泉衝至咸陽圍鳳翔之別隊偷襲岐山進至扶風復漢軍東西馳救相持百一十餘日大小數十戰死傷枕藉升允督兵攻正面分遣隴南巡防營羅平安出兩當以扼鳳縣與漢中鎮兵相首尾以保漢中前方扼秦嶺以守東河橋偵騎常至大散關陝甘總督長庚駐紮蘭州募兵籌餉至臘月二十日（民國元年二月十八號）依然翎頂朝服封印過年預備朝賀宣統四年元旦及至二十五日宣統退位（卽元年二月二十三號）南北議和東路潼關雙方罷戰撤防而西路升允迄不奉命督甘涼軍進攻愈力袁世凱電令趙倜拔隊西進與秦隴復漢軍合力擊之清運旣終甘軍亦不用命升允始狼狽退入甘境棄軍北去至三月上旬西路戰事始告結束計自復漢軍長武失守至升允去陝兩軍爭戰於乾鳳之間者一百一十餘日受兵禍最甚者

長武永壽邠州乾州醴泉鳳翔岐山興平扶風武功咸陽寶鷄十餘縣大小數十戰雙方傷亡不可數計至今元氣未復

清自載灃攝政皇室專政排斥漢人愈亟內而各部尙侍外而三品以上人員八旗人占十之六七又多昏庸不能任事如陝巡撫升允者實其庸中佼佼銖中錚錚當時有比之爲元末之庫庫特穆爾者事功雖不逮然其忠盡之志清廉之操不能以其反抗秦隴復漢軍而湮沒之升允既去甘軍瓦解長庚卽解陝甘總督職經草地北歸蘭州文武公推提法使趙維熙爲都督改年號易服制換印信旗幟宣佈反正草木不驚傳檄而定時民國元年三月初旬事也長庚並未失自由人民亦未樹獨立旗與河南山東直隸東三省情形大約相同著者於九百八十七頁含混其詞不記明民軍起義月日獨立人姓名於復漢軍東西兩戰場一百一十餘日之苦鬥五六百里之兵災千百健兒之熱血一筆抹煞是誠何心耶綜計辛亥革命秦隴復漢軍之勝負關係全局成敗者甚大自袁世凱起用段祺瑞總督兩湖連克漢口漢陽火焚漢口市灰燼武昌危急張錫鸞大軍入娘子關攻陷太原圍都督敗走霍縣溫副都督奔陝求援復漢軍分兵渡河爲恢復晉甯時直隸河南東三省暨察熱綏三特區仍拱衛北京萬一秦隴復漢軍西不能保乾鳳東不能守二華南不能扼漢水北不能復延榆羅平安隴南之兵輸秦嶺直趨陳倉漢中鎮兵出東斜口以據豎鄂升允之甘軍渡渭直趨二華與王占元趙倜合軍出洛鄭以向徐淮張勳之江防軍猶雄據浦口北平之禁衛軍械精餉足大江以北滿清勢力仍不可侮能

必其遂棄一姓之尊榮不貽萬姓以實禍耶當時雙方人物尙多健在不難質詢眼前事實亦不能真確記述其能傳信後世耶陝人性質樸實果斷重實行不重文彩遇事合於本心卽做成不言功敗不諉過辛亥之役本決定於崇朝立談之間同志事前多不得知及見南院火起始驅集軍裝局外省同志亦未暇聯絡倉卒起義西安雖倖能光復東西兩路未能預防致升允瑞澂兔脫招來數月血戰西北人士對革命之熱誠壯烈皆有實事可稽雖文獻無徵而舊人尙多健在者余故追述此篇以存其真實并以正他書之訛云

按党松年先生清末留學日本與陝甘同人首創秦隴報鼓吹革命實爲西北革命思想先河光宣之際歸陝任高等學堂教習辛亥光復身與其役軍事政治諸端皆其目覩此篇所述本爲糾正清鑑綱目之失與史徵可以互相印證卽所言秦隴關隴兩報暨夏聲雜誌各刊物均與西北革命初期運動掌故有關尤足補本編之闕謹錄載其全文於此備衆參攷焉

陝西派送留日學生始於光緒三十二年

西潼鐵路之提倡始於光緒三十一年乙巳初由京省各地士紳及留學界發起自行募股商辦推京官李聯芳晏安瀾等主其事議定後未能及時進行踰年陝撫曹鴻勛遂以陝人素不喜事不任事之說奏請清廷改歸官辦委藩司樊增祥爲總辦陝人大忿士紳崔少芳趙乾生鄭口口（三人皆在籍官吏）等召集地方人士開會屢爭不得張

拜雲乃入京上書郵傳部斯時曹撫已卸任去繼任者爲滿人恩壽因爲調停之說以隴海鐵路西展尙需時日西潼鐵路宜先從募股入手如能募得全股三分之一時卽仍歸商辦事在光緒三十三年三十四年之間

秦隴報光緒三十三年出版內多介紹新知及指示地方政治文字猶未顯言革命至秋季復改名關隴報內容則漸有論政體者迨夏聲雜誌於光緒三十四年出版始倡言政治種族矣

以上二條爲松年先生追憶口述及載諸秦隴報者以其有關史實故并錄之

上海图书馆藏书



A541 212 0009 10028

34